

SIRACH

Deuterocanonical book that is also known as Ecclesiasticus (to be distinguished from the canonical book Ecclesiastes). The author is generally referred to as Jesus ben Sirach; however, in recently discovered Hebrew manuscripts, his name is given as Simon son of Jesus son of Eleazar ben Sirach. He was a Hebrew sage who lived in the beginning of the second century bc and who taught in Jerusalem (Ecclus 50:27; cf. 51:23ff.). The work bears the imprint of a man steeped in a tradition later known as Sadducean. This work was valued highly by both Jews and Christians. The author was a scribe who wished to give his teachings a more permanent form, for which he utilized the canonical Proverbs as a model. His instruction adheres closely to Jewish orthodoxy. The book was probably written about 180 bc.

Cueinah A Uem

¹ Cueihnah boeih Boeipa lamkah tih. amah taengah a yoeyah la om.

² Tuitunli kah laivin khaw, khotlan tuicip khaw, kumhal kah khohnin he u long a tae thai?

³ Vaan kah a sang neh, diklai kah a ka khaw, tangrhom kah a dung khaw u long a khe thai?

⁴ Cueinah he hno tloe cungkuem lakah a suen lamhma coeng, ⁵ yakmingnah neh mueltuethnah khaw khosuem kah pawn ni.

⁶ Cueinah a yung tah u taengah nim a phoe? A langnah te uh long a ming?

⁷ Cueihnah mingnah he a phoe pah rhoek taengah om tih, aka yaakming rhoek taengah tah a coih la a hmuh.

⁸ Hlang pakhat om tih, anih tah cueih, bahoeng rih ham aka om tah, A ngolkhoel dongah aka ngol Boeipa ni.

⁹ Amah loh cueihnah a suen tih, Te te a sawt phoeihah a nueh bal pueng, Te ni a bibinah boeih dongah a lun.

¹⁰ A kutdoe tarhing la mulhing boeih soah a paek tih, amah aka lungnah soah moeihoeih la a paek.

Boeipa Rih he Cueihnah ni

¹¹ Boeipa rihnah he thangpomnah neh pom-sangnah, kohoenah neh omngaihneh rhuisam la om.

¹² Boeipa rihnah loh thinko a hmae sak tih, kohoenah, omngaihneh, hinglung vangnah a paek.

¹³ Boeipa aka rih tah a bawtnah hil omngaih vetih, a dueknah hnin ah yoethennah om ni.

¹⁴ Boeipa rihnah he tah cueihnah a tongnah ni, te te bungko khuiah khaw uepomnah neh a suen.

¹⁵ Cueihnah tah hlanghing lakli ah kumhal khoengim la a suen tih, a cadil lakli ah khaw uepom la rhaehrhong pawn ni.

¹⁶ Boeipa rihnah loh cueihnah a baetawt sak, a thai te hlang a hah sak.

17 Im pum te ngaih om hno neh a bae sak tih, a khai te a thaih neh a khawk sak.

18 Boeipa rhihna he cueihna rhuisam la om, mongnah neh saitlimnah ham sadingah a paek.

19 Mingnah te a tlan sak tih nuemnainah te a ngaih sak, Amah aka tu rhoek kah thangpomnah te a sang sak.

20 Boeipa rhihna tah cueinah a yung la om, a hlaeng khaw hinglung a vangnah la om.

21 Boeipa rhihna long tah tholhna a haek tih, amah dongah aka tukkai hlang a thintoeknah boeih a nong tak.

22 A thuem mueh kah thintoeknah he a thuem la a om moenih, cungnueh a bawtnah hil kah thintoeknah loh hlang a poci sak.

23 A thuemnah rhi hil kammueh la om tih aka ueh tah, amih te kohoenah loh koep a mael thil.

24 A thuemnah rhi hil a ol aka tuem rhoek tah, A yet kah hmuilai dongah amih kah a then te a thui.

25 Cueihna thakvoh khuikah tah olthui khaw cueih, tetae hingcimnah he hlangtholh ham tah tueilaeh kap.

26 Cueinah te na ngaih tah olpaek te tuem, Boeipa loh nang soah a hmoek bitni.

27 Boeipa rhihna tah cueihna neh rhilam la om tih, uepomnah neh kodonah ni a ngaingaih.

28 Boeipa rhihna te altha boel lamtah, lung-buei kaekvang neh amah te paan boeh.

29 Hlang tloe hmuh ah thailatnah neh om boeh, na hmuilai khaw dawn lamtah tuem.

³⁰ Namah te pom uh soeh boeh, Na tla vetih nang soah mingthaenah la pai ve. Boeipa loh na olhuep khaw a phoe vetih, hlangping hmai ah nang m'palet ve. Boeipa rihnah neh na lo pawt dongah, na thinko ah thailainah ni a bae.

2

Pathen taengah Hutnah

¹ Ka ca aw, Boeipa te thothueng ham na lo vaengah, namah noemcai hamla rhuengphong dae.

² Na thinko te a dueng la khueh lamtah cak sak,

³ Amah te kop lamtah nong boeh, te daengah ni hnukhueng khohnin ah na thaitak eh.

⁴ Na sokah aka tla sarhui te doe mai ngawn, tlayae tue vaengah khaw thinsen la om mai.

⁵ Sui khaw hmai neh a noemcai tih, doe koila a hmuh rhoek tah tlayaenah hmai neh a noemcai.

⁶ Amah te uepnah lamtah amah loh nang n'bom bitni, na longpuei mah a dueng la khueh lamtah amah te ngaiuep.

⁷ Boeipa aka rih tih a rhennah aka rhing nang tah, phael boeh ne, na cungku tarha ve.

⁸ Boeipa aka rih tih hno then aka ngaiuep nang tah, na kutdoo khaw hma mahpawh.

⁹ Boeipa aka rih tih hnothen aka ngaiuep nang tah, omngaihlah neh sitlohnah khaw kuei ni.

¹⁰ Yankah rhuirhong te poek lamtah so lah, Boeipa dongah aka pangtung hlang he a ngaihlih bal nim? Boeipa rihnah dongah aka tuem uh te

a voeih bal nim? Amah aka khue te a hnalval nah bal pawn nim?

¹¹ Boeipa tah thinthoei lungvat neh sitlohnah la om tih, tholnah khodawk a ngaih phoeiah, ngaih mang tue vaengah khaw a kang bal.

¹² Anunae, rhalyawp thinko neh, yaikawt kut aih, caehlong panit ah aka cet hlangtholh aih te.

¹³ Anunae ko aka bawt tih pangtungnah aka khueh pawt aih te, Te dongah amih te hlipling-nah khueh mah pawh.

¹⁴ Anunae, nangmih yaknganah aka khueh pawt rhoek aih, Boeipa kah cawh nah a pai vaengah metlam na ti eh?

¹⁵ Boeipa aka rhih rhoek long tah a ol te a ngai pawt moenih, amah aka lungnah rhoek loh a khosing khaw a tuem.

¹⁶ Boeipa aka rhih loh *Boeipa* kongaih ni a tlap tih, amah aka lungnah hlang tah a olkhueng neh baetawt.

¹⁷ Boeipa aka rhih long tah a thinko a rhoekbah tih, a mikhmuh ah amah te kunyun coeng.

¹⁸ Boeipa kut dongla tla uh sih lamtah, hlang kut dongah boel saeh. A boeilennah neh a sitlohnah he vanat tih, a ming neh a bibinah khaw vanat la om.

3

Manunapa Soah Khueh Ham Koi

¹ Ka a rhoek aw, na pa kai ol he hnaton uh, a cuepmueih la pongtho lamtah, a suengnah la n'khoem saeh.

² Boeipa loh ca rhoek soah a napa te a thangpom tih, ca rhoek soah saithainah khueh ham a manu te a cak sak.

³ Napa thangpom he tholh dawthnah la om tih,

⁴ A manu hinyahnah he tah kawn aka tung neh vai uh.

⁵ A napa aka thangpom hlang tah a ca rhangneh omngaih vetih, A thangthui uh vaengah khaw a hnaton pah ni.

⁶ Napa hinyahnah he tah hinglung vangnah la om tih, manu aka thangpom loh Boeipa ol te a ngai.

⁷ Te dongah a manu napa te a boei bangla bongyong saeh.

⁸ Na pa te ol neh, khoboe neh thangpom lah, te daengah nih a yoethennah te nang soah a pai eh.

⁹ Pa kah yoethennah loh ca rhoek kah im a thoh pah tih, manu kah thaephoeinah loh a khoengim a phil pah.

¹⁰ Na mah na thangpom neh na pakah mingthaenah saii boeh, na pa kah mingthaenah te nang thangpomnah moenih.

¹¹ Ana pa kah thangpom nah khaw amah kah thangpomnah ni, te dongah a manu aka hinyahnah pawh camoe tah mingthae a phueih.

¹² Ka ca aw, na pa te a patong vaengah khaw bom, a hing khui ah anih te kothet sak boeh.

¹³ a kopok talh mai cakhaw a taengah thinsennah khueh mai, na thaomnah na khueh li vaengah khaw anih te hnoo boeh.

14 Pa taengah rhennah aka khueh tah hnilh pawt vetih, na tholhnah soah nang ham tholh hlahnah la om ni.

15 Nang kah citcai khohnin vaengah khaw, nang ham kolonah a poek vetih, khothen vaengkah cingmai bangla, na tholhnah khaw cing ni.

16 A napa aka hno he tah Pathen aka soehsalkung neh vai uh tih, A manu thintoek aka saii tah Boeipa loh thae a phoei thil.

Kodonah

17 Ka ca, na hutnah te kodonah neh saii, Pathen aka doe rhoek long nang n'lungnah bitni.

18 Len la na om atah, namah te kodo la muep na om a kuek. Te daengah ni Boeipa Mikhmuh ah kolonah na dang eh.

19 Muep phoe uh tih yan uh mai cakhaw, kodo long ni olhuep a hmuh sak.

20 Lennah he khaw Boeipa kah a tlungthangnah tih, *kodo* long tah Boeipa a thangpom.

21 Namah hamla aka kuel tloe te khaw tlap boel lamtah, na sarhi voelah aka om khaw khe boeh.

22 Nang hamla balae olpaek aka om tih, na ngoe mueh tah a thuh coeng mah thuep.

23 Nang voelkah olka dongah lai panit la phae sak boeh, na ming thai lakah a yet la nang te n'tueng coeng.

24 Amih kah kopoe loh longhmang la muep a mawt tih, poek tholnah loh a laitloeknah khaw a haeh sak coeng.

²⁵ Ming a om pawt tah vangnah om pawh, mingnah a om pawt tah cueihnah om pawh.

²⁶ Thin thah kah hmakhahnah khaw thae cakue tih, mueirhih aka lungnah khaw amah te ni a toh eh.

²⁷ Lungbuei mangkhak he khaw ngaih mang loh a nan vetih, hlangtholh loh tholnah te tholhnah neh a koei.

²⁸ Hlang oek te citcai loh a tlak thil vaengah, a hoeihnah om pawt tih, boethae thing te anih khuiah a yung cak.

²⁹ Lungming kah lungbuei long tah thuidoeknah te a oep tih, hna aka kaeng tah cueih aka ngaih la om van.

Khodaeng Bomnah

³⁰ Hmai tak khui kah tui a rhaeng bangla, bomcennah khaw tholh dawthnah la om.

³¹ Kolonah neh aka pae loh hmailong ham khaw a paek, A cungku vaengah khaw aka duelkung a hmuh ni.

4

Khodaeng Soah Khueh Ham Koi

¹ Kaca aw, khodaeng kah khosaknah te yoop boeh Vawtthoek mik neh aka rhing te khaw mangthung tak boeh.

² Bungpong khaw kothet sak boel lamtah, aka vawtthoek khaw thintoek sak boeh.

³ Kobawt kah ngaih mangnah te koei pah boeh, aka vawtthoek khaw paek hamla uelh boeh.

⁴ Patang neh kutduen te khaw haek boel lamtah, khodaeng taeng lamloh na maelhmai mangthung boeh.

⁵ Aka vawtthoek taeng lamloh na mik a tloe ka hoi boeh, thang thaephoei thil ham rhoidoengnah khueh boeh.

⁶ Hinglu aka khahing loh nang n'tap vetih, Amih suenkung loh a thangthuinah te ya lah ve.

⁷ Hlangping taengah khaw namah rhoinaeng lah, hlang len taengah na lu khun sak mai.

⁸ Yaaknah te khodaeng ham khueh pah lamtah, amih kah voemtoeinah khaw olthen la thuung.

⁹ A hnaemtaek te hnaemtaekkung kut lamloh hlawt lamtah, amih te a tang paek hamla uelh boeh.

¹⁰ Cadah ham a napa la om pah lamtah, a manu taengah khaw a va bangla om pah. Te daengah ni Khohni capa la na om vetih, amah loh na nu lakah khaw n'lungnah eh.

Cueinah Kutdoe

¹¹ Cueinah loh a ca a thuituen tih, amah aka rhoek te bomnah a paek.

¹² Amah aka lungnah loh hingnah khaw a lungnah tih, mingcang lamloh amah yueya aka tlap tah omngaihnhah bae.

¹³ Amah khak a tu loh thangpomnah a pang tih, a kunnah hmuen te Boeipa loh yoethennah a paek.

¹⁴ Amah taengah tho a thueng te A cim Pathen ham ni, amah aka lungnah te Boeipa loh a lungnah.

15 A ol aka ngai rhoek loh namtom lai a tloek vetih, te aka hnatun boeih tah hiluepnah neh hing ni.

16 Uepomnah neh aka tukkoei long te te a pang vetih, a tiingan long khaw te te a dang ni.

17 Caethae longpuei ah khaw amih taengah lamhma la cet vetih, amih soah rhinah neh lakuengnah khaw a khuen pah ni. Amih te nganboh nen khaw, amah a uepnah hil amih te a toel ni. Te phoeiah amih te a olrhi neh a noemcai ni.

18 Te phoeiah amih te long dueng la a mael puei vetih, ko a hoe sak phoeiah amih ham olhiep a phoe pah ni.

19 A phaelh la a caeh uh atah amih te a hnoo vetih, amih te a pocinah ham a voeih ni.

20 A tue then te dawn lamtah, boethae te rhalrhing,

21 namah te rhaidaeng la om saii boeh.

22 Namah aka ngawn hamla hlaangnah khueh khueh boeh, na tlaknah hamla a lang la om boeh.

23 A tuengnah dongah tah olcal khaw paih boeh, na cueinah khaw phah boeh.

24 Cueinah he khaw olthui thingka loh a mingpha sak tih, hmuilai dongkah ol he tah lungmingnah la om.

25 Oltak te oelh boeh, na kotalhnah he yah hamla om.

26 Na tholhnah te phong hamla yak boeh, tuiva kah tuithaa te mah hamla cai boeh.

27 Hlang ang taengah yalh pah boel lamtah, ukkung taengah hlaangnah khueh boeh.

28 Oltak ham te na dueknah hil hnuei lamtah, Boeipa Pathen loh nang yuengla a hnueih bitni.

29 Na olcal dongah buhueng pom boeh, na bibi dongah khaw yaikawt ngakyalnah khueh boeh.

30 Na imkhui ah sathueng bangla om boel lamtah, na tueihyoeih te ngaihoih boeh.

31 Dang ham bueng la na kut te phuel boel lamtah, paek ham tue vaengah khaw na kut poem boeh.

5

Khosaknah Ham Mingphanah

1 Na khuehtawn dongah hangdang boeh, “Ka rhoeh van coeng,” ti boeh.

2 Na ngainah neh thaomnah te vai boeh, na thiko kah a hue khaw hloem boeh.

3 “Kai soah unim thaomnah aka khueh,” ti boeh. Boeipa long namah te dan n'tat ve.

4 “Ka tholh, dae kai ham bala om pawh,” ti boeh, Boeipa loh thintoek khaw a ueh.

5 Khodawkngainah khaw uepnah aih boeh, Tholhnah te tholhnah nen ni na thap eh.

6 “A sitlohnah len tih, ka tholhnah ping cakhaw, khodawk a ngai ni,” ti boeh. Amah taengah kosi neh sitlohnah bok om lah ko, a thintoeknah he hlang tholh soah ni a tlak.

7 Boeipa taengla na mael ham te uelh boeh, hnin at phoeiah hnin at dang thil boeh. Pathen kah kosi te nang soah buengrhuet ha tla vetih, dantatnah hnin at na mit na moeng ve.

⁸ Laithae khuehtawn dongah hangdang boeh, citcai tue ah na hoeikhangnah om hae mahpawh.

⁹ Kho a hli takuem khaw cang hla boeh, caehlong khaw boeih vai boeh

¹⁰ Na mingnah soah a cak la pai lamtah, na olthui khaw a cip la om saeh.

¹¹ Hnatun ham tah loe sak lamtah, hlatnah ham tah a yaila poek.

¹² Thui ham te na ming atah na imben mah hlat pah, na pawt atah na ka te na kut neh buem thil.

¹³ Hinyahnah neh mingthaenah khaw olthui lamloh thoeng tih, hlang kah lai he amah a tlaknah la om.

¹⁴ A lai ka phae tila n'khue uh boel saeh, na lai te hlaeh la tung boeh. Huen lamloh yahpohnah thoeng tih, a lai aka phae he tah a boe hamla tueng mai.

¹⁵ A len khaw, a yit akhaw, dumlai he tah nganboh la om het mahpawt nim?

6

¹ Paya te rhal la lat khueh boeh, mingthae he khaw yahpohnah neh yan uh khoeng, Te dongah hlangtholh lai phae khaw te tlam ni a om.

² Hoehhamnah khiuah khaw khak cungpung boeh, vaito bangla maehpoel la n'sah ve.

³ Na hnah te han luep vetih na thaih te ham phae ve, Te vaengah thing koh bangla nang n'hno hae ve.

⁴ Boethae kah hoehhamnah aka khueh a phae vetih, amih te a thunkha kah nueihbu la a poeh sak ni.

Paya Tang

⁵ Ol then loh paya a ping sak tih, lai aka phaih loh boethen a yet sak.

⁶ Paya he na taengah muep om mai saeh, Tedae thawng khat dongah pakhat ni baerhoep la a om eh.

⁷ Paya la khueh na ngaih vaengah khaw, nuem-nai lamtah khueh amih te cukhat la uepnah boeh.

⁸ Amih te paya lamkhaw boeih koih uh suidae, na patang tue ah tah nang n'om puei hae mahpawh.

⁹ Paya khaw thunkha la poeh vetih, tohhaem-nah te rhaidaeng la a thui ni.

¹⁰ Na caboei aka vael na paya rhoek khaw, na ngaih mang tue vaengah tah pai hae mahpawh.

¹¹ Na khueh na tawn vaengah tah na pum pabae la om vetih na tueiyoeih rhoek soah boei khaw a bi ni.

¹² Tedae na tlak vaengah tah, nang taeng lamloh mael uh vetih, nang te n'thuh uh tak ni.

¹³ Na thunkha rhoek taeng lamloh lakhla khoem uh lamtah, na paya rhoek taengah khaw hueltue la ngaituen.

¹⁴ Paya uepom tah hmuencak kah hlipyingnah la om tih, kawntthen aka hmuh rhoek bangla om.

¹⁵ Uepom paya tah a puehsoi la a phu om tih, U long khaw a phu a ting la thui thai mahpawh.

16 Paya he hingnah aka hlawt si la om tih, Boeipa aka rhih long ni te te a hmuh.

17 Boeipa aka rhih long tah paya khaw a then la a hoihaeng, amih vanbangla a imben soah khaw om.

Cueihnah Yoethen

18 Ka ca aw, na camoe lamkah toelnah te tuek lah, na sam a pok vaengah khaw cueihnah na dang pueng ni.

19 Te te lotawn cangtuh bangla ha thoeng tih, cangah tue then a lamtawn. Lo na phoh vaengah kolkalh tah na thakthae dae, a thaih te pahoi na caak pawn ni.

20 Te te bahoeng ngakyal ham khaw om dae, a taengah anglatnah a naeh thai moenih.

21 Te tah lungto aka rhih bangla a noem dongah, phawn a voeih ham te uelh mahpawh.

22 Cueihnah he a ming nen khaw a tluk dongah, muep a doe uh ham khaw sikim uh thai pawh.

23 Ka ca, hnaton lamtah, ka laitloeknah he doe lah, ka cilkhih he khaw hnawt boeh.

24 A khocin dongah na kho te thawt lamtah, a rhawnmoep dongah na rhawn te khueh lah.

25 Na laeng te duen lamtah amah te kawt lah, amah kah pinyennah khuiah khaw omdam boeh.

26 Na hinglu boeih neh amah te paan lah, na thaomnah boeih neh a longpuei te ngaithuen lah.

27 Khe lamtah tlap lah, na hmuhkoi la ha om bitni, amah te na tuuk coeng atah hlah voel boeh.

28 A hnukkhueng ah tah duemnah m'paek vetih, nang ham omngaihna la poeh ni.

29 A palawm pataeng sui himbai la poeh tih, amah pinyinah khaw daidi haikang la poeh.

30 A rhoeplong tah sui thoeihcamnahnah la om tih, a haikang khaw daidi rhui bangla om.

31 Amah te thangpomnah hnikul la na bai vetih, amah te boeilennah rhuisam la na khuem bitni.

32 Na huem atah, ka ca nang te n'toel vetih, namah hamla na loh atah aka khuel la na om ni.

33 Hnatun hamla na lungnah van atah mingnah na dang vetih,

34 hna na kaeng van atah hlangcueih la na poeh ni.

35 Hingcim dongkah thuingongnah tah hnatun hamla sikim lamtah, hlangcueih kah thuidoeknah loh nang n'rhael boel saeh.

36 Lungming hlang te na hmuh atah yue thoo lamtah lai-om, na khopha te a kuihlak dongah daeptlawt saeh.

37 Boeipa kah olrhi te poek lamtah, a olpaek boeih khaw a tue takuem ah thuep lah. Amah loh na lungbuei kah hmuhmingnah m'paek vetih, cueihnah na hue te khaw m'paek bitni.

7

Atloe Cilkhiih

1 Boethae na sai boel lamtah, boethae long khaw nang m'vuei boel saeh.

2 Tholhdalh te a hla om tak lamtah, amah te nang lamloh nong bitni.

³ Boethae kah hmakhuen dongah cangti soem boeh, a cangvui te voeirhih la na yun het mahpawt nim?

⁴ Hmuen sang lamkah Boeipa neh, Manghai taengkah thangpomnah ngolhmuen te toem boeh.

⁵ Na duengnah te Boeipa hmaiah thaem boel lamtah, na cueihnah khaw manghai hmuh ah tai boeh.

⁶ Laitloekkung la om ham khaw tlap soeh boeh, dumlai kah a yung ka phil tloel la na om ve. Thaomnah kah a hnaephnap la na om vetih, na cuepmueihnah khaw yip mui ve.

⁷ Hlangping soah boekoeknah saii boel lamtah, pilnam taengah namah te rhaidaeng la om boeh.

⁸ Dantatnah na yook pawt mai cakhaw, tholhnah he a rhaep la koep saii voel boeh.

⁹ “Ka kutdoe muep a yet he a poek vetih, Khohni Pathen taengah nawnnah ka paek te, a doe bitni,” ti boeh.

¹⁰ Na thangthui vaengah na mawnnah te pueh boeh, doedanah paek ham khaw hnoelrhoeng boeh.

¹¹ Mueihla dikdak aka khahing hlang te hnael boeh, Tlayae phoeiah aka thangpom kung om.

¹² Na manuca te laithae neh dum boeh, na paya khaw amah te tlam te saii boeh.

¹³ Laithae boeih tah ngaih loengloeng boeh, te bang khoboe kah a thaih tah a then ka moenih.

14 A hamca rhoek ngoltunnah khuiah bawlh bawlh tlawk boeh, na thangthui vaengah khaw namah loh koep khoep boeh.

15 Bi rhuh neh, lotawn bi khaw thinah boeh, Te te Khohni long ni a suen coeng.

16 Hlangtholh rhoek kah rhaenghmuen ah khaw thum boeh, amih a thungnah a koe moenih tila poek.

17 Namah te a dangdik hil khaw yalh mai, lailak ham dantatnah tah hmai neh keet ni a om coeng.

A Tloe Neh Tukkainah

18 Paya te khaw tangka la yoi boeh, Manuca tak tah Ophir sui banghui pawn ni.

19 Lungcui neh huta then te hnoo boeh, a muelhtuetnah tah sui lakah ting ngai.

20 Uepom la bi aka bi sal te khaw, a bibi dongah aka tlungmu kutloh hlang te hnaep boeh.

21 Na hinglu loh lungming sal te lungnah saeh lamtah, amih kah a loeihnah ham khaw hloh boeh.

22 Saelhung na khueh atah a then la ngaithuen, na hoeikhangnah hang khuen khuitah a then la khoem.

23 Na ca a noe vaengah na ol a ngai hamla amih te thutuen lah.

24 Na canu te a caeh long ah hlahpham boeh, anih te tongpa rhoek tang lamloh tungaep lah.

25 Canu te vasak sak lamtah bibi tung coeng laeh, tedae anih te tongpa tang taengah mah paeh.

²⁶ Yuu na lungnah te na khueh atah anih te maa boeh, tedae lung na hnoel hlang te namah long khaw tangnah boeh.

²⁷ Na thinko boeih neh na pa te hinyanah lamtah, Na nu kah ca-om bungtlloh khaw hnihl boeh.

²⁸ Amih rhoi loh nang n'cun te poek lah, amih rhoi loh nang m'paek te metlam na thuung thai eh?

²⁹ Boeipa he na hinglu boeih neh rhih lamtah, a khosoih rhoek te khaw hinyah nah lah.

³⁰ Nang aka suenkung te na thaomnah boeih neh lungnah lamtah a bibikung rhoek te khawt sut hnoo boeh.

³¹ Boeipa te rhih lamtah khosoih te hinyah nah, Nang n'uen bangla a taengah buhham khaw thak lah, Thaihcuek neh boirhaem khaw, kutdoe maeh laeng khaw, tholh dawthnah maeh neh hnocim thaih cuek boeih te khaw.

³² Kho daeng hamla na kut thueng pah lah, te daengah nih na yoethennah khaw a cungkuem eh.

³³ Mulhing boeih te moeihoeih la pae, duek khui lamkah ah khaw sitlohnah neh sih boeh.

³⁴ Mikphi aka bo te rhael boel lamtah, Aka uek rhoek taengah khaw nguek puei van.

³⁵ Satlo na hip ham vaengah khaw uelh boeh, te bang khoboe te na lungnah ham om ta.

³⁶ Na saii boeih dongah khaw na hinglung a bawtnah te poek, te daengah ni na tholh pawt eh.

8

Cueih Khueh Lamtah Poek Hueltue

¹ Tha aka om neh khaw oelh uh rhoi boeh, amih kut ah na cungku tarha lah ve.

² Boei nen khaw nen uh rhoi boeh, a khueh tawn loh nang m'payawk ve.

³ Ka aka ang soeh nen khaw tuituk uh boel lamtah, amih kah hmai dongah thing cum pah boeh.

⁴ Saipat la aka om nen khaw hawlthak coeng boeh, na pa rhoek te han soehsal ve ne.

⁵ Tholhnah khui lamloh aka mael ke palawm-nah boeh, mamih he dantat aka yok la n'om te poek.

⁶ Pa tong te khaw hnael boeh ne, mamih khaw patong la n'om uh van ni.

⁷ Hlang a duek vaengah omtoem boeh, mamih khaw n'duek kuekluek ni tila poek.

⁸ Hlang cueih kah olka te hnoelrhoeng boeh, Tedae amih kah ollam nen te namah haam lah. Amih taeng lamkah ni olrhi neh, boei na bi ham khaw a longim na ming eh.

⁹ Patong kah olka te khaw hnalval boeh, amih khaw ana pa rhoek taeng lamlong ni ana cang. Metla na yakming ham khaw amih taeng lamloh cang lamtah, a ngoe vaengah tah ollannah aka pae ham ni.

¹⁰ Hlang tholh rhoek kah hmaili te tok pah boeh, namah te amih khaw hmai sai loh n'hlawp ve.

¹¹ Calthai khaw na kho kungah pai sak boeh, Na ol soah rhongngol bangla n'tangkhuiep ve.

¹² Namah lakah aka tlung khaw hno vat boeh, na vat atah ka sung coeng tila poek laeh.

¹³ Na phanah kah a voel olhlo aih boeh, na hlo coeng atah lai na sah ham rhuengphong laeh.

¹⁴ Laitloekkung taegkah olkhueng te khaw paan boeh, A oltloek long te amah kolo taengah ni a pai hae eh.

¹⁵ Kuvit neh khaw yin la cet hmaih boeh, amih te nang taengah hnorhih lam ni a om eh. amamih ngaih bangla om uh vetih tih, amih kah anglatnah loh namah m'poci ni.

¹⁶ Thintoi te hnueih hamla rhut boeh, amih te khopong ram ah yin la caeh puei boeh. Thii a long khaw amih ham tah a poeyoek lam ni a ngai, Te dongah na kut dongah bomnah a om pawt vaengah, namah te mat m'boh uh ni.

¹⁷ Hlang ang nen khaw dawt uh rhoi boeh, amih loh olhuet a phah uh thai hae moenih.

¹⁸ Olhuet la khoem ham aka om te tah, hlang lak kah mikhmuh ah khaw sai boeh, amih loh metla n'yan ham khaw na ming moenih.

¹⁹ Na poeknah te hlang taengah khaw phoe tarha boeh, na omngaihnaah te voek na vai lah ve.

9

Yuu Kawng neh Thuituennah

¹ Na rhang dongkah na yuu te khaw ngaihoih boeh, namah kah nganboh la boethae te n'cang puei ve.

² Hu tang dongah khaw na pum pae aih boeh, na thadueng nah han suntlae ve ne.

³ Yalpo nu taengah khaw rheap cet boeh ne, anih khaw hlaeh dongah na cungkue ve.

⁴ Laa sa nu nen khaw omthen rhoi boeh, a thailatnah lo nang te n'tu ve.

⁵ Oila nu khaw rhap so aih boeh, na paloe vetih anih ham te lai na hmuh ve.

⁶ Pumyoi taengah na pum te pae boeh, na koerhang te boeih na hlong lah ve.

⁷ Khopuei longpuei ah a hnukhmai la mael boeh, khosoek vang khuiah khaw dongpoeng boeh.

⁸ Na mik te aka phuekhlak nu taeng lamloh hoi lamtah, hlang taengkah sawthennah dongah mik-e boeh. Huta sakthen loh muep a yoek uh coeng tih, a lungduek loh hmai bangla a kolh uh coeng.

⁹ Hlang yuu taengah khaw buh va loeng boeh, Yu kungah khaw anih taengah nul boeh. Na thinko te anih taengla hoi uh vetih, thii loh pocinah khui la n'doek ve.

¹⁰ Paya rhuem rhoek te hnoo boeh, a thai rhoek khaw amih te a tluk moenih. Paya thai he yunoe bangla om tih, a ham daengah ni a naep la na ok thai.

¹¹ Hlang tholh rhoek kah a hoeikhangnah khaw nai boeh, a hmailong metla a om ham khaw na ming moenih.

¹² Lailak rhoek kah omthennah dongah khaw moo boeh, a khosaknah boeih te a langya la om hae mahpawh tila poek.

¹³ Hlang ngawn ham thaomnah aka khueh taenglam loh soei khoem uh te daengah ni dueknah rihannah loh nang te n'huek pawt eh. Amih te na paan khoem atah a hlonah sai boeh, namah kah na hingnah vik hang rhawt uh ve.

14 Na coeng thai khui boeih neh, na imben te ming ham maetaengah khueh lamtah, hlang cueih neh dawtletnah khueh lah.

15 Na voemtoeinah boeih te pilnam lungming taengah om saeh lamtah Na oltloeknah boeih khaw Khohni kah olkhueng dongah om saeh.

16 Duengnah he na hlaembuh aka vaelpuei rhoihui la, Boeipa rihnah te na thangpomnah la om saeh.

Ukkung Rhoek

17 Bibi he tah kuthai kah thoemnah aka koeh la om, te dongah pilnam mawtkung longtah a ol te a cueihnah neh cak sak saeh.

18 Ol aka pap te khopuei ah khaw a rih uh tih, olcal savek la aka om khaw a thinah uh.

10

1 Aka cueih laitloekkung loh pilnam a cueih sak tih, lungming hlang kah uknah long tah a then bueh a om sak.

2 Pilnam laitloekung kah a om bangla a bibikung rhoek khaw om uh van. Khopuei ukung kah a om bangla vangca rhoek khaw om uh van.

3 Manghai kah a pam loh a pilnam a po sak tih, Ukkung rhoek kah yakmingnah long ni khopuei khaw thuep a naep sak.

4 Diklai kah uknah he khaw Boeipa kut ah om tih, a tuetang ah mawtkung then a khueh.

5 Hlang a cungphoeknah khaw Boeipa kut ah om tih, Amah long ni olkhueng paekung khaw thangpomnah a paek.

Koevoei Tholh

⁶ N'thaenah takuem ah khaw na imbem teangah thintoek khueh boeh, mangkhak khoboe te khaw thungnah khueh boeh.

⁷ Thinlen he Boeipa ham khaw hlang ham khaw thinnah la om tih, Khoboe paihaehnah khaw long khaw bok a toeh.

⁸ A sangnah khaw namtom lamloh namtom taengah a pak te paihaehnah, thinthahnah, dongkah khuehtawn dongah ni.

⁹ Metlae laipi neh hmaiphu khaw a koevoei thai, Hlang hing pum he a hing li vaengah mah hmawn coeng ta.

¹⁰ Aka tlo khing te siboei loh a yuh yam, tihin kah manghai khaw thangvuen ah duek hae ni.

¹¹ Hlang he a duek phoeiah tah anih long te, aekrhit neh, sahk neh, phol ni a pang.

¹² Hlang kah koevoeinah a tongnah he tah, Boeipa hnawtnah ham ni a om coeng. A thinko khaw anih aka saikung taeg lamloh nong coeng.

¹³ Koevoeinah a tongnah he tah tholhnah ni, Te dongah konawhnah a lun nah kungla cet. Boeipa loh amih te a yaak mueh citcai neh a hawk thil tih, a mih te boeih a thup.

¹⁴ Boeipa loh boei rhoek kah ngolkhoel khaw a palet tih, tlayae rhoek te amih ngolhmuen ah a ngol sak.

¹⁵ Boeipa loh namtom rhoek kah a yung khaw a phil tih, kodo rhoek te amih kah hmuen ah tloep a phung.

¹⁶ Boeipa loh namtom kah khohmuen te khomepong la a khueh tih diklai khoengim duela a mih te a phae.

17 Amih te a khoe tih a mih a thup vaengah, amih poekkoepnah te diklai lamloh a phaeh.

18 Koevoeihnah he hlang hing hamla sai pawt tih, kosi hongnah khaw huta kah a cun rhoek ham bal moenih.

Thangpomnah Neh Aka Ting

19 U casak nim tah thangpomnah neh tiing pai, hlang casak rhoe pai ni te. U casak nim tah hinyahnah ham koih tloe pai, Amih tah Boeipa aka rhih rhoek pawn ni. U casak nim tah thangpomnah neh tiing pawh, Anih khaw hlang casak bal ni. U casak nim thangpomnah neh ting pai pawh, amih tah olpaek aka poe hlang rhoek pai ni.

20 Imkhui lung ah khaw mawtkung tah thangpom tueng, tedae Boeipa aka rhih tah a mikhmuh ah thangpom ham tueng.

22 Boei khaw, hlanglen khaw, khodaeng khaw, Boeipa rhihnah he ni amih kah thangpomnah la a om.

23 Khodaeng siteo cakhaw lungcwei hlang tah hnaep ham moenih, tholh aka khueh hlang thangpom he khaw a rhoeprhui bal moenih.

24 Mangpa khaw, laitloekkung khaw, khoboehi khaw hinyah ham tueng, Tedae amih te Boeipa aka rhih hlang lakah a len moenih.

25 Sayalh kah khosa long tah aka cueih tueihyoeih a bi vetih, lungming hlang te khaw kamkaih uh mahpawh.

Tlayaenah Kawng

²⁶ Bi na saii vaengah na cueihnah tueng ham saii boeh, na ngoenah a om vaengah khaw hoem boeh.

²⁷ Buh vawt neh aka hoem hlang lakah tah, a then aka yet bibi kung he then ngai.

²⁸ Ka ca, namah te tlayaenah neh thangpom, namah a tingtawk la namah kueinah uh.

²⁹ Amah aka boe coeng te tah u long a tang sak eh? Amah hliphen uh coeng atah u long anih a thangpom eh?

³⁰ Khodoeng he a mingnah loh a thangpom tih, Boei khaw a khuehtawn long ni a thangpom mai.

³¹ Khodaengnah khuiah khaw a thangpom hlang tah bahoeng a khuehtawn ngai coeng tih, A boeinah khuiah mingthae aka phuei hlang tah, Bahoeng khodaeng tangkik coeng.

11

Suisak Thailatnah

¹ Tlayae kah cueinah long tah a lu te a sang la a dangrhoek pah tih, amih te hlang len lakli ah a ngolhmuen sak.

² Hlang te a sohman kah sawt then neh koeh boeh, a sohman kah suisak nen khaw konawh aih boeh.

³ Khoi he aka ding mulhing khuiah yitkoek mai dae, aka oi khuikah a then koek hno he a saii.

⁴ Himbai then na bai nen khaw koevoei uh boeh, nang n'thangpom vaengah khaw pacuet uh boeh. Boeipa kah bibi he khobae rhambae la om tih, a bibi he hlang taeng lamloh vik a phah ta.

⁵ Diklai khaw diklai la muep ngol uh coeng tih, a poek mueh ah rhuisam aka khuem khaw muep om.

⁶ Uuking rhoek khaw yah a poh uh tangkik coeng tih, a thangpom te khaw hlang tloe kut ah a paek coeng.

Buelhmaih La Khosaknah

⁷ Na cae hlanah tah a tholh tlap boel dae, nuemnai lamhma lamtah kamkaih ne.

⁸ Na hnaton hlan ah doo boeh, A tloe loh ol a thui vaengah rhol boeh.

⁹ Nang neh aka tu uh pawh olka te oelh boeh, hlang tholh rhoek kah laithuinah khuiah ngol boeh.

¹⁰ Ka ca ol kak neh bi te haam boeh, na suvainah a yet vaengah coelcanah om mueh mahpawh. Na hloem cakhaw na kae hae pawt vetih, na yong cakhaw na loeih hae mahpawh.

¹¹ Aka bi khaw, aka thingthuel khaw, aka tamto khaw om, tedae a ngaihna ni muep a pung hae.

¹² Thoh hawng neh bomnah aka ngoe khaw, thadueng aka vawtih tih khodaeng aka tlung khaw om. Tedae Boeipa mik long tah amih te rhennah neh a sawt, Amih te a tlayaenah hmuen lamloh a dangrhoek.

¹³ A lu te a dangrhoek uh dongah a yet long khaw a ngaihman uh.

¹⁴ Hno then neh a thae khaw, hingnah neh dueknah khaw, khodaeng neh boei khaw Boeipa taeng lamkah ni a thoeng.

15 Cueihnah neh yakmingnah khaw, olkhueng mingnah khaw, Boeipa taeng lamkah ni. Lungnah neh bibi then kah longpuei he khaw amah lamkah ni,

16 Tholhniknah neh a hmuep he khaw hlangtholh neh a suen tih, boethae he tah laithae la aka hoemdam neh hmaih patong.

17 Boeipa kah kutdoe he aka cuep taengah tah nguel tih, a kolonah he khaw a yoeyah la khophoeng a pha sak.

18 Hlang khat he a ckinah, luthutnah neh boei, he ni anih ham khaw thangpang la a dang van.

19 “Duemnah ka hmuh coeng tih, ka khuehtawn dongah khotue ka saii pawn ni,” a ti. Tedae meyet a om ham khaw a ming moenih. hlang tloe hamla a hnoo pah vetih ni a duek eh.

20 Na olkam dongah pai lamtah a taengla mop, na bibi dongah khaw patong hil ah rhoeng puei.

21 Hlang tholh kah bibi dongah kopoekrhah sak boeh, Tedae Boeipa dongah pangtung lamtah na bi te khuituk. He he Boeipa mikhmuh ah yoeikoek mai, Kikalh rhuet ah khodaeng te boei la tlek a saii ham khaw.

22 Boeipa kah yoethennah tah hlangcuem kah thapang la om, tedongah Pathen loh yoethennah nolnol a long sak.

23 “Balae ka ngoe bal pueng tih, banglae koep a hoeikhang bal pueng eh,” ti boeh.

24 “Ka rhoeh van coeng tih, mebang tlohlah lae halo bal pueng eh,” ti boeh.

25 Khobuh hnin ah tah patangpalai a hnilh tih, patangnah hnin ah tah khobuhnah khaw poek pawh.

²⁶ Dueknah hnin ah tah a khoboe tarhing la thung ham te, Boeipa taengah yoeikoek mai ne.

²⁷ Khonoek khat kah citcai loh hnukbuet kah hmaenah a hnilh sak tih, Hinglung a bawtnah long khaw a khoboe a phoe sak.

²⁸ Hlang a duek hlanah uem om ti boel daeh, Metla a bawtnah long ni hlang te a phoe pueng.

Paya Khaw Ngaithuen Lah

²⁹ Na im khuila hlang tom khue tarha boeh, laithae neh thailainah he muep om.

³⁰ Aibaem dongah varhung a koei bangla, a oek uh kah lungbuei he khaw om tih, na vawtthoeknah te rhalyuep bangla a dawn.

³¹ Maehtawt bangla rhongol uh tih a then khaw a thae sak, A tuengta kah pongthohnah khaw thae a pak thil uh.

³² Hmai hli loh hmai alh muep a dom tih Hlang tholh khaw thii long sak ham rhongngol uh.

³³ Hlang rhalawt rhoek te ngaithuen, amih te a thae ni a poek uh a yoeyah la na ming then te ham poeih uh ve.

³⁴ Hlang lak te na im la na khuen dae, nang hamla lai hang kaw k hae vetih na imkhui ah namah te yin hlang na ng'khue ve.

12

¹ Hnothen na saii vaengah u ham na saii khaw ming te daengah ni na khoboe then soah nang n'uem uh eh.

² Hlang cim ham a then saii pah, nang te n'thung bitni, amih long n'thung pawt cakhaw, Khohni loh n'thung bitni.

³ Boethae neh aka nok uh taeng lamloh hnothen thoeng pawt tih Kutloh aka khueh pawt taeng lamkah khaw halo moenih.

⁴ Hlang cim tah pae lamtah hlang tholh te bom boeh,

⁵ tlayae ham hnothen sai pa lamtah lailak rhoek te paek boeh. A buh khaw hloh pah lamtah amih taengah pae boeh, te nen te namah lai n'haep ve. Amih hamla hnothen na saii boeih soah rhaepnit la boethae muep na yook ve.

⁶ Khohni long khaw hlang tholh a thiinah tih, lailak soah khaw dantatnah a yok sak.

⁷ Boethen hlang tah pae lamtah hlangtholh te bom boeh.

⁸ Khuehtawn vaengah tah paya tang khaw mingpha pawt tih, citcai tue vaengah tah rhal te thuh uh mahpawh.

⁹ Khuehtawn dongah tah thunkha khaw paya poeh, khodaeng vaengah tah paya pataeng vik hma.

¹⁰ Na rhal te uepnah loengloeng boeh, a boethae te rhohum dongkah tui-aek banglam ni a om.

¹¹ Tlayae neh kunyun doela cet sitoe cakhaw, a taengah ngaithuen lamtah namah khoembael uh. Anih te hmaidan a met tangtae bangla om cakhaw, thi-aek boeih a cing pah moenih ne.

¹² Anih te na hnuk ah khueh boeh, namah m'palet vetih na hmuen hang hul ve. Na bantang kut ah khaw anih te ngol sak boeh, na ngolkhoel rhawt hamla m'vuet ve. A tloihsoi ah ni ka ol he oltak la na poek vetih ka ol thui loh dan n'tah pueng eh.

13 Rhul aka bi thai long khaw amah a tuk daengah ni khohong ramsa taengla rheap aka cet rhoek te lungma a ti pueng.

14 Hlangtholh neh a yok uh hlang neh, hlang tloe kah tholnah dongah aka thum loh lungma a ti moenih.

15 Kilkalh ham tah nang taengah pai cakhaw, na paloe koi nih nang taengah om mahpawh.

16 Na rhal te a hmui nen tah didip la cal suidae, a thinko ah nang te tangrhom ah tulh ham a mangtaeng. Na rhal te a mik dongah mikphi bo mai cakhaw, a tuetang then a dang vaengah tah na thii te hah mahpawh.

17 Yoethae loh m'pai thil vaengah anih te lamhma la phoe vetih, aka bom lalah la nang te n'tangkuep ni.

18 Te vaengah lu muep a thuk vetih kut a paeng ni, muep caitawk vetih a maelhmai te a tang la phoe ni.

13

Huitai Kawng

1 Lungpaat aka ben hlang boeih te a tii loh a koelh, Te dongah hlang hoem neh aka yok uh khaw amah moek.

2 Hno a rhih aih khaw namah hamla thuek boel lamtah, namah lak aka tlung aka boei ngai nen khaw yok uh boeh. Me tlam lae ampul neh thi-am te a benbo uh thai eh? am rhoi te duel uh vetih rhek hae ni ta.

3 Boei long tah boethae a koel lalah khaw tholh la nawt pawh, Tedae khodaeng tah hlang khoboe

a yok vaengah pataeng rhenbihnah nen ni a koep.

⁴ Anih te na hnonah sitoek cakhaw, boei long tah namah n'yoop vetih na ngoengaihna a om vaengah namah te n'hnoo ni.

⁵ Bet na khueh vaengah tah nang taengah om vetih olupung muehla na khuehtawn te boeih han caep ni.

⁶ A ngoe vaengah tah nang te n'thainah vetih, na taengah cuepcuep a nuei doela nang n'thaphoh ni. Dingsuek la nang m'voek vetih, "Balae na ngaih dae?" a ti ni.

⁷ Butui antui neh nang n'kop vetih voeinit voeithum la nang te n'caep ni, a hnukkhueng tah nang taengah nuei ni.

⁸ Longhmang la m'mawt pawt ham ngaithuen na omngaih li vaengah khaw kunyun laeh.

⁹ Hlang rhoei long n'khue vaengah khaw cue uh, te daengah ni tlektlek n'khue eh.

¹⁰ Loloh mop uh boeh nang te hnuenah ve, cakdawk la pai aih boeh nang te vik n'hnilh ve.

¹¹ Anih neh vanat la om ham khaw cai boeh, olthui a sen te khaw tangnah boeh. Puet a cal nen te nang n'noem cai vetih cuep a nueih vaengah nang te n'khe ni.

¹² Ngukngak long tah na olhuep te tuem pawt vetih, nang ngawn ham neh thong hlak ham khaw m'hmaai mahpawh.

¹³ Namah dawn uh lamtah rheap ngaithuen, na cungkunah ham ni na pongpa coeng te.

¹⁴ He ol he na yaak vaengah tah, na ih neh na thoh ah khaw, Na hing khui boeih Boei pa

te lungnah lamtah Na daemnah hamla amah te khue.

¹⁵ Mulhing boeih loh amah bang te a lungnah tih, hlang boeih long khaw a imben te a lungnah rhuem.

¹⁶ Hlang hing boeih khaw amah hui neh yok uh tih, pilnam khaw amah mih bang van ni tih a ben uh.

¹⁷ Metlam la uithang neh tuca te benbo benpang, hlang cim neh hlangtholh aisat te savisava.

¹⁸ Ui neh pongui laklo ah rhoepnah koe om a? Te dongah boei neh khodaeng rhoep uh thai aya?

¹⁹ Khosoek kah khohong marhang he sathueng kah maehham la poeh tih, khodaeng khaw boei rhoek kah buhham la poeh.

²⁰ Tlayaenah te koevoeinah loh a tuei tih, khodaeng khaw boei loh a tuei.

²¹ Boei tah a cungdo vaengah a paya loh a duel, tlayae tah a cungkung vaengah a paya loh phawn a tulh.

²² Boei tah paloe koinih ka hlawt ham khaw muep a caeh pah tih a hong a thui akhaw boeih a tang sak uh. Tlayae tah a paloe vaengah amah te a hnael uh tih, oltang a thui akhaw a hnakaeng pa uh pawh.

²³ Boei te a cal vaengah tah hil boeih a phah uh tih a olthui te khomai so duela a pacuet uh. Khodaeng tah a cal vaengah, “U long nim a ngaih pah van” a ti uh. Te dongah paloe mai cakhaw hnap a talh uh.

²⁴ Boei he khaw tholhnah lamloh a cue uh atah then ngawn, khodae khaw lailak kah poeknah a hing tah thae coeng.

²⁵ Thae cakhaw, then bala mai cakhaw, thinko kah long he maelhmai ah a phoe sak.

²⁶ Lungbuei omngaih kah miknoek tah maelhmai ah hlampan tih, Laithae kah thuidoeknah long tah kopoeck a tloh sak.

14

¹ A hmuilai aka vikvawk soeh pawt tih, tholhnah dongah yut-loeihnah yok pawt ham aka ngaih tah a yoethen.

² A thinko loh amah aka boe sak pawt tih, a ngaiuepnah dongah tha aka thae pawt tah a yoethen.

Khuehtawn Hnonah Kawng

³ Boeinah he khaw kopoeck aka talh hlang ham a rhoep moenih, moeithae loh khuehtawn balae a ti nah eh?

⁴ Amah a huek uh te khaw hlang ham ni a tung pah, te dongah anih kah koerhang te pang a bok nah ni.

⁵ Amah ham pataeng a hnaih atah, u lae anih taengah moei aka hoeih eh? Boei sitioe cakhaw a kohoe hae mahpawh.

⁶ Amah taengah moei aka thae lakah aka thae he a om moenih, he tah amah kah moeithaenah sokah dantatnah pawn ni.

⁷ A then a saii takuem ah boethae khaw tuek a nuen pah, a bawt ah tah a moeithae te ni khoeng a yan.

⁸ Moeithae he hlang thae rhoe ni, voelh hoi uh tih pilnam te a hnoel a rhoeng.

⁹ Halhka ka a mik tah a maeh ham soah a ngaikhuek ti pawh, Te dongah halka long he hinglu ni a rhae sak.

¹⁰ Moeithae loh a buh khaw a hnaih dongah a caboeih khaw kaksap la a khueh.

¹¹ Ka ca, na coengnah tarhing he hnothen neh phaep uh, Boeipa taengah nawnnah te khaw a koihnih la pae.

¹² Dueknah he tah a koe moenih nih tila poek. Te dongah Saelkhui kah kah oltloeknah khaw n'tueng hlan.

¹³ Na duek hlanah na paya ham a then saii pah, kut yueng lamtah na coeng thai khuiah anih te doedan lah.

¹⁴ Hnin at kah kohoenah dongah namah poeih uh boeh, boethen la doe na ngaih kah buhham te khaw hlong boeh.

¹⁵ Na thakthae kah a thaihtae te hlang tloe ham caeh tak hae mahpawt nim? Te dongah thakthae neh na vawthai dueng khaw Taelcung neh tael uh thae hae ni ta.

¹⁶ Pae lamtah, lo lamtah na pum khaw dom mai dae Saelkhui ah pangdoknah pakhat long khaw a hmuh moenih.

¹⁷ Mulhing boeih he himbai rhuem bangla om coeng, a rhuem lamkah oltloeknah long nah, “Na duek kuekluek ni” a ti.

¹⁸ Thing phung dongkah a hnah a bu bangla a hlip loh a floe soah a huep. Te dongah thii neh pumsa kah tiingan la aka om tah pakhat a duek vaengah pakhat tloep thaang.

¹⁹ Bibi boeih khaw hmawn vetih aka om ham khaw muei ni, te te aka saii khaw amah te nen te khum ni.

Cueihnah Dongah Omngaihnah

²⁰ Cueinah neh lungming poeknah aka thuep tah a yoethen.

²¹ Anih long tah a lungbuei khosing neh, a huep kah te khaw a boelh.

²² Cueihnah te sayuep bangla a vai tih, a namtlak ah a mah.

²³ Bangbuet longah a dawn tih a thohka ah a hnaton.

²⁴ A im taengah a rhaeh thil tih, a pangbueng dongah hlingcong khak a khing.

²⁵ Cueihnah taengah dap te a tuk, Te dongah impah hmuen khaw a then tloe a dang.

²⁶ A ca rhoek te a hlipkhup ah a khueh tih, a thingbu hmuiah duemdong coeng.

²⁷ Kholing vaengah khaw a khuiah ying tih, thangpomnah lakli ah kho a sak.

15

¹ Boeipa aka rih long tah he ni a saii eh, Tedongah olkhueng aka pom long tah cueihnah a dang ni.

² Cueihnah tah anih aka doe a manu bangla a caeh pah vetih, anih te yulokung cadong bangla a doe ni.

³ Cueihnah loh anih te cangnah buh a tuh vetih, anih te cueihnah tui ok hamla a paek ni.

⁴ Anih tah cueihnah dongah hangdang vetih bung mahpawh. Anih te cueihnah dongah pangnal vetih yah pok mahpawh.

⁵ Cueihnah loh anih te a hui soah a pacuet vetih, hlangping lakli ah khaw a ka a ang ni.

⁶ Anih tah kohoena nah omngaihna rhuisam a hmuh vetih, dungyan kah ming then te khaw a pang ni.

⁷ Hlang ang loh cueihna te dang pawt vetih, hlang tholh loh cueihna te hmu mahpawh.

⁸ Cueihna tah mangkhak taeng lamloh lakhla vetih, laithae khaw cueina loh a poek mahpawh.

⁹ Hlangtholh rhoek kah hmuilai ah koehna khaw cuen pawh Amih te boeipa taeng lamloh han tui pai moenih.

¹⁰ Cueina dongah koehna khaw thoeng pai saeh, Te dongah Boeipa long ni thuep naep sak saeh.

Sayalnah

¹¹ “Ka cungkuna ham Boeipa loh a saii,” ti boeh. A thina hno te a saii moenih.

¹² “Amah loh kai khohmang la m'mawt,” ti boeh, Tholh he a ngoena a om moenih.

¹³ Boeipa loh konawhna boeih he a thina, te bang te amah aka rih loh a lungna moenih.

¹⁴ A tongcuk kah hlang a suen vaengah te te ana om coeng, sayalh la tuck thaina khuih ni hlang te ana khueh.

¹⁵ Na tuck coeng tah olpaek te khaw na tuem thai van vetih, Sayalh la tuck thaina olka dongah uepom la na saithani ni.

¹⁶ Nang hmai ah tui neh hmai khaw a khueh, mebang na tuck ham akhaw na kut yueng laeh.

¹⁷ Hlang takuem kah hingna neh duekna soah pakhat rhip loh a tuck bangla a paek bitni.

¹⁸ Boeipa kah cueihnah tah len tangkik, a thaomnah khaw khuet tih a cungkuem a hmuh thai.

¹⁹ A mik te amah aka rhih taengah a paelki tih, hlang kah pongthohnah boeih a ming.

²⁰ Pakhat khaw halang hamla ol a paek moenih, te dongah pakhat khaw tholh saithainah a paek moenih.

16

Hlangtholh Soah Pathen Kah Toelnah

¹ Camoe yoka te muep ngaih boeh, lailak cadil soah khaw kohoe sak boeh.

² Amih te a ping mai akhaw amih te uem boeh, amih khuiah Boeipa aka rhih a om hae pawt atah.

³ Amih kah thingthuelnah dongah pangtung boel lamtah, a hlangmi dongah khaw hangdang poeh. Pakhat he khaw thawngkhat lakah then thai tih, lailak ca khueh lakah tah cakol la duek he then ngai.

⁴ Rhung tue pawt ah na nguek uh hae vetih, buengrhuet a hmata uh te ni na ming hae eh.

⁵ Ka mik loh te bang hno te muep a hmuh coeng, he lakah langya ngai hno khaw ka hna loh a yaak coeng

⁶ Hlangtholh rhoek tingtunnah he tah hmai hluap banghui la om, Altha namtu taengah khaw kosi rhong ni.

⁷ Amah kho khosuen hlangtlung khaw khodawk a ngai moenih, amih te a tlung neh boe a koek uh dongah.

⁸ Amah loh Lot kah imben rhoek khaw a hnaih moenih, amih kah a thilen te a tuei dongah.

⁹ Namtu a cungku soah khaw lungma a ti voel moenih, Amih kah tholhnah te a toeng uh pawt dongah.

¹⁰ Rhalkap thawng ya rhuk te khawm ta a thinthah neh a tingtun uh dongah ni a phae.

¹¹ Thinthah hlang pakhat khaw om mai tih, dantat mueh la om koinih tih khobae rhambae la om ni. Boeipa taengah rhennah neh kosi khaw om, amah loh a rhen thai bangla kosi khaw a hong thai.

¹² A rhennah bangla a phaepnah khaw len bal Hlang he a khoboe tarhing ah lai a tloek.

¹³ Hlang tholh he kutbuem nen khaw loeih pawt vetih, Hlang cim kah uehnah te khaw hnawt bal mahpawh.

¹⁴ Rhennah bibi boeih soah a hmuen a khueh tih, pakhat rhip loh a khoboe tarhing ah a doe.

¹⁵ Boeipa loh Pharaoh thin a len sak tih amah te hmat pawh, Tedae vaan hmuiah tlungthang la bi a bi ngaih dongah ni.

¹⁶ A sitlohnah he tah a saihluen boeih teaengah tueng tih, a rhilam rhui neh khoyin kothaih khaw boeih a rhi.

¹⁷ “Boeipa taeng lamloh ka thuh uh coeng, hmuen sang lamkah u long nim a lungbuei ah kai n'khueh eh. Pilnam te yet lakli ah u long kai m'ming, saihluen toeklek na mueh kai he bang lam ka om?” ti boeh.

¹⁸ Anunae, vaan neh vaan sosang aih, tan-grhom dung neh diklai khaw, Boeipa loh a hip vaengah tah thuen uh coeng.

19 Tlang neh diklai khoengim khaw, liva neh lingluei khaw a so lamloh a sawt coeng.

20 He a lungbuei neh aka pha hlang a om moenih, a khosing te uh long a thui thai lek eh?

21 Hli thae te aka hmuh thai a om pawt bangla, a bibi khaw a kum ngai tah boeih a phah oeng.

22 A khoboe tiktamnah te thui hamla unim aka om tih, te rhoek te u long a rhing thai pai eh? A oltloek he tah bahoeng hla rhoe pai ta.

23 Te rhoek te yakingnah aka voei rhoek kah poeknah ni kotalh neh longphaelh hlang kah poeknah tah hlang ang ni.

Suencuek Dongkah Pathen Cueihnah

24 Ka ca aw hnaton lamtah mingnah la lo lah, ka ol he rheap hnaton ham pae lah.

25 Thuituennah he tluektluek bitni, Te dongah mingnah he phekphek thui.

26 A tongcuek lamkah a bibi dongah Boeipa loh a suen Te a saii vaengah a rhimong khaw a suem coeng.

27 A bibi te dungyan kah olkhueng neh a soepsoei coeng, a uknah he khaw cadilcahma boeih ham pawn ni. Amih te ponghalh uh pawt tih tawnba uh pawh Te dongah a hmakhuen khaw toeng uh pawh.

28 Amih te pakhat loh pakhat kalthalh la nen pawt tih, amih te Boeipa ol te aek uh tlaih pawh.

29 Te vaengah Boeipa loh diklai a sawt thuk coeng, Te dongah amah kah hnothen nen khaw a baetawt sak.

³⁰ Diklai he mulhing hui boeih neh a thing tih, Te rhoek khaw diklai la mael uh.

17

¹ Boeipa loh hlang hing diklai lamloh a suen tih, amih te diklai la koep a mael sak.

² Amih te a khohnin khaw rheap a khueh pah coeng, Tedae diklai dongah cungkuem boeih soah saithainah a khueh pah.

³ Amih te a khuiah amah bangla thaomnah a khueh pah tih, amih te amah mueiloh la a suen.

⁴ Amah loh mulhing boeih kah ko khuiah hlang rhihnah a khueh pah, Ramsa neh vaa soah uknah khaw hlang taengah a paek.

⁵ Te rhoek loh Boeipa loh yaknganah panga a paek, a parhuknah dongah tah hmatthainah, A parhihnah dongah a thuicaihnah ham mingnah a paek.

⁶ Hlang taengah boesoepnah, lai neh mik khaw, hna neh poeknah ham lungbuei khaw a paek.

⁷ Hlang dongah mingnah neh yakmingnah a bae sak tih, a thae neh a then khaw a tueng.

⁸ Boeipa rhihnah he amah loh hlang thinko ah a khueh pah, A bibi dongkah a khuetnah te khaw hlang a hmuh sak coeng.

⁹ A mih loh a cuennah dongkah a ming cim te a koeh tih, ¹⁰ a bibi aka nguel coeng te khaw phong uh saeh.

¹¹ Amah loh hlang soah mingnah te a up tih, hingnah olkhueng te a yo sak.

¹² Amah loh hlang taengah dungyan paipi a sai tih, A taengah a oltloek te a phoe pah.

13 Hlang mik loh Boeipa kah a boeimang thangpomnah a hmuh tih, a hna long khaw thangpomnah ol te a yaak coeng.

14 Hlang taengah, "A thae boeih te ngaithuen," a ti nah. Te dongah a imben kawng dongah khaw olpaek te rhip a paek.

15 Hlang kah longpuei teh Boeipa taengah phoe yoeyah, te dongah a mikhmuh lamloh thuh uh thai pawh.

16 A camoe lamkah a khoboe rhoe mah a thae la hoi uh coeng, a thiko lungto bangla aka ning te khaw, ngasen lungbuei la a coeng sak uh thai moenih.

17 Amah loh namtom boeih kah ukkung a khueh, Tedae Israel tah Boeipa amah kah hamsum la om.

19 Amih kah bibi te Boeipa mikhmuh ah khomik bangla phaeng tueng. Amih kah khoboe Boeipa mik dongah boeih om.

20 Amih kah boethae boeih te Boeipa hmuh ah a thuh tloel, Te dongah amih kah tholhnah tah Boeipa taengah phoe.

21 Boeipa amah tah a then dongah Amih te metla a suen khaw boeih a ming tih hnawt mahpawh, Voei bal pawt vetih amih te a rhen bal pueng ni.

22 Doedannah aka khueh tah Boeipa taengah, kutbuen kutnoek bangla om tih. A sitloh hlang te tah a mik dongkah thaihthawn la, amah loh loh a khoem a bael ni.

23 Te phoeiah amih te a thoh vetih a thung pueng ni, Te vaengah amih tholhphu te amih lu soah a tloeng pah ni.

24 Te cakhaw aka yut rhoek tah a taengla a mael sak tih, Ngaiuepnah aka bawt rhoek khaw koop a hloep.

Yutnah Ham Khuenah

25 Boeipa taengla mael lamtah na tholhnah te voei laeh, a mikhmuh ah thangthui lamtah na khoboe khaw hlawt laeh,

26 Khohni taengla mael lamtah boethae lamloh mael laeh, Amah loh a tuei te tah thinah saloel laeh.

27 Saelkhui ah u long Khohni koehnah a sak vetih, mulhing rhoek kah a hmuen ah u long a uem eh?

28 Duek lamkah he tah aka om mueh taengkah bangla uemnah he khaw paltham mai ta. Aka hing rhoek long tah Boeipa koehnah khaw a then la a sak.

29 Boeipa kah rhennah neh a taengla aka mael rhoek ham, khodawkngainah he len tangkik rhoe pai.

30 Hlanghing kah a noengnah he a cungkuem moenih, te dongah hlanghing puet aka nguel la om pawh.

31 Khomik lakah balae aka sae bal voel? Te pataeng hmuep pueng ta. Pumsa neh thii aisat he boethae long la a hmil.

32 Boeipa tah vaan sosang kah caempuei rhal-boei ni. Tedae hlang hing boeih tah laipi hmaiphu la om.

18

Pathen kah a Khuetnah

¹ Yoeyah la aka hing mah loh lunglai boeih a suen, Boeipa bueng ni tiktam la aom.

² A kut dongkah canghloeng neh diklai a kilh, Te dongah cungkuem loh Boeipa ol te a ngai.

³ A thaomnah dongah hno cungkuem kah manghai la om tih, A cim boeih te a tihnai khui lamloh a paek a boe.

⁴ A bibi te doek hamla u khaw thaomnah a paek moenih, U long khoboe aka khuet te a thuep thai eh?

⁵ Boeimang thaomnah te u long a nueh thai? A rhennah te u long boeih a tae thai eh?

⁶ Te rhoek te thap neh yueh ham khaw a coeng moenih, Boeipa kah khobae rhambae te tah ham khaw coeng pawh.

⁷ Hlang kah hmakhah la a om vaengah, a tongnah lam ni a om uh. Duem uh coeng a ti vaengah, a lukil uh pueng.

⁸ Hlang he metlam a om ti, amih te metlam a hnonah A khui ah balae a then aka om tih, balae aka thae?

⁹ A hinglung a sen tloe om cakhaw, kum yakhat ni a pha coeng atah khotoe coeng.

¹⁰ Tuitunli kah tui cip neh laivin laivai bangla, kumhal khohnin he tah kum setca mai ni.

¹¹ Te dongah ni amih taengah Boeipa loh a thinsen tih, amih soah a rhennah a lun pah.

¹² Hlang kah a bawtnah he citcai la a om khaw, amih loh a hmuh tih a hmat. Te dongah ni amih taengah khodawkgainah te cungkuem la muep a khueh pah.

¹³ Hlang kah thinphoei lungvat tah imben hambueng la om, Boeipa kah thinphoei lungvat

tah mulhing boeih ham la om. Te dongah amih te a ho tih, a hlinsai tih, a thuituen, Te phoeiah tudawn bangla a tuping te a mael puei.

¹⁴ Amah kah rhilam aka doe boeih neh a khosing dongah aka tlungmu rhoek soah thinphoei lungvat a khueh.

Aka Thuem Doedannah Kopoek

¹⁵ Ka ca, na khoboe then te hohmunnah neh thoek boeh, na kutdoe te khaw ol ling neh poeih boeh.

¹⁶ Kholing kholai khaw buemtui loh a dingsuek sak, Te dongah ol then he kutdoe lakah then ngai.

¹⁷ Ol ding he tah kutdoe then lakah oe ngai, Te rhoi te tah moeihoeih taengah ni m'hmuh.

¹⁸ Hlang ang long tah moeihoeih pawt la a khotoh nah, kopoek thae kah kutdoe loh hlang mik a hmaang sak.

Cuepnah

¹⁹ Na thui hlanah cang lamhma dae, na tloh hlanah na sadingnah te ngaithuen.

²⁰ Laitloeknah a pai hlanah namah nuemnai uh, N'cawh tue vaengah khodawkungainah na hmuh bitni.

²¹ Boethae na puei hlan ah tlayae lamhma dae, Te daengah ni na tholh lamloh na yut thai eh.

²² Olhlo na khueh phetlet vaengah kanghalh-nah om boelsaeh, te lamloh na loeih ham khaw an dueknah hil rhing aih boeh.

²³ Ol na hlo hlanah namah te rhoekbah uh laeh, Boeipa aka noemcai hlang bangla om boeh.

²⁴ Boeipa kah kosi ne dueknah hnin kah hamla poek, Tawnlohnah hnin tah a maelhmai te a hoi pawn ni.

²⁵ Khobuh tue vaengah khokha tue khaw poek, Khuehtawn khohnin ah khodaeng neh vawtvainah khaw poek.

²⁶ Mincang lamloh hlaem duela a hmuethma thovael uh, Boeipa mikhmuh ah a cungkuem he vil khoe uh.

²⁷ Aka cueih tah cungkuem dongah a ngai-huet, Tholhnah loh boeih vael cakhaw, a thae khui lamloh tuem uh.

²⁸ Lungming hlang long tah cueihnah a ming, Te donah cueinah aka hmuh te a koeh uh.

²⁹ Olka aka ming thai tah amah khaw cueih, Te dongah thuidoeknah khaw a tha thai.

Kuemsuemnah

³⁰ Na kongaih te vai boel lamtah, na huengaih te khaw tuem mai.

³¹ Na hinglu te namah kongaih bueng na vai sak koinih, na thunkha rhoek kah nueibu la na om ni.

³² Pangdoknah dongah khaw hmae aih boeh, vaksaknah loh khodaeng la n'khueh ve.

³³ Na sungkoi te a hong la na khueh vaengah tangka pu neh kho na tue koinih, buhbih la na om het mahpawt nim?

19

¹ He tla aka saii hlang tah boei la om mahpawh, a yol khaw aka sawtsit tah a yol a yol ah voevoeh daeng ni.

² Yu neh huta long he lungming khaw kho a hmaang sak, Pумыoi neh aka bol hlang khaw kutvit la poeh.

³ A koerang te yoop neh phol loh a rhawt pah vetih, kutvit hlang te tah boeih a yoop ni.

Cal Suilaih Boeh

⁴ Hlang tloe tlek aka tangnah aih tah kopoek bawn tih, Aka tholh hlang khaw amah ni a tholhdalh sak.

⁵ Halangnah dongah aka omngaih tah boe yoeyah vetih Olka aka tuem hlang dingsuek la kho a sak ni.

⁶ Hlang thet aka thinah hlang tah, boethae khaw yol van ni.

⁷ Olca te koep khoep voel boeh, a cungkuem dongah na sudaeh voel mahpawh.

⁸ Na paya taengah khaw, rhal taengah khaw puen boeh, nang te n'tholh sak pawt atah te te phoe boeh.

⁹ Pakhat long khaw ya koinih nang n'dawn vetih, a tue a pha vaengah tah nang te n'thiinah ni.

¹⁰ Khat khat na yaak te namah taengah duek saeh, Rhal then sak te long te nang n'pook sak mahpawh.

¹¹ Hlang ang loh tah khat khat a yaak vaengah, Huta camoe aka om bangla ca om bungtloh loh a kolek.

¹² Palaa loh hlang phaitu a kah bangla hlang ang khuiah he thetnah ni a om.

¹³ Paya te dawt lah, anih loh saii pawt khaming, a saii oeh tah, koep saii voel boel saeh.

14 Na hui khaw dawt lah, anih loh thui pawt khaming, a thui oeh atah, koep koei voel boel saeh.

15 Paya khaw ol aka saii noek te tah rheap dawt, te dongah na yaak sarhui te boeih tangnah boeh.

16 Hlang a cai muehla paloe thai ta, Olcal aka tholh mueh hlang he a om moenih.

17 Amah te na cawh hlanah na imben khaw dawt dae, Te te Khohni kah olkhueng nen mah laitloek saeh.

18 Boeipa rhihnahtah lunghoihnahtah a kung la om, Te dongah cueinahtah loh Boeipa kah lungnah a dang sak.

19 Boeipa kah olkhueng mingnah long tah Khosaknah a rhimong te a paek tih, Omngaih la aka vai hlang long tah, hingnah thing thai dognah a kohoe.

Cueihnah Taktak

20 Boeipa rhihnahtah cueihnahtah a cuinahtah la om tih, olkhueng soepsak long he cueihnahtah a cung sak.

22 Halang kah mingnah he tah cueihnahtah moenih, hlang tholh rhoekkah cilsuep dongah cuepmueinahtah a om moenih.

23 Te te tueilahtah aka kap cueinahtah la om tih cueihnahtah a vawt coeng tah hlang ang lamni a poeh.

24 Yakmingnah loh vawt dae Pathen aka rhih he tah, Mingnah muep sang tih olkhueng aka phaelh lakah then.

²⁵ Cuei hueltue mai cakhaw a tiktamnah a om pawt atah, Dumlai te na hamla a kolo neh pilnam aka phae la khoeng om.

²⁶ Hlang thae te bakop tih nguekcoi sito cakhaw, A khui ah thailatnah hoengla baetawt.

²⁷ A mael hmai a buenglueng tih hnatun khaw ngaih pawh. Tedae khat long a ming pawt vaengah tah, nang soah lamhma hang hul ni.

²⁸ A thadueng vawt sito cakhaw anih te hlang tholh la khueh, A tuethen a dang atah boethae saii hamla tonga mahpawh.

²⁹ Hlang he a sohman mueimae dongah phoe mai, aka khuel hlang he khaw, maelhmai rhoi a hum vaengah mingpha la om mai coeng.

³⁰ Hlang a nueih cal dongah khaw, a pongthoh dongah khaw, a pueinak dongah khaw u lae tila mingpha mai.

20

Olmueh la Duem Omnah

¹ A tuetang mueh la hlang aka ho khaw om, Tedae kammueh la aka om hlang tah cueih.

² Poi uengkueng lakah khaw ho phetlet khaw hno then pakhat la om van mai.

³ Amah tholh aka ming tah yahpok mahpawh.

⁴ Lunguen doela a then aka saii hlang he tah, tildil hlang loh hula poeih ham a hue neh vai uh.

⁵ Pilnam a ngen duem a om te hlang cueih la om tih, ol aka yet he tah hlang loh a tui.

⁶ Pilnam a ngen tah a thui a om pawt dongah duem om, Te vaengah a ngen tah thui a ming pawt dongah duem om bal.

⁷ A tuengtang buelh a pha hlan atah hlang cueih he duem om, Hlang ang kah a hoem long tah a tuetang then a hlong sak.

⁸ Muep aka cal khaw tuei ham om tih, anaa amah ngaih la aka hnonah khaw thiinah ham om.

Benbo Benpang

⁹ Rhainah khuikah hlang he a hmailong then dae, A cuhunah vaengah tah sungdaeh la a thoeng sak.

¹⁰ Kapaiah he nang ham hoeikhangnah om pawh, kapbaih he tah rhaepnit la thung ham ni a om.

¹¹ Thangpomnah dongah aka palyal khaw om tih, a ngentah a tlayae hmuen lamloh kut a thoh thai.

¹² A ngen loh tangka a yol neh muep a lai, Tedae voei rhih lah koep lai a sah.

¹³ Hlang cueih he ol yol dae lungloeinah kap tih, hlang ang kah olcal thingka tah a poeyoek mai ni.

¹⁴ Hlang ang kah kutdoe nang hamla a hong ni, anih te buhungnah voeirhih la dang ham ni a dan.

¹⁵ A yol a paek nen khaw muep a palawh tih, a ka te konglawng bangla a ang soeh. Tihnin ah hlang a pu tih a vuen ah tlek a suk, Te bang hlang te Pathen neh hlang loh a thiinah.

¹⁶ Hlang ang long tah “Paya om pawh” ka boethen khaw hlang loh uem pawh, ka buh aka ca nawn long khaw olthae la kai n'thui,” a ti ni.

17 Anih te hlang loh meyet hil nim a nueih nah ve. Anih long te a huen hno ni a khueh, amah loh a khueh pawt tetah thae la a thui.

Ohmang

18 Cirhong dongah paloe he hmuilai dongah paloe lakah then. Halang kah a cungkumah tah koeloe phoe,

19 Aka muen hlang he cil aka rhoep pawt neh lo uh, sawt rhoel kah hmuilai dongah ngawn tah bat yoeyah.

20 Hlang hmuilai dongkah thuidoeknah tah a hnawt pah, amah tuetang ah ol a thui pawt dongah ni.

21 Hlang he tholh pawt hamla khodaengnah loh a hoep a tlang, Te dongah a duem vaengah khaw yutloeinah om pawh.

22 Hlang he yahpohnah dongah khaw, hlang kah hinyahnah dongah khaw a hingnah a hlong.

23 Pakhat long tah a yah dongah paya neh ol a khueh, Tedae a hong lai dongah thunkha la a khueh van.

Laithae

24 Laithae loh hlang te thae cakue la a khueh, khungrhap kah hmuilai dongah yawnyawn pha uh.

25 Hlanghuen pataeng laithae lakah tah rhoei pueng, Tedae te rhoi te bok poci ni.

26 Laithae loh mingthae la a mawt yoeyah tih, A khuiah yahyongnah om yoeyah.

THUIDOEKNAH OL

²⁷ Hlang cueih tah a ol loh a banhman sak tih, aka khuel khaw lungloeinah muep a dang.

²⁸ Lai aka yawt long tah canghlom a hmoek, Tiktannah neh lai aka tloeknah kolonah muep a dang.

²⁹ Kolo sai neh kapbaih loh hlangcueih mik a dael sak tih, a toel pawt hamla a kam te khoep a khom pah.

³⁰ Cueihnah a thuh neh hmuh mueh khohrhng, melae a phu aka tlo ngai eh?

³¹ A ang aka khoem hlang he tah, cueihnah aka phah hlang rhoek lakah then.

21

Tholhnah Rhoepsaep

¹ Na tholh coeng nama? Ka ca aw, saii voel boeh. hnukbuat kah tholhnah dongah khodawkungainah bih laeh.

² Rhul taeng lamkah bangla tholhnah te yong tak, tholhnah te na paan koinih namah ni n'ngaeh eh. A no khaw satueng no bangla om tih, hlang kah hingnah khaw a phae thai.

³ Boethae he khaw cunghang rhaepnit bangla haat, a toeh hma te khaw a hoeinah a om moenih.

⁴ Letnah neh yutloeinah loh boei khaw a tal sak, hlang hoem kah impu khaw rhup tal van ni.

⁵ Khodaeng hmuilai kah thangthuinah tah Pathen hna ah kun, Te dongah a laitloeknah khaw koeloe om.

⁶ Hlang tholh kah khokan dongah aka pongpa tah toelthannah te khaw a thiinah. Tedae Boeipa

aka rhih hlang long tah a thinko khui lamloh yutnah a khueh coeng.

⁷ Olthui aka hat khaw duelh thang dae, aka yaknga long tah a ih vaengkah khaw boeih a ming.

⁸ Pilnam kah tangka neh a im aka sa hlang he khaw a phuel hamla lungto aka kuk neh vai uh.

⁹ Hlang ang rhoekkah ngoltunnah tah malpawt bangla om tih a bawtnah ah hmai loh luk a dom mai.

¹⁰ Hlang tholh kah longpuei ah lungto a hmahling a phaih, Tedae a bawtnah ah tah hell kah a khui om.

Cueihnah neh Angnah

¹¹ Olkhueng aka tuem tah a poeknah a khing a mong Boeipa rhihnah dongah khaw cueihnah soep.

¹² A khuel pawt tah cangpuei la lo pawh, Tedae khuelnah a om akhaw a khaa kahlak la om bal.

¹³ Hlang cueih kah mingnah tah tuili bangla phul, Te dongah a cilsuep khaw hingnah tuisih bangla om.

¹⁴ Hlang ang kah poeknah tah am kaek bangla om, Te dongah mingnah khaw duen thai pawh.

¹⁵ Hlang cueih ol te lungming loh a yaak vaengah a koeh tih a thap thil bal Hlang ang loh a yaak vaengah tah nuei tih, a nam benla a voeih.

¹⁶ Hlang ang ol he yincaeh vaengkah hnorhih bangla om, Tedae lungming kah olthui dongah tah a hlihlim khaw om.

17 Aka khuel kah olthui tah tingtunnah khuiah a hue, Te dongah a olka te a lungbuei ah a thuep uh.

18 Hlang ang kah cueihnah tah imrhong neh vai uh, vapsa mai la, a mingnah khaw mingtung phalai pawh.

19 Vapsa hlang ham tah lungmingnah khaw a kho dongkah hloong bangla om tih, bantang kut dongkah kuel rhui bangla om.

20 Hlang ang tah a nuei vaengah a ol len Tedae hlang cueih tah cuepcuep ah ni a nueih.

21 Aka cueih kah lungmingnah tah sui himbai la om tih, a ban dong kah kungpak bangla om.

22 Hlang ang kah a khokan tah im khuila cu tih, aka phaep uh longtah poengah hinyah koila a rhing.

23 Hlang thae tah thohka hlip lamloh imkhui a sawt, hlang tang long tah poeng ah a rhing pueng.

24 Thoka hlip lamloh aka hnaton khaw hlang thae duet, Hmantang hlang long tah te te rhaidaeng la a poek.

25 Caitawt hmuika kah olka tah mingtung phalai pawh, aka muet uh kah olka tah coi dongah a khiing om.

26 Hlang ang kah lungbuei tah a ka dongah om, Tedae aka cueih kah a ka tah a lungbuei ah om.

27 Lailak loh a kocaelh te a tap, Tedae amah ni khoeng a tap uh.

28 Hlang aka hnael loh amah tah poek uh pawh, Teda a imben tah rhae a thiinah bal pueng.

22

Payal

¹ Palyal he khaw lung thae neh vai uh, Anih te hlang tom loh rhaidaeng la lu a hinghuen thil.

² Palyal he aek bangla rhalawt la om, te te aka taek boeih loh a kut a khong ni.

Cun Palueng Pawt Mako

³ Capa toel tloel kah ana pa om he khaw rhaidaeng, te bang canu aka cun khaw a hn-manah la om.

⁴ Canu olngai tah amah loh a va then a dang, Tedae rhaidaeng la kho aka boe loh ana pa ni a pae sak.

⁵ Mommom aka cu nu loh a napa neh a ya yah a bai, Te dongah boktlap la ming a thae sak.

⁶ A tuetang mueh kah olthui thingka he rhun-grhah tue kah phungding bangla om. Teae phaepnah neh toelnah he tah, a tuetang boeih ah cueihnah la om.

⁷ Khosak then neh aka rhoeng camoe loh, a manu napa kah khodang la a cun khaw a dah.

⁸ Aka koevoei mangkah camoe long tah, a manu napa kah boeimang khaw dawih a koelh.

Cueihnah neh Anangnah

⁹ Hlang ang n'cang puei he khaw, khoi-ut neh paikaek m'ben banghui pawn ni. Aka ip muelh te a ihnah lamloh haeng banghui pawn ni.

¹⁰ Hlang ang taengkah cil thui pah he khaw aka ngam taengah thui banghui mai pawn ni. Te dongah a bawtnah ah tah," Balae te," a ti.

11 Aka duek te khaw rhah mai, vangnah loh a nong tak coeng, ka ang khaw rhah mai, anih te lungmingnah loh a nong tak coeng. Aka duek tah a duem coeng dongah, a rhoeh ah rhah aih, Tedae hlang ang kah khosaknah tah dueknah lakah thae ngai.

12 Aka duek ham te hnin rih khuiah ni na rhah mai eh aka ang neh Pathen aka ming ham tah A hing tue khui puet na rhap pueng ni.

13 Ko aka talh taengah khaw muep cal boeh, lungcui aka om mueh taengah lai-om boeh. A lakhla om ne, namah te n'lawn ve, te daengah ni a kopoe a talh khaw na patang pawt eh.

14 Kawnlawk lah balae aka rih bal pueng, Te tah hlang ang moenih a?

15 Laivi, lungkaeh neh thi nuei khaw om dae hlang ang tanglong lakah tah yanghoep pueng.

16 Thingpang a longlae he im dongah khak a khing atah, lingluei long khaw a hling hlawk sak moenih. Thin aka caak long tah a poek tih ko a tam dongah rhainah khuiah khaw rihnah khueh pawh.

17 Lungming poeknah dongah lungbuei aka hol tah taplai then neh bangbueng a pihling sak bangla om.

18 Hmuensang kah tanglung a khueng loh Khohli a oel thai pawt banghui la, rhalyawp lungbuei nen ni hlang ang loh a amah eh, mebang rihnah khaw khak oel thai mah pawh.

Paya Kueinah

19 Mik a hun vaengah mikphi long, thinko a hun vaengah khaw yakhuetnah thoeng.

20 Lungto aka dong loh vaa a hut tih, Paya aka soehsal loh a payanah te a phae.

21 Paya taengah cunghang na phong sitioe cakhaw, koep na khueh ham te mawn moeh.

22 Paya taengah ka na ang mai cakhaw, lakueng boeh, moetheinah ham coeng thai pueng. Tedae soehsalnah, thinthahnah, olhuep phoenah, hnukpohnah he na haeh khungdaeng coeng atah, He olka long he paya khaw boeih a haek ni.

23 Imben te a khodaeng vaengah nang n'uepnah saeh, Te daengah nih a khueh tawn vaengah khaw na omngaih eh. Ngaih mang tue vaengah anih te paipuei, Te daengah nih anih nen te rho hmai na pang eh.

24 Tuihu hmai khu kah a ling he hmai lakah lamhma, thii longnah lakah tohhaemnah khaw lamhma bal.

25 Paya hlipdah ham te ka yak pawh, Te dongah anih te ka thuh tak mahpawh.

26 Tedae anih rhangneh kai taengla nganboh halo atah aka ya boeih long khaw anih te ngaithuen saeh.

27 U long nim ka ka he khoep ham buem lah vetih, ka hmui dongah rhodaek khoep han soei lah ve. Te daengah ni olka dongah ka cungku pawt vetih, ka olka loh kamah he n'ngawn pawt eh.

23

¹ O Boeipa, a pa neh ka hingnah Boeikung aw, amih kah khoboe dongah kai he n'hlahpham boeh. Amih kongah ka cungku tarha boel mai eh,

² Ka poeknah neh ka lungbuei cueihnah, a rhimong he a hlam lah ve? Ka lolhnah dongah khaw kai n'rhen boeh, ka tholhnah he khaw sut so mai boeh.

³ Ka tholhhiknah he pungtai vetih ka tholnah khaw ping tarha ve.

⁴ O Boeipa, a pa neh ka hingnah Pathen, Oekhlawnnah mik tah m'pae boel mai.

⁵ A thae huengainah te kai lamloh khoe saeh,

⁶ Calawm neh cukhalh long khaw n'gkhuk boel saeh, Cahoehnah rhaidaeng te khaw kai m'pae boeh.

OLKA TUEMNAH

⁷ Ka ca aw, hmuilai kawng ah tuituennah he, hnatun lah, te te aka paelki hlang tah man voel mahpawh.

⁸ Hlang tholh rhoek tah a hmuilai dongah man tih, soehsalkung neh thinlen long khaw te nen te hlang a hliphen.

⁹ Na ka te thaephoeinah neh ngaitoeih sak boeh, A Cim Pathen ming khaw nulnah aih boeh.

¹⁰ Dawnnah hmuiah khak aka om tueihyoeih bangla a pueitut te om mueh mapawt nim? Ol aka hlo vawtawp tih Pathen ming aka phoei khing khaw, a tholhnah lamloh a cim tloe moenih.

¹¹ Thae muep aka phoei khaw a boethae te hah tih, rhuihet loh a imkhui te hlah mahpawh.

A tholh la ol a hlo atah, a soah tholhnah om coeng, a poek bawt bal atah, rhaepnit la tholh bal coeng. Olhlo te a hong a thui atah, a nih te tang mahpawh, a imkhui ah citcai nen ni a bae eh.

Olthae

¹² Dueknah neh aka tluk olthui longim he om, Jakob rho dongah te bang te phoe boel saeh. Tebang khoboe te hlang cim taeng lamloh hla saeh, Te dongah tholhnah khuila bol uh boel saeh.

¹³ Na ka te ol rhong ol ing ne ngaitoeih sak boeh, Te bang olcal dongah te tholhnah om coeng.

¹⁴ Hlang len laklo kah na ngol vaengah khaw, na nu neh na pa te poek. Amih hmai ah na hnilh uh vetih, boe thae neh hlang ang bangla kho na boe ve. Nang n'cun pawt ham te na hue vetih, na thangnah khohnin te na tap ve.

¹⁵ Olthae cal hamla aka ngaitoeih hlang tah, a hing khuiah khingai uh tlaih mahpawh.

Cukhalhnah

¹⁶ Hlang rhoi tah amah tholnah pung, Te vaengah a pathum loh kosi a yook. Cahoehnah khaw hmai bangla tak tih, boeih a tlum daengah ni a thih pueng eh. Amah hui rheap taengah aka cukhalh hlang tah, hmai a tlum daengah ni a paa pueng eh.

¹⁷ Uicuk kah buh he bahoeng tui sitoe cakhaw, a lakuengnah te a duek hil bawt mahpawh.

18 Rhukom thingkong soah aka tholh loh, “U long kai he m'hmuh? A hmuep loh n'thing tih, pabueng loh n'thung, Aka hmu om pawh, balae ka lakuengnah eh? Khohni loh ka tholhnah a poek moenih,” a ti.

19 Anih hlanghing mik loh a hmuh te ni a rhih. Boeipa kah mik te a poek moenih. Boeipa mik he tah khomik lakah a pueh thawng rha aa, hlang kah khoboe neh omih te khaw boeih a sawt, a huephael neh a kaelcong kah khaw boeih a hmuh.

20 Lunglai a suen hlanah amah taengla boeih tueng, Te dongah a thoeng phoeiah khaw a ming.

21 Tekah hlang te khopuei longpuei ah dan a tat vetih, a ngaihuet mueh vaengah anih te a tuuk ni.

22 Te tlam te huta loh a va a maa tih, hlang tloe neh a cun vik te a va kah rho a paek.

23 Anih long te lamhma la, Khohni kah olkhueng a aek tih, a pabae ah tah a va hman ah dumlai a saii. A pathum ah, cukhalhnah dongah samphaih coeng tih, a pali ah hlang tloe neh ca a cun.

24 Te dongah anih hlangping hmaila a khuen vetih, cawhnah te khaw a ca rhoek soah a yueng pah ni.

25 A ca rhoek loh a yung pael thai pawt vetih, a hlaeng dongah khaw a thueih cuen mahpawh.

26 Anih long te khosi yooknah ni a caeh tak vetih, a ming thae te khaw cim tlaih voel mahpawh.

27 Aka hing duen rhoek loh anih te poek vaengah, Boeipa rhihnah lakah aka then he om

pawt tih, Boeipa kah olpaek dong luthuk lakah Aka tui ngai he om pawh,” a ti uh ni.

24

CUEIHNAH UEMNAH

¹ Cueihnah tah amah uem uh tih, a pilnam lakli ah a thangpomnah a thui.

² Khohni kah hlangping taengah a ka a ang tih, A caempuei taengah khaw a thangpomnah a thui.

³ “Kai tah Khohni ka dong lamloh ka thoeng tih, Diklai te khonuei bangla ka dah.

⁴ Vaan sosang ah ka om tih, Ka ngolkhoel khaw vaan bangyai soah om.

⁵ Vaan bangyai khaw ka hil coeng tih, Tangrhom kah a dungnah khaw a pha coeng.

⁶ Tuitunli kah tuiphu so neh, diklai hmai boeih ah khaw, Pilnam neh namtom boeih soah khaw docanah ka khueh.

⁷ Te rhoek boeih soah duemnah ka tlap, U kah khohmuen ah tim ka rhaehrhong la ve?

⁸ Hno cungkuem aka suenkung loh ol m'paek coeng, Kai aka suenkung loh ka dap hmuen khaw a coelh. Na rhaehnah hmuen te Jakob taengah khueh lamtah Israel khuikah loh na rho pang saeh.

⁹ Khosuen hlan kah, a tongcuek vaengah kai n'suen coeng Kum hal duela ka paa tlaih voel mahpawh.

¹⁰ A dap cim kah a mikhmuh ah ka tho ka tat tih, Kai he Zion ah n'thoh coeng.

11 Ngaihom khopuei ah kai he duemnah n'paek, Te dongah Jerusalem tah ka khohung la poeh.

12 Hinyah kap pilnam lakli ah khaw, Boeipa kah khoyo neh a rho lakli ah yung ka hlak.

13 Lebanon tlang kah lamphai thing neh, Hermon tlang sang kah ta-aw thing bangla ka rhoeng.

14 Engedi kah rhophoeng kung bangla, Jerikho kah rose rhaipai bangla, Lohma li kah olive thing hloe bangla, tui kaeng kah kolvan thing bangla yol ka rhoeng.

15 Yungum thing neh hlingtui bangla ka ul tih, Myrrh thinghloe bangla ka hmuehmuei khaw tui. tlang sungsin, khawphlawp, aangpi, dap khuikah hmuehmuei botui van pawn ni.

16 Terebinth bangla ka hlaeng ka phuel tih, ka hlaeng tah thangpomnah neh sitlohnah la om.

17 Misur bangla ka muem then coeng tih, Ka pailumnah khaw thangpomnah neh thaihsu la om.

18 Kai tah lungnah then, hinyahnah, mingnah, a cim ngaiuepnah kah manu la ka om. Kai ca rhoek a ming ka sui boeih te khaw, Amah loh ming a paek tangtae coeng ni.

19 Ka aka ngaih tah ka taengla ha lo uh, Ka thaih he a hah la ca uh.

20 Kai poekkoepnah he khotui lakah didip tih, Kai nan khuehnah te khi litui lakah oi ngai.

21 Kai aka ca boeih tah a bung pong pawt vetih Kai aka o hlang tah a tui hal voel mahpawh.

22 Kai ol aka ngai tah yahpok pawt vetih, Kai taengah aka pongpa hlang tah tholh mahpawh.

Cueihnah neh Olkhueng

²³ He cabu dongkah he tah Khohni Pathen kah paipi ni, Te olkhueng te Moses loh mamih m'paek coeng, Te ni Jakob hlangping kah rho la aka om coeng.

²⁴ Paa tlaih boeh Boeipa dongah namning sak, Amah taengla ka ben daengah ni n'thaphoh eh. Pathen bueng tloengkhoel Boeipa coeng, A nih phoeiah tah khangkung a om moenih.

²⁵ Te khaw cueihnah neh tah thaih cuek tue kah, Pishon neh Tigris tui bangla phul coeng.

²⁶ Yakimingnah khaw Perath neh, cangah tue kah Jordan bangla long coeng.

²⁷ Thuituennah tah cangkoei tue kah, Nal tuiva neh Gibon bangla phuet coeng.

²⁸ Hlang lamhma long khaw cueihnah boeih ming pawt tih, a hnukkhueng long khaw a dungnah te pha pawh.

²⁹ A poeknah te tuituenli lakah khaw puh tih, a cilsuep khaw tangrhom puei lakah khaw dung bal.

³⁰ Kamah tah tuiva lamkah tuilong bangla, Dum khuikah tuilong tui bangla ka om,

³¹ Te dongah ka dum te ka suep vetih, Rhaipai thingkong te ka lae ni. A nunae, ka tuilong te tuiva la poeh, ka tuiva te tuitunli la poeh bal coeng.

³² Thuituennah te mincang khosae bangla ka khueh vetih, a hla lamkah khaw a ciping la ka khueh ni.

³³ Tukilnah te tonghma ol bangla ka hawh vetih, hmailong kah cadilcahma boeih ham ka khueh pah ni.

³⁴ Kai tah kamah bueng ham pawt tih, cueih-nah aka tlap boeih ham ka thakthae he poek.

25

Thangpom Tueng Hlang

¹ Kai tah hno pathum soah ka hmae coeng, Te tah Pathen neh hlang mikhmuh ah khaw then Paca boeinah neh tanu lakli kah kotloepnah khaw, imben neh paya la om nah khaw, Yuu neh va laklo ah rhoeprhui la kho sak nah khaw.

² Pilnam kah a hui khuikah ka thinah pathum tah, A bihduen neh aka cawklawih hlang khaw, Laithae laidang neh aka boei khaw, Patong hlang ang aka samphaih khaw ka thinah.

³ Na camoe vaengah a hong te puet na tung koinih, metlam lae na patong vaengah pakhat khaw na tung thai eh?

⁴ Sampok vaengkah laitloek ol tah dueng tangkik tih, patong long tah cilsuep then a khueh ham tueng pai.

⁵ Patong vaengah tah cueinah neh rhoeprhui tih, hlangcong he khaw yakmingnah, cilsuep neh rhoep.

⁶ Muep hmuhnah he Patong kah rhuisam la om tih, Boeipa rihnah te a hoemdamnah la om bal.

⁷ Ka poek thai ngawn coeng, pako rhoek te a yoethen ka ti, A parha nah khaw ka hmuilai loh a thui. A ca rhoek soah aka omngaih thai hlang, a rhal rhoek a cungku te a hmuh duela aka hing.

⁸ A yuu aka cueih tih aka khuel hlang neh aka hing, Laak neh vaito aka bok tih lai aka nok pawt tah a yoethen. A hmuilai dongah tholhnah aka

saii pawt tih, amah hmuikah hlang hmuiah aka thotat pawt tah a yoethen.

⁹ Paya aka hmu hlang neh aka hnaton rhoek kah, yaak ngaih la aka cal hlang tah a yoethen.

¹⁰ Cueihnah aka dang he bahoeng len coeng dae, Boeipa aka rih lakah aka tanglue ngai a om moenih.

¹¹ Boeipa rihnah long tah a cungkuem khaw a poe, Te te aka khueh hlang te u nen lae n'thuidoek bal eh.

¹² Boeipa rihnah tah amah lungnah ham a tongnah la om, Tangnah khaw amah taengla ben ham a tongnah ni.

Aka Thae Voelh

¹³ A hma om dae, thinko kah a hma tah tluk pawh, boethae khaw om dae, boethae nu tah tluk pawh.

¹⁴ Patangnah khaw om dae, lunguet taengkah patangnah tah tluk pawh, Tawnlohnah khaw om dae, thunkha kah tawnlohnah ta tluk pawh.

¹⁵ Rhul sue lakah aka thae sue khaw om pawt tih, huta kah kosi lakah aka thae thintoeknah khaw om pawh.

Huta Thae kah Boethae

¹⁶ Huta thae neh khosak lakah atah, Sathueng tuihnah neh khosak te ka ngaih bet.

¹⁷ Halang nu loh a muei a sak a tho a vael tih, a mael hmai tah lopam bangla hmuep.

¹⁸ A va loh imben taengah a ngol vaengah, khuekhue a huei khaw phah thai pawh.

¹⁹ Huta kah konaehnah te thuidoek vaengah tah konaehnah boeih he a yit ca mai pueng ni. Hlang tholh kah hmulung tah anih soah tla nawn saeh.

²⁰ A va hlang mong ham tah olyet nu he, laivin dongkah patong khokan banghui pawn ni.

²¹ Huta kah sakthen dongah khaw man boel lamtah, a khuehtawn dongah khaw huta te nai boeh.

²² A yuu loh a vaa te a duel vaengah kosi khaw, sawtrhoelnah neh yahpohnah tah tangtae coeng.

²³ Kopoek khaw moelh, maelhmai khaw hmuep, Te dongah thinko a phatnah he huta thae lamkah ni. Ban khahoei neh khuklu tangdawtnah khaw, a yuu loh a va omngaih la a khueh pawt lamkah ni a thoeng.

²⁴ Huta a tholhnah lamloh te te a tong coeng tih, Anih rhangneh mamih khaw boeih n'duek uh.

²⁵ Tui khaw cae sak boel lamtah huta thae kah olcal khaw hmaitak pom sak boeh.

²⁶ Na thuinuet bangla a pongpa pawt atah, anih taeng lamloh namah nong mai laeh.

26

Huta Then kah Omngaihnah

¹ Huta then kah a va tah a yoethen tih, a hingnah khohnin khaw rhaepnit la a puh pah.

² Hlangcong nu loh a va ham omngaihnah a khuen, Te dongah anih te a kum khaw ngaimongnah neh soep.

³ Huta then tah yoethennah a len koek coeng ni, A nih tah Boeipa aka rhih tongpa lakli ah Yoethennah la a paek ni.

⁴ Khodaeng cakhaw, boei cakhaw, a thinko a ngaimong, a tue boeih khuiah a maelhmai hlampan.

⁵ Hno pathum loh a thinko a hih tih, a pali nah he ka rhih ngai bal. Khopuei ah olthaekaling neh hlang aka kuk, laithae hlang aka pup, He boeih he dueknah lakah khaw thae ngai.

⁶ Huta kah mingthae, thatlainah a om vaengah, thinphatnah neh kothaenah thoeng tih, a ol haat te hlang tom a ming sak.

⁷ Huta thae he hamkun suihlahi bangla om, anih aka lo te khaw rhulti aka buem bangla om.

⁸ Yumi nu loh thintoek muep a soeh, A yah te khaw a da tloel.

⁹ Thinpom mikdai loh hlangpam nu a voeih, a mikhlang loh a longpuei a dawn.

¹⁰ Canu thinthah te khaw rhep dawn, yalponah hmu vetih hnonah tarha ve.

¹¹ Mikdai aka lolh khaw ngaituen, Nang soah a tholh atah let boeh ne.

¹² Tuihal yinlai loh a ka a ang tih, a taengkah tui boeih te a ok bangla, Dap takuem kah hlingcong taengah ngol vetih palaa hamla a liva te a ong pah ni.

Huta Then kah Yoethennah

¹³ A yuu kah hloeihhlanah loh a va a hmae sak, a bithainah loh a rhuh soah a saa a saibawn sak.

¹⁴ Oldip nu he tah Boeipa taeng lamkah kutdoe ni, amah aka toel uh lakah a phu aka tlo he om pawh.

¹⁵ Mueltuet nu loh hloeihhlamnah soah hloeihhlamnah a thap, te dongah a boethennah te coi dongah khiing lek pawh.

¹⁶ Boeipa kah hmuensang ah khomik a thoenng bangla, huta then kah a hlangthen loh imkhuikho a then sak.

¹⁷ Hmaitung cim dongkah hmaithoi a vang bangla, a maelhmai then khaw a mueimae a khuetnet la om.

¹⁸ Sui tungpum dongkah cakben bangla a kholan khaw pihling tih a khokhan cikngae.

¹⁹ Ka ca, na camoe kah pailumnah te a then la khoem na thadueng te hlanglak taengah pae boeh.

²⁰ Vannaem boeih ah khaw laimen hmuen mah tlap, Na cangti khaw tuh lamtah, na cangsawt mah tangnah.

²¹ Te daengah ni na cadil ham kho a buh vetih, a casak soah khaw uepangnah a khueh vaengah, muep a rhoeng uh eh.

²² Pумыoi he timtui la a ngai uh tih, rhukom nu khaw a hlang ngaih ham dueknah imsang la poeh.

²³ Lailak nu tah cungpoeh pa kah buhham la om tih cuepmueih nu ta Boeipa aka rhih hlang taengah a paek.

²⁴ Yahdaeng nu tah rhaidaeng la pongtho tih, mueltuet canu tah a va mikhmuh ah pataeng birhih.

²⁵ Thinlen nu tah ui bangla a ngai dae, a yah aka khueh long tah Boeipa a rhih.

²⁶ A va aka hinyah nu tah hlang boeih loh hlang cueih la a ngai, Tedae a koevoeinah neh a va aka hliphen tah lailak nu boeih a khueh uh. Huta then kah a va tah a yoethen, a khohnin khaw rhaepnit la puh ni.

²⁷ Ol ue neh olyet nu lah caemthoh kah olueng a tum bangla om, hlang boeih khaw caem tung lakliah kah kho a sak ni.

Ka Hnuenah Hno Pathum

²⁸ Ka thinko he hno panit loh a toeh, tedae a pathum kah loh ka thintoek a loh. Hlang rhalh khaw vawtthoek neh khodaeng tih, Hlang cueih khaw mat a phaep uh. Hlang he duengnah lamloh tholhnah la mael. Te dongah Boeipa loh cunghang a tawn coeng.

²⁹ Thenpom khaw boethae sainah lamloh khoem uh tloel tih hnoyoi khaw tholhnah lamkah cimcaih tloel.

27

¹ Hlang a yet loh a kum a ko hamla tholhnah a saii uh, Boeinah aka tlap rhoek khaw a mik palet uh coeng.

² Lungto laklo kah a caeknah ah a cungkai a om bangla, tholhnah he khaw hnoyoi neh hnolai laklo ah om.

³ Hlang he Boeipa rihnah dongah cikngae la a om pawt atah, a imkhui he phawn a koengloeng pah ni.

Khosak Noemcainah

⁴ Vairhuek a ninoek vaengah kawnhnawt a phoe bangla hlang a olcal dongah ni a boethae a tueng pah.

⁵ Hmai hueng loh am bop kah am a noemcai bangla hlang he a olcal thingka loh a noem cai van.

⁶ A thaih loh thing a hloe te a tueng sak bangla,

⁷ Hlang te ol a thui hlanah koeh boeh, He a longim nen ni hlang na noem eh.

Thapang neh Kutthungnah

⁸ Tiktamnah te na hloem atah, na kae ni, Te dongah te himbai then bangla bai laeh.

⁹ Vaa khaw amah hui vanah ni a cuk, Te dongah uepomnah khaw amah aka vai taengah ni a om.

¹⁰ Sathueng loh maeh a tawt bangla, tholhnah loh boethae aka saii te a tawt.

Olcalthingka

¹¹ Hlangcim kah olcalthingka tah cueih yoeyah tih, hlang ang tah hla bangla hoilae uh.

¹² Namah tuetang te hlang ang lakli ah a rhoeh ah ne, tedae pilnam ko a poek taengah tah om na rhoi akhaw.

¹³ Hlang ang olthui tah a lolhnah la om tih, a nueih uh khaw tholhnah koeloe la om.

¹⁴ A thaephoeinah neh toemngamnah mul rhung tho, A tohhaemnah soah hlang loh a hna a buem.

¹⁵ Hlang hoem kah oeltaihlah loh thii a long sak tih, aka ya rhoek khaw thintoekkalh la a khueh.

16 Olhuep aka pok loh ueppangnah a phae, anih te paya thitlo a hmuh tlaih moenih.

Olhuep neh Hnukpoh

17 Na paya te lungnah lamtah anih soah tangnah khaw khueh, anih kah olhuep te na poh atah a hnukah bang boeh.

18 Hlang he a rhal loh a phae vanbangla, na imben na payanah te khaw namah longni na phae.

19 Na kut dongkah vaa te na loeih sak bangla, na imben te khaw caeh sak laeh, anih te koep tu voel boeh.

20 A hnukah khaw vai boeh, anih te bahoeng lakhla coeng, anih te kirhang bangla thang dong lamloh loeih coeng.

21 A hma te koep a ben van bangla thaekhanah khui lamkah khaw moeithennah he om., Tedae olhuep aka pok hlang tah ngaiuepnah tal coeng.

Hlangthai Palat

22 Mik aka hap khing khaw boethae ni a taeng, anih aka ming long a hla la khoem uh saeh.

23 Na mikhmuh ah a hmulai boeih didip vetih, na ol te khaw a oep ni. Tedae a hnukah tah na ol te a mael vetih, na ol soah nan n'hliphen ni.

24 Ka thinah he muep om dae, anih te ka thinah koek Boeipa long pataeng anih te a thinah.

25 Lungto thaeng aka dong hang khaw, amah lu dongah ni koep a tlak. Hnukpohnah neh aka ueng uh soeh long khaw, a hma ni muep a phen khoeng.

²⁶ Vaam aka to khaw amah ni a cunku eh, hlaeh aka tung khaw amah ni a man eh.

²⁷ Hlang loh boethae a saii dae, amah ni a paluet thil, Te vaengah me lamkah a thoeng khaw ming mahpawh.

²⁸ Hlang lawn neh hlang thae khaw oekhlawnah lamloh ha lo, Te dongah kuthungnah loh sathueng bangla anih te amah.

²⁹ Hlang cim a cung vaengah aka omngaih te tah amah khaw hlaeh dongah man ni. A dueknah a pha hlanah tlohnah loh anih te a yoop ni.

³⁰ Thintoeknah neh kosi he khaw sarhingrup la om, Tedae hlang tholh long te te khak a pom.

28

¹ Tawnlonah aih khaw Boeipa kah tawnlohnah ni a dang, Amih kah tholhnah te Boeipa loh khak a khoem coeng.

² Na imben loh thae a saii te khaw khodawkn-gai mai, tedaengah ni na thangthui vaengah na tholhnah han hlah eh.

³ Hlang long a hui taengah thintoeknah tial khueh koinih, metlam lae Boeipa taengkah hoeihnah te a lamtawn eh?

⁴ Hlang he amah bangla a tloe taengah rhenah khueh pawt koinih, amah tholnah soah tholhhlahnah te metlam a bih thai eh?

⁵ Pumsa saloela kosi te puet vuelh koinih, a tholhnah soah u long lae tholh dawthnah boirhaem te a saii pa eh?

⁶ Na hing a bawtnah te poek lamtah rhalcak te khueh boeh, Pocinah neh dueknah te poek lamtah, aka thuem olpaek te khaw poek lah.

⁷ Olpaek te poek lamtah a imben taengah thintoek sak boeh, Khohni kah paipi te poek lamtah, a thae bueng te dawn boeh.

⁸ Olpungnah rhael lamtah na tholhnah yol ni, thinsanah long khaw hmai ni a puek sak.

⁹ Hlang tholh loh paya khaw a paa sak tih, rhoepnah lakliah khoonah ni a soem.

¹⁰ Hmaitui a pueh vaengah tah, hmai ni a tak, Mangkhaknah a pueh vaengah, olupungnah rhoeng. Hlang he a thadueng a puh vaengah a thintoek yet tih, a khuehtawn a puh vaengah a kosi khaw rhoeng.

¹¹ Koeloe olupungnah loh hmai a puek sak tih, koeloe oelnah loh thii a long sak.

Olthae

¹² Hmaili te na hmut koinih tak vetih, na timthoih koinih duek ni. Te rhoi te na ka lamkah ni a thoeng.

¹³ Hlang thet neh lai panit la aka phae tah thae a phoei thil coeng, Te long ni hlang a yet kah rhoepnah khaw a phae.

¹⁴ Caemtuhnah loh hlang muep a hinghuen tih, amih te namtong taeng lamloh namtong taengla a thaek. Te long te khopuei vongcak khaw a phae tih, hlangen kah im khaw a palet mah.

¹⁵ Caemtuhnah loh hlang haam nu khaw im lamloh a vai tih, amih kah thatlohnah phu te khaw a poeih pah.

¹⁶ Caemtuh hlamlu lu aka thuk hlang tah duem pawt vetih, rhoepnah nen khaw khosa mahpawh.

¹⁷ Rhuihet neh a vuek vaengah a hma ni a om, te ol neh a vuek vaengah tah rhuu a paep sak.

¹⁸ Cunghang dongah aka cungku he yet coeng, Tedaе olka dongkah aka cungku tah a tluk moenih.

¹⁹ Te dong lamkah aka khoem uh hlang khaw, a thintoek a yan hlang pawt te khaw, Te kah hnamkun loh a nan hlang pawt khaw, te kah hloong dongah a khoh pawt hlang khaw a yoethen.

²⁰ Te kah hnamkun tah thi hnamkun la om tih, hloong khaw rhohum hlong la om bal.

²¹ Te dueknah khaw a thae dueknah la om tih, te ham tah hell ni a om coeng.

²² Hlacim aka vuei thai thaomnah he a om moenih, amih te hmaisai long khaw dom thai mahpawh.

²³ Tedaе Boeipa aka hnawt tah hmuilai kah thaomnah dongah cungku ni. Te vaengah amih te a dom vetih paa voel mahpawh. Amih taengah sathueng bangla a tueih vetih, Amih te kaihlaeng bangla a paco ni.

²⁴ Na koerhang te hling neh na mak bangla, na ka dongah thohkhaih neh thohkahl khaw khueh van.

²⁵ Sui ngun te tawh na bang thil bangla, na ol ham khaw coi neh coilung khueh pah.

²⁶ Na hmuilai dongah a lolh pawt ham ngaithuen, te daengah ni rhongngol la nang aka mah te maeh la a cungku eh.

29

Pukhueh neh Puhlah

¹ Aka rhen long tah a imben te a pu bomnah kut aka thueng loh olpaek ni a tuem.

² A ngoengaih tue vaengah tah na imben te pu lamtah, sahnah tue a pha vaengah na imben te koep thuung van.

³ Na olkhueh te tuem lamtah, a taengah uepom la om, tedaengah a tuetang boeih ah khaw na ngoe te na dang eh.

⁴ Cangpu he aka rhul mailai bangla muep a poek uh, Te dongah amih aka bom rhoek te khaw ngaihmanhah a paek.

⁵ Cangpu a dang hlan khuiah tah hlang loh a hui kut te a mok pah, a imben kah tangka kawng khaw a nah la a thui. A sah tue a pha vaengah tah uelh bal pueng tih, ol hong nen te koep a thung, a tuetang kah a lolhlah bueng te a phoei thil.

⁶ Puhlah kung te thuung sitioe cakhaw, rhak-thuem tah a hoe tloel coeng. Te rhoek te khaw amah aka rhul maila bangla a ngai coeng. Purhong loh sah thai pawt khaw, a tangkah a huen pah la poeh Te dongah a ngoe muehla rhal a khueh.

⁷ Hlang a yet cangpu hlah ham a aal, he a moethae dongah moenih. A ngoe mueh ah hmaithae ka loh ni, tila a rih uh dongah ni.

⁸ Tlayae paihmuen kah hlang taengah thinsen sak, na kutdoe aka lamtawn te khaw hloh pah boeh.

⁹ Olpaek bangla khodaeng te bom, a ngoengaih tue vaengah amih te kuttling la tueih boeh.

¹⁰ Na tangka te na manuca neh paya ham hlah pah, lungto hmui ah keet tih a hma lakah tah.

11 Khohni kah olpaek bangla na kawm te khaw tung lah, te te nang ham sui lakah khaw muep hoeikhang ni.

12 Doedannah te na thakvoh dongah tung, te longni puenthae khui lamkah nang n'hlawt eh.

13 Photling bai neh caai muk lakah khaw then, te long ni na rhal khaw a tloek eh.

Rhikhangnah

14 Hlang then long tah imben ham rhi a khang pah, Tedae a ko aka talh long te anih te a hlong ni.

15 Nang ham rhikhangkung kah a thennah te hnil boeh, anih loh a hingnah te nang ham a paek coeng dongah.

16 Hlangtholh long tah rhikhangkung kah khuehtawn a poek a yak,

17 Lungmong long khaw amah kah rhi aka khang te a hnoo.

18 Saphuem yuh long khaw khuehtawn muep a poci sak, amih te tuitunli kah tuphu bangla muep a niknuk sak. Mingom hlang khaw saldong la boeih a tueih tih, namtom kholong taengah a poengdoe sak.

19 Hlang tholh long tah saphuemyuh lamloh kothae a thoeng sak, laithui vaengah khaw a kum a ko caak ham ni a hloem.

20 Na coengah neh a then koek la na imben te bom, tedae na cungku pawt ham mah ngaithuen.

Imkhui Khosaknah

²¹ Hingnah ham a kuek tah tui, buh neh hnicu pawn ni, mah pum kah hil-uepnah ham tah im he a ngoe bal.

²² Hlang im kah buh tui lakli ah khosak lakah tah, mah impu hmuiah khodaeng la khosak he then ngai.

²³ A yol a yet ah khaw ngaikhueknah mah khueh, te daengah ni yinlai kah kokhahnah khaw na yaak pawt eh.

²⁴ Im khat lamloh im khat la caeh khing he khaw khosak thae la om, yinlai bangla na ka khaw na ang ngoeng mahpawh.

²⁵ Buh na kok tih tui na tul cakhaw uem hae mahpawh, Te vaengah hekah olkha ol he ni na yaak eh.

²⁶ “Yin hoel halo lah, caboei phaih laeh, na khueh boeih te ka ca pawn ni.

²⁷ Yin hoel nong laeh, hlangcong yin halo, ka manuca loh kai taengah lai-om, imkhan ka ngaih,” a ti ni

²⁸ Aka yaknga hlang ham tah a ueh tloel coeng, lampah bangla a ho tih purhong bangla a voek te.

30

CAMOE KAWNG

¹ A ca aka lungnah long tah boh yoeyah, tedaengah ni omngaihnhah longpuei la mael eh.

² A ca aka toel hlang tah amah ham hoeikhang, A hmaiben rhoek taengah anih ham thangpom uh ni.

³ A ca aka thuituen long a rhal khaw a thatlaih sak tih, a hui lakliah tangpomnah a dang bal.

⁴ Amah hnukthoi la amah bang te a khueh coeng dongah, a napa duek dae aka duek pawt bangla om.

⁵ Amah a hing vaengah omngaihnah a hmuh tih a dueknah hnin ah khaw nguek voel pawh.

⁶ Anih long tah thunkha taengah tawn aka lo khaw, paya kah boethen aka thuung ham khaw a khueh coeng.

⁷ A ca aka dom long tah a hma ni a poi rhoeng, a rhah takuem ah thinphatnah ni a yook.

⁸ Marhang a phaep mueh he a thinthah, ca a toel mueh khaw a thin len.

⁹ Camoe tuem ngaih khaw namah n'hih vetih, na luem puei cakhaw namah ni n'toeh eh.

¹⁰ Anih te nueih puei boeh, anih dongah na kothae ve, A hnukhueng ah tah na no ni rhueng hae eh.

¹¹ A noe vaengah yalpo la khueh aih boeh, a tholhdalh te khaw hnoelrhoeng boeh.

¹² A noe vaengah a lu buluk sak lamtah, a camoe vaengah a nam ah khaw tam. A thinlen vetih na ol ngai pawt ve, te vaengah a hinglu loh na kothaenah ni m'paek eh.

¹³ Na ca te toel lamtah hnorhieh khaw phueih sak, Te daengah ni nang a yadaeng neh nang n'tloelh pawt eh.

¹⁴ Boei tih pumsa aka ngoicaem lakah tah, khodaeng dae sading neh pumrho soep he then.

¹⁵ Sadingnah neh pumrhosoep nah he sui lakah, Bihaam pum he tah taelek mueh boeinah lakah then.

¹⁶ Pumrho sadingnah lakah aka then khuehtawn he om pawt tih, Thinko omngaihnhah soah kohoenah he a om bal moenih.

¹⁷ Dueknah he tah citcai neh hing lakah, Kumhal duemnah he tloh neh ngoicaemnah lakah then.

BUH CAAK KAWNG

¹⁸ Ka aka buem soah hnothen n'lung he, hlan dongah buh an n'nawn banghui la om.

¹⁹ Mueirhol taengah a nawn te balam nim? Ca thai pawt tih a him thai hae moenih, Pathen kah dantat rhoek khaw amah te tlam ni a om.

²⁰ A mik loh a hmuh vaengah a huei te, tildit rhoek loh hula a kop vaengkah a huei banghui pawn ni.

²¹ Kothaenah dongah na pum khaw voei aih boeh, na hil-awtkuelh lamkhaw na ngaih mang boeh.

²² Thinko omngaihnhah he amah hingnah la om tih, kohoenah long hlang kah hinglung a sen sak.

²³ Na pum dom lamtah, mongnah khueh, kothaenah te namah ne a hla la khueh, Kothaenah loh hlang muep a phae tih, te lamkah te hoeikhangnah a thoeng moenih.

²⁴ Uetnah neh thintoeknah loh hing a toi sak, mawntangnah loh hlang yueya a patong sak.

²⁵ Caboei kungah a kohoe tih aka uem tah, a buh dong lamloh amah hoeikhang van ni.

31

Khuehtawn dongah A Thuemham La Hingnah

¹ Khuehtawn sokah ihhoelhnah long he pumsa a caep mawntangnah loh khaw ihnah te vik a haek.

² Mikhue mikcang la mawntangnah loh mikku a hoelh sak tlohnat lakah khaw ihtuinah te vik a koe.

³ Boei long tah a hmailong ham muep thakthae tih, a duem vaengah khaw anih te didipnah neh baetawt.

⁴ Khodaeng kah thakthaenah loh khosak vawtvainah a thoeng sak a duem vaengah khaw a ngoengaihneh muep om.

⁵ Sui aka ngaih long a tiktam tlaih moenih, tangka aka hloem khaw tangka long longpuei a hmang sak.

⁶ Hlang a yet kah pocinah he sui dong lamloh halo tih, amih a timnah khaw a hmai a hmai ah a om pah.

⁷ Te te aka hue rhoek hamkhaw thuikoek hmuitoel om tih, aka ang boeih ngawn tah te long te a sol ni.

⁸ Boei khaw a hmabuet la a om tah a yeothen, amih long te sui hnuk khaw a vai bal moenih.

⁹ Mamih loh u lae ng'uem uh bal eh, a pilnam soah kopoe rhai hno aka saii te ni.

¹⁰ Sui neh a noemcai vaengah u lae hlang soep a hmuh, boethae aka saii pawt tih tebang aka saii pawt ni.

¹¹ A khuehtawn loh a thoh vetih tih, a moei-hoeinah khoboe te hlangping loh a doek ni.

Buhkung kah Omihnah

12 Hlang len caboei dongah na ngol nama? te dongah khaw halhka boeh ne. “Caak muep om la he,” ti boeh.

13 Halhka mik he hno thae ni tila poek,

14 Na hmuh sarhui taengah na kut te phuel boeh, na hui te bael kongah nen boeh.

15 Laitloek vaengah, na huikah ngaihlihnah te namah kah bangla poek, olka boeih dongah khaw a then la poek.

16 Na hmaiah a tawn te tah, Aka cilpoe hlang bangla ca. Palawng padai la ca boeh, nang te n'tuei uh ve.

17 Moeiboe then la om ham, lamhma la thoo, calnat la om boeh lai na kawh tarha ve.

18 Hlang a yet lakli kah na ngol atah, amih loh a taek hlanah na kut lamhma puei boeh.

19 Aka toel uh hlang ham tah a yol khaw rhoeh mai, A thingkong dongah khaw phutphut a hil moenih.

20 Sading la ihnah he khaw a rhoehkhoeng la caaknah dongah om anih te yue thoo dae a ngai khuek ti. Imueh ihnai neh patangnah khaw, kolet bungpoi he khaw calawm taengah om.

21 Na caak voelh bal oeh atah, thoo lamtah lok dae, na hoeikhang bitni.

22 Ka ca kai ol he hnatun lah, kai n'sawtrhoel boeh, A bawtnah ah ka ol loh nang te ng'oep bitni. A cungkum dongah a rhoekkhoeng la sai, Tedae ah ni tlohtat loh n'noeng pawt eh.

23 Buh dongah moei aka hoeih te pilnam loh a uem, Te dongah moeihoeihnah te tueng pai tila laipai uh.

²⁴ Buh dongah aka cik tah khopuei khaw a kohuet sak, Tedongah a moeithae te a laipainah tueng pai.

Yukung ah Cuenah

²⁵ Na thaomnah te yubueih neh cak sak boeh, yubueih long hlang muep a phae coeng lahko.

²⁶ Kuthai kah bibi te hmai hueng loh a noemcai, Yu loh hlang thinko a noemcai tih tohhaemnah a huek.

²⁷ Misur tui khaw a rhoehkhoeng a tah, hlanghing kah a hingnah tluk la om. Misur tui a om pawt atah hlang kah hingnah metlam a om? te long te pilnam kah omngaihna khaw a saii vaen dae ta.

²⁸ Misurtui khaw a tuetang vaengah a rhoehkhoeng la o teni thinko omngaihna neh hinglu kohoenah la a om.

²⁹ Misur tui ok aih long he mueihla a khahing sak tih, tohhaemnah neh tongtahnah la a poeh sak.

³⁰ Yurhui vaengah tah a angvawk kah thintoek loh a nganboh ni a yet sak A thadueng khaw a tlak sak tih, a hmalaem te a khoe p ah.

³¹ Na hui te yukung buhkung ah coel boeh, a omthennah soah khaw hnael boeh. Anih honah ol khaw thui boeh, Amah ngaih bangla a saii vaengah a ngaihlih sak boeh.

32

Buhkung kah Moeiboe

¹ Buhkung ah rhoiboei na bi atah namah pom uh boeh, amih khuikah hlang bangla amih taengah khaw om van. Amih te ngaithuen lamhma lamtah ngol, na hutnah te na coeng phoeiah mah ngolhmuen lo.

² Te daengah ni a mih lakli ah khaw ng'uem uh vetih, mawtkung thenkah samkhuem te na dang eh.

³ A ham la na om atah thui van, te te namah hamsun ni, Tedae mingnah neh a khuetnet la om saeh, Te vaengah phungding ol te rhoirhak boeh.

⁴ Omngaihbowtnah hmuen ah na olcal te hawk boeh, a tuetang pawt ah na boethen te yan boeh.

⁵ Sui rhaiphuelh soah aithilung a om bangla yukung buhkung ah tumbael neh lamnah khaw om.

⁶ Sui rhaiphuelh dongkah lungthen a om bangla yu a tui dongah tunding olthen khaw om

⁷ Na camoe dae a tueng atah thui ngawn, tedae voeinit lakah tah yet boel saeh, n'dawt bueng mah dawk thui.

⁸ Muep om cakhaw ol a yol neh bawt thui, a ming dae olka aka tuem hlang la om lah.

⁹ Hlang len lakli ah khaw vanat la thuenglaeng boeh, A tloe loh a thui vaengah caitawk mailai boeh.

¹⁰ Rhaek hmai lah khophaa a caeh lamhma bangla muelhtuet hmai ah oepnah khaw cet.

¹¹ A tue then vaengah nong lamtah hnukkhoem la om boeh, im la koe mael lamtah calnat boeh.

12 Na thinko loh a huem bangla namah khaw umya mai, tedae hoem ol lamloh tholhnah he om boel saeh.

13 Cungkuem boeih lakah nang aka suen te uem lah, amah loh nang te kutdoe then n'kum sak bitni.

Pathen kah Khokhannah

14 Pathen aka tlap long tah amah toelnah a doe ni, amaih tlap hamla yueya aka tho tah kolonah a hmuh ni.

15 Olkhueng aka tlap tah te nen te baetawt veih, hlangthai palat tah te soah te paloe ni.

16 Boeipa aka rih long tah laitloeknah khaw a thuem la boel ni, te vaengah duengnah te vangnah bangla a tok ni.

17 Hlang tholh long tah toelnah te a aek vetih, oltloeknah khaw amah kongaih bangla a tlap ni.

18 Aka khuel hlang long tah poeknah te a poek ni sawtrhoel pawh, thinthah neh thinlen tah rihnah long khaw a cahoeh tloel.

19 Na thuep mueh la mebang khaw saii boeh, Tedae na sal bal atah yut boeh.

20 Caeh thae namtlak ah khaw cet boeh, longkoek ah hna voei la tongtah boeh.

21 Long then ah khaw hmae aih boeh, Na namtlak te a then la hnatungnah khueh.

22 Namah ca rhoek nawn khaw ngaithuen.

23 Bitat boeih dongah namah khoembael uh, he tlam ni olpaek na tuem eh.

24 Olkhueng aka tuem long tah amah khoembael uh, Boeipa tongah aka patung tah yawk tlaih mahpawh.

33

¹ Boeipa aka rhih te a thae loh a tlak thil mahpawh, Noemcainah khuiah om mai cakhaw koep koep a hlawt ni.

² Hlang cueih loh olkhueng a thinah moenih, Tedae hlangthai palat tah hlipuei khuikah lawng bangla om.

³ Aka khuel hlang tah olkhueng dongah pangtung ni, Te bang hlang loh olkhueng neh Pathen olrho te hmaih a khueh.

⁴ Na thui ham rhoekbah lamtah hnaton ham khaw cet, Na cangnah te tarhit lamtah olannah khaw khueh.

⁵ Hlang ang kah thinko tah leng kho banghui ni, a poeknah tah hmueicung bangla tinghil.

⁶ Paya saipat khaw marhang tal banghui ni, Aka ngol loh bang a tinah pawt akhaw phit mailai.

Hlanghing kah a Langnah

⁷ Balae tih hnin at lakah hnin at he a olpuei, kum khat khuiah khomik puet a vaengah he.

⁸ Boeipa kah cueihnah long ni te rhoek te a lang sak, amaih loh khoning neh khotue khaw a hloeh la a hoep.

⁹ Khohnin a ngen tah a thangpom tih a ciim. a ngen tah omthawt khohnin la a khueh bal.

¹⁰ Hlang boeih he diklai lamkah ni a thoeng, Hlanghing tah laipi lamkah ni a suen.

¹¹ Boeipa amah kah mingnah cungkuem neh a soepboe tih a longim khaw hloep a khueh pah.

¹² A ngen tah yoethen a paek tih a pacuet, a ngen tah a cim sak tih amah taengla a khueh.

Tedae a ngen tah thae a phoei tih a hlak, te vaengah amih kah a hmuen khaw a thoeih pah.

¹³ Ambop kut dongkah amlai bangla amah kongaih bangla a hlom a bol.

¹⁴ A then he a thae neh kingkalh tih hingnah khaw dueknah neh kingkalh. hlang tholh khaw hlangcim neh kingkalh bal.

¹⁵ Khohni kah kutngoe ke boeih so lah, a bokbok la ha thoeng tih, Khat neh khat he boeih kingkalh uh.

¹⁶ Kai tah ihsap due lamhnuk la ka om coeng misur aka yoep hnukbat cangmoyoep bangla ka om.

¹⁷ Tedae Boeipa kah yoethennah rhangneh lamhma la kapai, Te dongah misur ka yoep bangla ka va-am khaw ka than.

¹⁸ Kamah bueng ka thakthae pawh tih, Thuituennah aka boeih ham ni tila poek.

¹⁹ Kai ol hnaton lah, nangmih pilnam lakli kah hlanglen rhoek, nangmih hlangping mawtkung rhoek, na hna kaeng uh lah.

Khuehtawn

²⁰ Yuu, ca khaw, manuca neh paya akhaw, Na hingkhuihah tah namah soah thaomnah pae boeh. Na kawn te khaw hlang tloe pae mailai boeh, na lubuei na hoi vik vetih koep na hoe ve.

²¹ Namah na hing tih na hil a om khuiah tah, na hmuen te hlang rhawt sak boeh.

²² Na ca loh nang taengah lamkah a bih lakah, te dongah ca kah kut doe na sawt te then ngai.

²³ Na saii boeih dongah a khuetnet la om saeh lamtah nang hinyahnah soah khonuen vaihuk om boel saeh.

²⁴ Na hingnah khohnin a bawtnah tue ah, na dueknah hnin ah mah na rho te tael.

Sal Sawtletnah

²⁵ Kamvuelh, cungcik neh hnopuei he laak hamla om tih, buh, rhilam neh bibi he sal hamla om van.

²⁶ Sal te bi la na tuei daengah duemnah na hmuh eh, a kut a hoeng la na khueh koinih yalponah a tlap ni.

²⁷ Hamkun neh kamrhui loh rhawn a koisu bangla, hloong neh phaepnah he sal thae rhoek ham om coeng.

²⁸ Anih te bi la tueih, te daengah ni a palyal pawt eh,

²⁹ Palyalnah long he hnothae ni muep a cang sak.

³⁰ Anih te bibi la khueh, amah neh a naai uh la om saeh, Tedae a ngai pawt oeh atah hloong neh rhap khoh. U ca khaw hnorhieh aih la khueh boeh, u ca khaw a loh la saii boeh.

³¹ Sal khueh duen te namah pum bangla lungnah anih te thii nen ni na lai. Sal na khueh duen te na manuca bangla so, na hingnah na ngoe bangla anih khaw ngoe ni. Anih te a tloh la na phaep koinih, Vik yong vetih namah n'yong tak ni. Te vaengah anih tlap ham te me long lae na caeh e?

34

Mang khaw a Hong ni

¹ Kotalh rhoek loh a hong neh laithae a ngaiuep a mang kah neh hlang ang rhoek te a mikhip.

² Mueihlip a tuuk tih mueihlip a hloem banghui la, mueimang kah he u long a tangnah moenih.

³ Mueimang kah a hmuh khaw amah a tuengnah mai ni, a maelhmai koep a dang banghui mai ni.

⁴ Tuinu khuiah tuicil a om thai pawt bangla olhong khuiah khaw oltak a om thai moenih.

⁵ Kutyaek, bihma neh mueimang khaw a hong ni, bungtlloh vaengkah huta bangla lungbuei ah mang a tuk.

⁶ Khohni kah taenglamkah tukkainah neh han tueih pawt atah amih taengah hnakaeng ham khaw a om moenih.

⁷ Mueimang long he hlang muep a phok coeng, mueimang dongah ngaiuepnah aka khue khaw poci coeng.

⁸ Olkhueng tah te bangla thailatnah om muehla soep Cueihnah khaw uepom kah hmuilai ah cung coeng.

Saya Bangla Mingnah

⁹ Lungming hlang loh muep a ming, aka phaep uh longnah metla a thui khaw a ming.

¹⁰ Aka phaep uh mueh loh a yol ni a ming

¹¹ Tedae a yincaeh kah a hmat loh muep a cueih sak.

¹² Yincaeh vaengkah hno muep ka hmuh, ka yakmingnah he a ka phong thai lakah yet.

13 Dueknah mueirhieh khaw ka pah taitui, tedae he ka tongnah rhangneh koep ka loeih.

Boeipa Rhihnah

14 Boeipa aka rhih rhoek kah mueihla tah hing ni,

15 amih ngaiuepnah khaw amih aka khang Boeipa dongah om.

16 Boeipa aka rhih tah a rhalyawp mah pawh, rhalrhieh loh luemnah cakhaw Boeipa ni a ngaiuepnah.

17 Boeipa aka rhih tah a hinglu khaw a yoethen,

18 U long anih te a sawt? U long anih te a bom?

19 Boeipa kah mik tah amah aka lungnah taengah ni a om Boeipa tah photling len neh duelkung thaom la om. Hli hueng vaengah hliyingnah, kothun ah khaw hlipkhup aka paloe khaw a tungaep tih, a cungku khaw cawt a duel.

20 Hinglu te a dangrhoek pah tih a mik te khaw a cil sak, cadingnah, hingnah neh yoethennah khaw a paek bal.

Hmueih Nawnnah

21 A huen hno neh aka nawn khaw, a nawnnah te cim pawh,

22 hlangthae pakha kah kutdoe khaw doe koi moenih.

23 Laitlak kah nawnnah te Khohni loh a doe pawt tih nawnnah muep a yet dongah mamih tholhnah a rhen moenih.

²⁴ Khodaeng kah koe a loh tih nawnnah aka pae hlang tah, a napa mikhmuh ah a capa aka ngawn hlang banghui pawn ni.

²⁵ Aka vawtthoek kah buhtling he khodaeng kah hingnah ni, amih aka yoop te hlang aka ngawn ne vai uh.

²⁶ Imben kah khosaknah vik aka rhawt khaw hlang aka ngawn neh vai uh,

²⁷ Bibi kung thapang aka yoop khaw thii aka long sak neh vai uh. ²⁸ Hlang kah mikphi soah im aka sa khaw om,

²⁹ Tedae a bibi a tloh phu te balae aka om? Pakhat te thangthui tih pakhat loh thae a phoei, Boeipa loh u kah ol nim a hnaton pa ve.

³⁰ Rhok aka taek loh tui a hluok dae koep a taek atah Tui a hluok phu te balae a hoeikhangnah a om.

³¹ Hla khat loh a tholnah soah a yaeh coeng dae koep cet tih amah pawtlawt la koep om U long a thangthuinah a hnaton pa pai eh amah a kunyunnah te khaw balae a hoeikhang eh?

35

Olkhueng neh Nawnnah Hmueih

¹ Olkhueng aka tuem long nawnnah muep a khueh,

² Olpaek dongah lu aka thuk loh nawnnah a then a khueh.

³ Rhennah koep aka thung loh cangsawt bangla a nawn.

⁴ Doedannah khueh tah uemonah hmueih ni a nawn.

⁵ Halangnah lamloh cue uh he Boepa kolonah la a om. Boethae toengnah he khaw tholh ciimnah la om.

⁶ Boeipa mikhmuh ah kuttling la pumphoe boeh,

⁷ Te tla na nawn boeih te olpaek a soepnah ham ni.

⁸ Hlangdueng kah nawnnah long tah mhueih-tuk a men sak, te ni Khohni hmai ah hmuehmuei botui la a pai.

⁹ Hlangduen kah hmueihnah doe koila om, te tah hnilh uh tlaih mah pawh.

¹⁰ Boeipa na bawk vaengah moeihoeih la om, Na kut dongkah thaihcuek te sihnah boeh.

¹¹ Kut doe boeih long he maelhmai a hlampan sak, Parha pakhat te kohoenah ne pae.

¹² Amah loh nang m'paek bangla Khohni taengah pae, na noeng thai khuiah khaw na tha huel.

¹³ Boeipa tah hlang a thuung la om, Te dongah nang a rhaep parhih hil n'thung ni.

Pathen kah Tiktamnah

¹⁴ A kavelh te Boeipa taengah nawn boeh, Te bang te Boeipa loh a doe moenih.

¹⁵ A huen hno kah hmueih dongah khaw Boeipa tah laitloekkung la om tih, a taengah maelhmai dannah khaw a om moenih.

¹⁶ Amah loh khodaeng khaw hlaang mahpawh, aka thae kah thanguinah khaw hnaton mahpawh.

¹⁷ Cadah kah huithuinah khaw hlapam pawt tih, nuhmai lo kosi a sah te khaw a ngai.

18 Anih aka tap rhoek te a cungku hil a rhah bangla

19 Nuhmai kah mikphi he a rhawn kung hil ah long mahpawt nim.

20 Boeipa kongaih la aka pongtho ni a doe vetih, a thangthuinah long khaw khomai so duela a pha eh.

21 Tlayae kah thangthuinah long khomai khaw a muk, a bawtnah a pha hil duem tlai mahpawh.

22 Hlangdueng ham tah a tiktam la a saii tih, Laitloeknah a khueh. Hlangrhal loh a ueh pawt bangla

23 Boeipa he ngueth ngawn mah pawh. Sathueng satlung rhap a phop hil ngawn tah. Namtom taengah tawnlohnah a thuung vetih thinlen rhaengpuei te a phae hil atah.

24 Hlang hing te amaih khoboe tarhing bangla, a poeknah tarhing kah a saii boeih soah khaw a thuung ni.

25 A pilnam kah lai te a tloek pah vetih, amah kah rhennah khuiah amih te omngaih la a khueh ni.

26 Khokang tue vaengkah khotlan khomai bangla A rhennah he tah ngaih mang tue vaengah aka thoeng la om.

36

Pathen Hlang kah Thangthuinah

1 Cungkuem boeih Pathen aw, Kaimih soah he rhennah khueh lah.

2 Namtom boeih taengah khaw, namah rhimomnah te khueh pah lah.

³ Kholong namtom taengah na kut thueng lah, amih loh na tlungthangnah te hmuh van saeh.

⁴ Amih taengah na cimnah tuengnah nan hnonah bangla kaimih taengah thangpomnah tueng ham amih hnonah lah.

⁵ Ka ming uh bangla ming uh van saeh lamtah Boeipa namah phoeiah tah Pathen a tloe om pawh.

⁶ Minoek thai neh a tloe kopoekrhai bibi te pae lah

⁷ na kut neh bantang ban loh rhuepomnah tueng sak saeh

⁸ Na thintoek te haeng lamtah kosi te khaw sah laeh

⁹ rhal te phae lamtah thunkha te khoe laeh.

¹⁰ Thintawn khohnin neh, tuentahnah tue khaw poek laeh, na tlungalnah khoboe te pilnam loh tae van saeh.

¹¹ Aka sueng duen khaw kosi hmailing dongah tlum saeh, na pilnam nganboh aka pae te poci-nah tong saeh.

¹² Ukkung boethae tah a lu pop saeh, Anih long te, “Kai phoeiah uh khaw om pawh,” a ti lah ko.

¹³ Jakob koca rhoek te boeih coi laeh, Na khopuei cim Jerusalem ke lungma ti mai laeh, Te ni na omnah hamla na tuek.

¹⁴ Zion Tlang kah na bawkim he Thangpo, mnah, koehnah laa neh baetawt sak lah.

¹⁵ A tongcuek lamloh na suen na pilnam ham tah phong lah, na ming neh na thui tonghma ol te khaw soep sak lah.

¹⁶ A tongcuek kah bangla a rho te amih taengah pae laeh,

17 Boeipa aw nan ming aka khue pilnam te rhen lah, Na coming, Israel la a ming na sui soah khaw.

18 Na hmuencin khopuei soah khaw lungma ti laeh, a omnah Jerusalem soah he khaw.

19 Zion te na rhuepomnah he baetawt sak, na bawkim te namah thangpomnah te baetawt sak.

20 A cuekca kah na suen rhoek hamla laipai pah, naming rhangneh tonghma ol a phong te soep sak.

21 Namah aka lamtawn te thaphu pae lamtah, na tonghma rhoek khaw uepom la phoe van saeh.

22 Boeipa aw na tueiyoeih kah thangthuinah he hnatun lah, namah kongaih te na pilnam taengah om van saeh. Diklai dongkah aka om boeih long khaw, Khosuen Pathen, Boeipa la na om te m'ming saeh.

Paekboenah

23 Bungpuei loh caak khat khaw a doe coeng dae caak khat he pakhat lakah tui bal.

24 Dang loh maehkah khaw muep a ten bangla Lungbuei aka cueih loh laithae ol te a tuei.

25 Lungbuei aka maelh tah kothae a thoeng sak, tedae aka phaep uh tangtae loh anih koel a thuung ni.

26 Patong nu long tah tongpa boeih te a va la poek, hula long tah pakhat te ni rheap a tuuk.

37

Laithae Paya

¹ Hlang boeih loh, “Kai la paya” a ti uh, Tedae paya a ngen tah a ming hong ni paya la a om

² Paya thintlo te thunkha la a poeh vaengah tah amah a duek bangla a kopoeik a tloh moenih a?

³ Laithae neh diklai boeih khuk hamla, boethae taengla aka yoei nang melam kah ni na lo.

⁴ Pueipo a ngen tah paya kah omthennah dongah omngaih, Tedae a rhainah tue ah amah te hnap a tloelh uh.

⁵ Pueipo a ngen loh a bungpuei hamni paya a bom, ralthohnah ah pataeng pohtling a dan pah.

⁶ Caemrhal vaengkah na paya te hnilh boeh, Kutbuem na rhae vaengah khaw anih te, poekmueh la om boeh.

Poeknah dongah Rhalrhingnah

⁷ Baerhoep boeih loh amah kah a paek cilsuep te a koeh, Tedae a ngen longtah amah kavelh ngaihnhah dongah cilsuep a paek.

⁸ Te dongah baerhoep ti khaw rhalrhing, Lamhma balae a ngaih ti ming pah, Amah ham ni poeknah khaw a loh hae eh.

⁹ Nang taengah hmulung a naan vetih, “Namah ngaih la saii” a ti ni. Te vaengah hoei pai vetih, Nang sokah aka thoeng te a dawn ni.

¹⁰ Nang soah ngaihoihnah aka khueh khaw dawt boeh, nang aka uet taengah tah na mataengnah khaw phah.

11 Huta taengah a thimkalth kawng rhalyawp taengah caemtloek kawng, Thenpom taengah bitat kawng hnolai taengah hnoyoih kawng Moeithae taengah moeih kawng, Ngukngak taengah rhennah khawng Palyal taengah bibi kawng, bibi aka kohuet taengah bibi la aka tlung kawng, Sal bingak taengah bibi len kawng dawt boeh. Cilsuep a thui akhaw ngaiyaknah boeh.

12 Tedae Pathen hlang la om tih, Olpaek a tuem tila na ming hlang nen tah yok uh pai.

13 Na lungbuei kah cilsuep dongah tah na lu thuk pai, te soah namah lakah uepom hlang a om moenih.

14 Mah lungbuei kah long tah n'yaak lakah a then n'khoem bael thai, Rhaltoeng imsang kah rhaltawn parhi a ngol lakah khaw then.

15 Te boeih soah khaw Khohni taengah mah thangthui uh, na longpuei te oltak dongah a hoihaeng na saeh.

Cueinah a Thae a Then

16 Bibi boeih he tongnah cuek la thulainah om, poeknah long cungkuem boeih lamhma la a kae,

17 Lungbuei he moeboe kah imphu la om, Te dongah te a baek pali la cawn.

18 A thae neh a then, dueknah neh hingnah khaw, Hmuilai loh phat a uk a taem.

19 Pilnam a ngen tah hlang tloek cangpuei ham muep cueih Tedae amah tah a honghi la om.

20 Cal thai aih khaw hlang loh a thinah, anih te caak ni rhawp a vawttoek mai eh.

²¹ Cueinah boeih neh a vawt rhi coeng dongah, toemngannah kutdoe khaw Boeipa loh a buem pah.

²² Hlang he mah ah cueih lamhma koinih, a boethen thaih te khaw uem ham tueng pai.

²³ Hlangcueih long a pilnam a thuituen, te dongah a thaih then khaw nguel yoeyah.

²⁴ Hlang cueih tah koehnah loh a vuei, aka hmu boeih loh anih te a uem uh.

²⁵ Hlang kah hingnah khohnin he a tae thai, Tedae Israel kah khohnin ta a tae lek moenih.

²⁶ A pilnam hamla aka cueih tah hinyahnah te apang, Te dongah a ming khaw a yoeyah la hing.

Ciknah Kawng

²⁷ Ka ca aw, na hng vaengah namah noem uh, namah aka thae te hmu lamtah a taengah pae uh boeh.

²⁸ Hno boeih he hlang boeih hamla a then moenih, Hlang he hno boeih dongah a omngaih thai bal moenih.

²⁹ Buhtui antui dongah khaw mo aih boeh, Cue uh muehla caak khaw ca boeh.

³⁰ Caak voelh khaw tloh la om tih, carhut aih khaw loklai la hut.

³¹ Carhut aih dongah hlang muep duek, tedae aka cue uh a hing khaw sen van.

38

Siboei neh Sadingnah

¹ Siboei rhoek he a bibinah dongah a hinyah Amih te Boeipa long a suen khoem.

² Amih kah hoeihnah kutdoe tah Khohni taeng kah ni Te dongah manghai loh amih te thapang a paek.

³ Siboei rhoek kah thoemthainah loh amih a lang sak, pilnu mikhmuh ah khaw amih te khobae rhambae pawn ni.

⁴ Diklai dong lamkah si khaw Boeipa loh a phueng, aka cueih long tah te te a sit moenih.

⁵ Thing hlaeng loh tui a didip sak moenih a? te khaw Boeipa thaomnah ming saek a ti dongah ni.

⁶ Amah loh hlang taengah thoemthainah a paek, Te khaw kopoerhai bibi te amah n'thangpom saeh a ti dongah.

⁷ Te neh ni siboei long tloh khaw a koeih pah, Si aka sai long khaw amah te a thoek.

⁸ Boeipa kah bibi tah bawt mahpawh, amah taengkah sadingnah tah diklai pumah yilh cet ni.

⁹ Ka ca aw, na tloh vaengah te mong boeh, Boeipa taengah thui lamtah, n'hoeih sak bitni.

¹⁰ Na tholhhik te hnawt lamtah na kut a dueng la khueh, na thinko khaw tholhnah khui lamloh cim sak.

¹¹ Botui hmueih neh, buhham poeknah cang sawt khaw nawn, Na hmueih soah situi suep, na saithai khuiah sai.

¹² Siboei te a hmuen pae, Boeipa long ni anih te a suen, Anih te na ngoe dongah, na taeng lamloh nong sak boeh.

¹³ Siboei kut dong lamloh hoeihnah a thoeng he, A tuetang khaw muep om coeng.

¹⁴ Amih khaw Pathen taengah ni a thangthui uh, Hoeinah he tah hingnah aka hlawt la om.

15 Suenkung taengah aka tholh tah Siboei taengah khaw birhah van ni.

Duek vaengkah Rhahnah

16 Ka ca, hlang duek ham mikphi bo pai saeh, a tloh muep a ya tah rhah a rhuem ta. Rhokom vaengah khaw na pum rheap pae, Rhok thak hil khaw hlahpham boeh.

17 Na rhahnah khaw khahing sae lamtah na guek khaw nul saeh, na rhungnah khaw aka kum te tungta la khueh. Hnin nit, hnin at tah coelcanah khaw rhael mai, te vaengah a nguekcoinah lamloh na mong bitni.

18 Dueknah lamloh nguekcoinah thoeng maini, thinko kothaenah loh hlang thadueng a caep.

19 Kothae voelh long khaw hlang a khum sak, Khodaeng kah hingnah long khaw thiko a nan.

20 Dueknah khuiah ni nguekcoinah khaw a puek, te khaw boeih khoe lamtah na hmailong mah poek.

21 Ha mael voel pawt te khaw poek, Aka duek coeng ham a then na sai thai moenih, Te dongah namah ni na ngawn uh rhoeng eh.

22 A yoekam te khaw na yoekam la om tila poek Hlaem ah tah anih kah la om, ti hnin tah nang ham om coeng.

23 Duemnah dongah a duek coeng dongah, anih poekkoepnah khaw duem van coeng. Anih tah a mueihla khaw cet coeng, te dongah anih ham te hal mai laeh.

Thenpom neh Kutthai

24 Cadaek rhoek kah cueihnah he a hoenghoep-nah tuethen dongah om Bitat aka yanghoep hlang khaw hlangcueih la om thai.

25 Thae cung aka pom tih ma-ae mul aka rhuep khing, Anih te metlam lae hlang cueih la a om thai eh? Anih te vaito a vai, a bibi bueng a khuituk tih, sael kawng bueng la puet a thui.

26 A thinko te laikok kah hmakhuen dongah a hong tih, Saelca kah a kamvuelh bueng la a ngaithuen.

27 Kutthai neh kutthai boeih khaw te tlam ni, amih te khoyin neh kothaih ah khaw thakthae uh. Amih loh kutbuen kutnoek khaw a picai uh, a comluem neh ngaih om koila bahoeng a saii uh. Muei te mueihing bangla a hluk vaengah thingko a hong uh, bibi a coengnah rhi hil amih tah ngaithuen uh.

28 Te tlam te thidae khaw om tih, thilung neh ngol A thi dongah ne a paelki a pumsa a duih hil ah hmai te a hmuh, hmai-ulh hmailing neh thingthuel uh. A thilung ol khaw a hna dongah khang cu, a mik khaw tubael kah rhimong dongla om. A kutthai bibi a coeng hil a thinkoe a paek, a picainah a cung hil te a ngaithuen.

29 Te tlam ni ambop long a bibi a ngol thil, hmuikil lung te a kho neh a tinghil sak, a bisainah dongah a dung la a poek thil, te dongah a thaih khaw muep a thoeng sak.

30 Amlai te a kut neh a hlom, a phaldaep ca khaw a kho neh a saii a bibi a coeng ham khaw a thinko a paek, thoo neh a hluk vaengah khaw a ngaithuen.

³¹ He boeih he amih kut dongah om, Hlang boeih he amah bibi dongah boeih thoemthai uh.

³² Amih te a om pawt atah khopuei khaw a thoh thai moenih, A hing tue khuiah khaw bungpong la van uh mahpawh.

³³ Tedae pilnam rhaengpuei loh amih te toem uh pawt tih, Hlangping kah humtunnah dongah khaw thum sak uh pawh. Amih tah laitloeknah ngolkhoel dongah ngol uh pawt tih, Laitloek yung kah laitloeknah te khaw a ming uh moenih. Amih tah rhilam neh laitloeknah khaw thuicaih thai pawt tih, ukkung lakli ah khaw amih te a thum ngawn moenih.

Cadaek kah Pongthohnah

³⁴ Tedae amih long ni diklai kah rhoengnah a khoembael tih, Te dogah a ngaihuetnah ngawn tah thenpom bibi ham ni, Te dongah hlang amah pum a hloeh la lang van.

39

¹ Amih long tah hlamat lamkha cueihnah a tlap, tonghma olthui te khaw a paelki.

² Mingthang kah olthui khaw a khoem tih, thuidoeknah olkchoelh nen khaw phaep uh.

³ Olcueih kah thuingainah olhup a tlap tih, im ah khaw thuidoeknah olkael neh om.

⁴ Anih tah hlanglen taengah khaw olpai thai tih ukkung rhoek hmaiah khaw pumphoe thai. Kholong kho la yiin tih, hlanghing kah hmulung a thae then khaw a ming.

⁵ Anih tah yueya thoh hamla thinko a khueh tih, Amah aka suenkung Boeipa tlap ham

neh, Khohni taengah huithuinah khuen hamla. Thangthuinah ne a ka te a ang tih, a tholhnah dongah tholhhlahnah a bih.

⁶ Boeilen Boeipa loh a ngaih pa atah anih te yakmingnah mueihla a baetawt vetih, amah kah cueihnah loh te a thaa ni, thangthuinah neh Boeipa te a uem.

⁷ Boeipa loh a cilsuep neh mingnah a thuinuet vetih Boeipa kah olhuep aka thuep la om ni.

⁸ Anih te a cangnah soah cueihnah a tueng vetih, Boeipa paipi kah olkhueng dongah a thangpom ni.

⁹ A yakmingnah te muep a uem uh vetih, anih te hnawt uh tlaih voel mahpawh. Anih poekkoepnah te paa tlaih pawt vetih, a ming khaw cadilcahma boeih taengah hing ni.

¹⁰ A cueihnah te hamtom loh a thui vetih, anih koehnah te paeng loh a doek ni.

¹¹ A hing khuiah khaw thawngkhat lakah ming tanglue a khueh ni, duemnah te paan cakhaw anih ham ta rhoeh coeng.

Pathen Koehnah Laa

¹² Ka lungbuei loh phoe a ngaih muep om, Hla lum bangla ka lumkil coeng.

¹³ Ka ca uepom neh pailum aw, hnaton lah, soca tuikaeng kah a poe rhaipai kung bangla.

¹⁴ Hmueihtui bangla botui hlah laeh, Tuilipai bangla na pailum laeh.

¹⁵ A ming te tanglue la khueh lamtah amah koehnah neh a taengah uemnah khueh laeh.

16 Boeipa kah bibi tah boeih then tangkik, A thui boeih te a tue a pha caengah thoeng yoeyah.

17 “He tah balae”, “Ke tah balae,” a ti thai moenih, a tue a pha vaengah te oldawtnah khaw boeih a hlat. A ol loh tui khaw puluk la a pai sak, a ol a ka dongah tuitungim kah tui khaw om.

18 Ol a paek vaengah a mangtaengnah boeih soep, khangnah thadueng khaw u loh a khaih thai moenih.

19 Bibi boeih he amah mikhmuh ah tueng, A mik aka buep pah thai he a om moenih.

20 A tong lamloh a tue a bawt hil a cungkuem a hmuh thai, A nih hamla khobae rhambae ti a om moenih.

21 “He tah balae”, “Ke tah balae,” n'ti thai moenih, a cungkuem he a mangtaengnah bangla a suen coeng.

22 A yoethennah loh khohmuen rhamrhae te tuiva bangla a khuk, Te vaengah tuili bangla boeih a et.

23 Tedae a kosi loh namtom rhoek te a haek, khohmuen tuiphuet khaw lungkaeh la a poeh sak.

24 Uepom hamtah longpuei he dueng Tedae halang hamlat tangrhom hoeng la om.

25 A tong lamtah a then hamla hno then a suen, tedae hlangtholh ham tah hno then khaw a thae pah.

26 Hlang khosaknah nong a kungpuei la a kuek tah tui neh, hmai neh, thi neh, lungkaeh he Vaidam, suktui neh khoitui, Misur thii, situi neh hnicu he ni.

27 He boeih he hlangcim ham tah a then pah, Hlang tholh ham la a thae la vik a poeh pah.

²⁸ Tawnlohnah hamla khohli khaw a saii, Te dongah a thintoek loh tlang khaw a moelh sak. A poeknah hnin ah tah a thaa a huel uh vetih A saikung kah thintoek te paa bitni.

²⁹ Hmai neh, rhael neh, khokha neh, lucik khaw he boeih he tawnlohnah ham ni a phueng.

³⁰ Khohong rhamsa kah pumcu neh, saelkhui ta-ai rhulthae neh cunghang loh hlang tholh poci ham dan a tat.

³¹ Te long te Boeipa kah pinnah dongah bisai ham a ngaih sak, Diklai dongah a bibi hamla a sikim sak, Te dongah amah tuetang a pha vaengah tah A olpaek te aal uh tlaih voel mahpawh.

³² Te dongah a moecuek lamloh he boeih ka yakming coeng, te ka poek het coeng tih ca dongah ka khueh.

³³ Boeipa kah bibi tah boeih then, A cungkuem a ngoe tue van vaengah boeih a paek.

³⁴ U long khaw, "He tah ke lakah then," ti thai pawh, Hno then amah tuetang vaengah a khueh coeng.

³⁵ Te dongah na thinko boeih neh, ol neh Koehnah te saa lamtah Boeipa ming te uem laeh.

40

Hlanghing Patangnah

¹ Bi tloh he hlang boeih ham a suen pah, Adam koca rhoek te hamkun a rhih la a nan. A manu bung lamkah a suntlak paek lamloh, mulhing boeih kah a manu taengla a mael hnin duela.

² Thinko ngaih mangnah neh rhihnah he amih ham ni Te dongah a dueknah hnin ah tah a ngai cikcok uh.

³ Boei ngolkhoel dongah aka ngol rhoek khaw, laivai neh hmaiphu dongah aka kol sut khaw,

⁴ Didi himbai neh rhuisam aka khuem lamloh a pawn savawk a pai hlang hil ah khaw,

⁵ thintoeknah neh, uetnah neh, ngaihmanah, mawnnah, dueknah rihnah neh, tohhaemnah, puenpa khaw om Hlang he a thingkong dongah a yalh vaengah hlaem kah a ih vaengah khaw a ngai cikcok.

⁶ Kolkalh khaw duemnah a dang moenih, a ih vaengah khaw kothaih bangla thingthuel uh.

⁷ Hil-uepnah vel a pha vaengah vik haenghang, lunglilungla la rihnah loh a let sak.

⁸ Mulhing boeih, hlanghing neh rhamsa taengah om, tedae hlang taengah a pueh voei rih hilah om.

⁹ Dueknah, thii longnah, puenthae neh cunghang khaw, citcai khaw, khokha khaw, pocinah khaw, lucik khaw pai.

¹⁰ He boeih he tah halang ham ni a phueng pah, amik kongah ni diklai khaw tuili loh ana et.

¹¹ Diklai lamkah tah diklai mael tih, Vaan lamkah tah vaan la mael.

Songrhainah khaw Cikngae mahpawh

¹² Kavelh caaknah neh a thuem pawt tah poci ni, Tedae a then tangnah tah cak yoeyah ni.

¹³ A thuem mueh la aka boei khaw tuiva bangla kak, a pocinah khaw hlipuei khuikah rhaeh ol bangla cai.

¹⁴ Moeihoeih hlang tah omngaihnah a coeng sak, Tedae olkhueng a aek rheap poci ni.

15 Hlangmuen ca rhoek tah a paek yol, a yung khaw koh tih thael rhaep ah kingkaek.

16 Tuiva tui taengkah carhaek kung tah, a tloe khopol lakah yue a phuk.

17 Tedae rhennah he tah yoethennah dum bangla om, hlang doedannah he khaw dungyan duela guel bal.

Omngaih Hingnah

18 Khuehtawn neh thapang loh khosak a tui sak, tedae thakvoh aka hmuh khaw then ngai bal.

19 Camoe neh khopuei kah imsak khaw pakhat ming longni a thoh, te lakah khaw cueihnah ka hmu tah then ngai bal. Saelhung neh cangpai loh hlang a boei sak Tedae a yuu khoboe aka then tah te rhoi lakah then.

20 Misur neh toembael loh ko a hoe sak, Tedae paya lungnah he te rhoi lakah then.

21 Phavi neh rhotoeng loh laa a tui sak Tedae olding tah te rhoi lakah then.

22 Mik loh sitlohnah neh sakthen te a nai, tedae cang sai hingsuep tah terhoi lakah then.

23 Paya neh pueipo he khaw n'doe yoeyah, Tedae yuu aka cueih he te rhoi lakah then ngai.

24 Huiko neh bomkung he tah ngaih mang tue kah ham ni Tedae doedannah loh te rhoi lakah a then la a hlawt.

25 Sui neh tangka loh paihmuen a cak sak Cilsuep then tah terhoi lakah a ngaihom ngai.

26 Boeinah neh thaomnah loh uepangnah a thoh, Tedae Boeipa rhih he te rhoi lakah then ngai.

²⁷ Boeipa rhihnahtah yoethennah dum la om, thangpomnah lakah hlang a thing a cam ngai.

Rhaidaeng la Kutduennah

²⁸ Ka ca, na khosak te buhbihnah la khuen boeh, m'bih lakah tah n'duek ham he then ngai.

²⁹ Hlang loh a hui kah caboei bung a sawt vaengah, a khosak long te khaw khosaknah la a poek moenih. Pakhat long tah hlang kah buh an soah a yah a voeih, Tedae aka cueih neh a thuituen hlang tah amah tuem uh.

³⁰ Yahdaeng kah a ka ah buhbih khaw a tui pah, Tedae a khuiah tah hmai la a ung pah coeng.

41

Dueknah Kawng

¹ Aw dueknah, nang poeknah khaw khahing mai, A khuehtawn sokah a ngai aka mong taengah, Mawnnah om pawt tih, a soeprhaep kho aka buh taengah, Bi rhang tih buh an ngaikhuek la aka om taengah.

² Aw dueknah na oltloek te metlam n'doe lah eh, vawtthoeknah om tih thadueng aka tla taengah tah. Patong loh a kae tih cungkuem aka mawn aka tang, kalthalh la aka om tih thinsennah boeih aka bawt taengah tah.

³ Nang hamtah dueknah oltloek te khaw rhih boeh, Nang hmai kah aka cet rhoek neh, na hnukah aka lo rhoek te khaw poek.

⁴ Hetah pum sa boeih hamla Boeipa kah oltloeknah coeng ni, Balae tih Khohni kah kongaih te na aek mai eh. Hingnah eh kum rha, kum

yakhat, kum thawng khat lo sitio cakhaw, Hell ah rhae n'dawt mahpawh.

Halang kah Yoekam

⁵ Hlangtholh kah a ca tah rhalawt ca lam ni a om, amih long te Pathen mingmueh khosak ni a vai uh.

⁶ Hlang tholh ca kha a rho ta poci ni, a tiingan khaw a yoeyah hil yah a poh ni.

⁷ A napa lailak te a ca rhoek loh a khotohnah ni, anih rhangneh kumhal yah a poh uh van dongah.

⁸ Anunae nang lailak rhoek aih, Khohni Pathen kah olkhueng aka voei rhoek aih.

⁹ Ca na khueh cakhaw, citcai ni a yaak eh guekcoinah ham ni a mih te na sak eh. Na paloe vaengah omngaih vetih, Na duek te khaw thaephoeinah hmulung la om coeng.

¹⁰ Diklai lamkah na lo bangla diklai la na mael ni, Lailak ngawn tah thaephoeinah lamloh pocinah a paan.

¹¹ Pilnam long he pumsa dueknah dongah rhap uh, Tedae hlang tholh kah ming thae tah a phae yoeyah ni.

¹² Na ming dongah khaw ngaithuennah khueh, Te tah namah lah muep hing vetih Suitlang a thawng khat lakah khaw oe ngai ni.

¹³ Khosak then khohnin tah n'tae thai, Tedae ming then tah a dungyan duela cak.

¹⁴ Ka ca aw, nang n'phaepnah soah a thuem neh rhoepnah neo om. Cueinah a phah neh

hmuh mueh kawntthen, melae a phu aka om tloe eh?

Cikcoknah

¹⁵ A cueihnah nah a thuh hlang lakah tah, a angnah aka khoem te then ngai.

¹⁶ Te dongah ka ol dongah hinyahnah tueng sak, A tue takuem yahyongnah he then pawt tih, cikcoknah boeih pom he pom ham om pawh.

¹⁷ Na nu neh na pa mikhmuh ah na cuk na halh te khaw Ukkung mangpa hmaiah na laithae te khaw,

¹⁸ hlangcal laitloek hmai ah na boe te khaw, Pilnam rhaengpuei hmaiah olkhueng na poe khaw, Paya rhoihui hmai ah a thae la na om khaw,

¹⁹ Na om nah kho ah na huen te khaw yak saw. Olkhueh neh olhlo na phae te khaw, Buh kung ah kut na vikvawk soeh khaw, paeknah neh doenah dongah kho la na hmuep khaw,

²⁰ Nang aka uem taengah ol na mueh khaw, Pumyoi bueng na dan te khaw,

²¹ Pacaboeina khaw rhenbihnah na hnawt te khaw, hlang buhham neh kutdoe na mom te khaw, Hlang yuu dongah na yalh te khaw,

²² A salnu pum dongah om na rhoi te khaw yak saw. A thingkong te khaw paan boeh, Paya hmuh olthae hlah boeh.

²³ Kutdoe na paek hnukah olthae neh pahoi bawt boeh.

42

¹ Na yaak lalah olhuep na phoe te Na yah ni koep na koei coeng. A tuengta ah na yah khaw na khueh ni te daengah ni pilnam kah kolonah na hmuh eh. A dangkah hno aka om dongah yak boeh, maelhmai a suengnah ham khaw tholhnah saii boeh.

² Khohni kah olkhueng neh a paipi dongah khaw, Lailak rhoek soah a tuengta la laitloek ham khaw,

³ Rhoihui neh yincet puei kah cayin khoem ham khaw paya kah rho caekboe pah ham khaw,

⁴ Coi neh colung a thuem khueh ham kha, a yol a yet khaw rhen dang ham khaw,

⁵ Thenpomnah lamlloh a hoeikhangnah ham khaw, Camoe thuituennah dongah khuituk ham khaw, Sal thae kah a nam ah thii long sak ham khaw,

⁶ Uepvawt nu kongah kutha khueh ham khaw, kut a yet nah ah thoh kalh ham khaw yak boeh.

⁷ A casai na khueh vaengah rheap tae lamtah loeng dae, na paek tih na doe vaengah khaw ca dongah boeih khueh.

⁸ Anglat neh angvawk la ka om khaw, patong uicuk aka tholh khaw toel ham yak boeh. Te daengah ni a thuem thuituenkung na om vetih, hlang boeih loh nang te n'doe eh.

Canu neh Napa

⁹ Canu long a huep la a napa a mawntang sak, te dongah a ngaisaknah loh a ih khaw a rhawt pah. A camoe vaengah nim, va sa pawt vet tila

lakueng, a rhukom phoeiah nim vik hnoel mai koinih,

¹⁰ A oila bal nim te hlang loh poeih vetih a napa im ah vik vawn ve a ti bal Va a khueh nim te vik hnukpoh koinih, a rhukom phoeiah khaw cakol la om mai koinih ti a rhih.

¹¹ Canu thinlen te tah khak dawn laeh, Namah te na thunkha taengah aka lawn la om ve. Khopuei neh pilnam rhaengpuei taengah ol n'boep sak vetih, hlangling pasae lakliah namah te yah m'bai ve. A imkhan ah thohhue a om pawt ham so lamtah, a im taengah thohput a om pawt ham khaw dawn.

¹² A hlang then te tongpa hmuh ah tueng sak boeh, amah tue rhukom nu taengah hnonah saeh.

¹³ Himbai he khaw keet la poeh thai tih, huta lamloh huta kah a boethae khaw thoeng.

¹⁴ Tongpa kah a halangnah he huta kah boethen lakah phoeng, Huta long he yahpohnah neh mingthae khaw a phueih thai.

Pathen Kutngo

¹⁵ Boeipa kah bibi dongah ka lungbuei a thoel pawn ni Ka hmuh te khaw ka doek pawn ni. Boeipa kah ol loh a bibi te a coeng sak a sai hluen boeih te a kongaih bangla a om sak

¹⁶ Khomik loh a cungkuem te a vangnah ne a hmuh, Te dongah a bibi khaw amah thangpomnah neh bae.

¹⁷ Amah kah kopoekrhai bibi boeih te tae thai hamla a hlangcim pakhat pataeng a thaphoh moenih. Te te Tlungthang Boeipa loh a thoh

coeng, te daengah nih lunglai boeih tah, amah thangpomnah dongah a cak eh.

¹⁸ Tangrhom dung neh hlang thinko khaw a khe tih, A khuisaek kah olhuet khaw a yakming. Khohni loh metla a om koi khaw boeih a ming, khosuen lamkah neh aka thoeng ham khaw a hmuh.

¹⁹ Aka om tangtae neh aka om koi te a phoe tih, a huet a hael kah te khaw a tueng sak.

²⁰ Amah rhael hamkhaw poeknah om pawh, amah taengah pakhat khaw m'phah thai moenih.

²¹ A cueinah rhuepomnah te tluetluet a khueh, Amah tah dungyan lamloh ha thoeng tih amah la om. U long khaw thap pah thai pawt tih yueh pah thai pawh, anih te poeknah paekung la u khaw a kuek moenih.

²² Boeipa kah bisai boeih tah a nai om tangkik te te sawt vaengah lekkek phaa.

²³ He hno boeih tah hing tih dungyan duela om, a ngoenah ah hnonah ha a saihluen te rhip a khoem.

²⁴ Te boeih te a bok la om tih khat neh lang coeng, A soep mueh la a saii hno he a om moenih.

²⁵ Pakhat loh pakhat kah a thennah a thap pah, A thangpomnah hmuh ham te u lae aka bong bal pueng?

43

Khomik kah Rhuepomnah

¹ Sosang koekkah pomsangnah tah vaan khocil ke ni, Vaan mikhmuh kah sawt ham thangpomnah la om bal.

² Khomik a thoeng vaengah, amah a thoeng te a phoe, Khohni kah kutngo kopoekrhai tubael om.

³ Khothun loh khohmuen a vo tih, u long lae kholing kah a do te a noeng thai.

⁴ Hmai-ulh dongah bi aka bi te hmailing loh a do, Te lakah khomik loh tlang a do te a pueh pathum la ling. Hmai hu te khaw a phuh tih, khosaeng kah a aa loh mik a dael sak.

⁵ Te te aka saii Boeipa tah len tangkik, A olpaek khaw a longpuei cet paitok.

Hla Kah Rhuepomnah

⁶ Hla tah khoning a hoi vaengah noeknah la om khonoek a uk tih, dungyan miknoek la om.

⁷ Hla dong lamloh khotue hnin kah miknoek khaw om, hla a lum vaengah tah a coengnah khaw soep.

⁸ Hla sae khaw, a ming a paek bangla, koep thai, he tla a hoilae khaw khobaerhambae pawn ni. Sosang kah caempuei taengah hmaidi la om tih, vaan kah vaikhap dongah vaang.

Aisi Pampacung kah Rhuepomnah

⁹ Aisi kah thangpomnah tah vaan kah sakthen-nah la om, Boeipa kah hmuen sang a aa loh a tueng sak.

¹⁰ A Cimkoek kah olpaek rhangneh Pai hmuen a hmoel pah dongah rhip pai uh. A bibinah dongah khaw ha sak tlaih pawh.

¹¹ Pampacung ke so lamtah, te aka suen te koeh lah, a aa dongkah a thennah khaw khuet coeng.

12 Thangpomnah payaicung bangla vaan ke a hil, Khohni kah kut te a yueng phai.

Lunglai kah Khobaerhambae

13 A olpek rhangneh vuelsong a tlak sak, Te vaengah a laitloeknah rhaek khaw thui.

14 Te dongah a khai-im ong uh tih khomong te vaa bangla ding.

15 Khomai khaw a rhuepomnah rhang thadueng a paek, Te dongah rhaelnu khaw a nuei la boeih rhek.

16 Amah a thoeng vaengah tlang khaw hinghuen tih, a kongaih rhang neh tuithim yil khaw cu.

17 A rhaek ol loh diklai a ho vaengah tah, Tlangpuei lamkah hli thae neh humhae halo. Amah loh vuel te vaa aka ding bangla a haeh, kaisih a rhum bangla lukluk khi.

18 A bokthik kah a then loh mik phak tue, te a tlak vaengah a lungbuei khaw a ngaih mang.

19 Diklai ah tuihu te lungkaeh bangla a phul, te vaengah hling ka a hmui bangla a sum.

20 Tlangpuei yilh ding a caeh vaengah, tui soah khaw tuikhal la khal coeng. Te te tubuem tui boeih dongah a khueh, te dongah tui te rhangpho bangla a poeh sak.

21 Tlang khaw a hlup tih khosoek khaw a hoeh, rham tlim te khaw hmai bangla a koh sak.

22 Dotui loh a cungkuem te koe a hoeih sak, Buem a bo vaengah kholing lamloh a hilhoem uh.

23 A mangtaengnah rhangneh a dung kahw a duem sak, Te dongah a sokah tuisanglak te tloep a hol pah.

24 Tuipuei hlaikan rhoek loh a rhihom khaw a thui, mamih loh n'yaak vaengah n'ngaih mang uh.

25 Te khuiah tah aka lang tih kopoe krhai mulhing khaw om, aka hing hno boeih neh tuiham puei khaw om.

26 Boeipa rhangnen ni a puencawn rhoek khophoeng a pha, A ol rhang neh a cungkuem te a cului bal.

27 Muep n'thui thai dae a thui n'hah pawh, a hnukkhueng ol lamtah, "Amah tah a cungkuem la om".

28 Amah koehnah ham thadueng te melam m'hmuh eh, Amah tah a bibi lakah khaw khuet ngai coeng.

29 Boeipa tah khuet tih len tangkik, a saithainah khaw khobae rhambae pawn ni.

30 Boeipa te thangpom lamtah na coengnah boeih neh amah te pomsang lah. Amah long tah a cungkuem khaw a poe, Amah na pomsang vaengah na thayung boeih huel Te vaengah tawnbanah khaw khueh boeh, Boeipa te a hah la na koeh thai pawt ve.

31 U long a hmuh thai vetih, uh long a thui thai eh, Boeipa a coengnah bangla u long a pomsang thai eh.

32 A huep kah aka yalh lakah he a len muep om pueng, a bibi dongkah a yol ca ni ka hmuh bal pueng.

33 Boeipa loh a cungkuem a saii coeng, tedongah Pathen hlang ni cueihnah a paek.

44

PATUEL RHOEKKAH LAA

¹ Ming thang hlang rhoek koehnah laa sa uh sih a pa rhoek kah a duengnah dongah khaw.

² Boeipa loh amih te thangpomnah len neh, A cuekca lamlah a rhuepomnah te a yo sak.

³ A ram aka uk khaw ana om tih amamih kah tingtawknah loh amih ham ming a om sak. Lungming hlang loh cilsuep ana thui pa tih, amaih loh tonghma olrhuh khaw a phong uh.

⁴ A cilsuep rhangneh pilnam ana mawt, Amih mingnah rhangneh pilnam a lungcui, Amih tah olka uentonah dongah khaw cueih uh,

⁵ Amih te phungding oldi la a khueh tih Amih tah tingtoenglung la a daek.

⁶ Boei hlang loh a kawn te a soem tih, a imkhuiah ngaimong la kho a sak.

⁷ Te boeih te a cadilcahma duela a hiyah uh tih, Amah tue vaengah khaw a oep uh.

⁸ Amih khuikah hlangvan loh a ming a caehtak, te dongah a tloe loh amih koehnah te a phong.

⁹ Tedae a ngen tah poekkoepnah om voel pawh, a om pawt hnukah tah poeknah khaw hmata, Amih te aka thang pawt hlang bangla, Amih hnukah a ca aka khueh pawt bangla om.

¹⁰ Tedae amih khaw Pathen kah hlang rhoek ni, Amih hlangdueng rhoek kah khoboe tah n'hnilh moenih.

11 Amih kah khuehtawn te a cadilcahma taengah om vetih, a rho te khaw a ca kah a ca patong taengah om ni.

12 A cadil khaw paipi tongah pai tih, A ca rhoek khaw amih ham ni a om.

13 A tiingan tah a yoeyah la pha uh veih, amih thangpomnah ta paa tlaih mahpawh.

14 A pum tah mongnah khuiah a up uh dae a ming tah cadilcahma phoeikah cadilcahma duela hing

15 Rhaengpuei loh amih kah cueihnah a phong uh, Hlangping loh amih koehnah te a doek uh.

16 Enok tah Boeipa loh a uem tih a loh, cadilcahma boeih taengah yutnah miknoek la om.

17 Noah tah hlang soep neh hlangdueng la phoe, kosi tue vaengah aka hing namtu la a khoem. Tuili halo vaengah anih tah, Diklai ah a meet la a khueh.

18 Anih taengah dungyan paipi a saii tih, Pumsa hing boeih te tuili loh et voel pawh.

19 Abraham tah namtom hlangping kah pa puei la om, thangpomnah dongah tah anih bangla om noek pawh.

20 Khohni kah olkhueng te a kuem coeng dongah anih neh paipi khuila a kun puei. Anih loh amah saa te moi la a nawn dongah, a noem het coeng tih uepom la a pom.

21 Boeipa loh anih taengah olhlo a cak sak, a cadil dong lamloh natom rhoek a yoethen. Anih tah diklai ah laipi yet la a ping sak tih, a tiingan te aisi bangla a pom sang. Amih te tupuei lamloh

tuipuei hil rho a phaeng tih, Perath lamloh diklai khobawt hil a ping sak.

²² Isaak khaw a napa Abraham rhangneh, ngaikhueknah a paek coeng. Pilnam boeih kah yoethennah neh paipi tah ²³ Jakob lu dongah a tlak sak. Anih te a yoethennah neh a ming tih, a rho te a taengah a paek. A buhham khaw a moe nih, koca hlainit taengah a tael pah. Anih cadil khuiah Boeipa loh Pathen hlang a thoeng sak, anih tah hlang boeih mikhmuh ah mikdaithen la om.

45

¹ Anih te Pathen neh Pilnam loh a lungnah, Mose aka poek a yoethen.

² Boeipa loh anih te thangpomnah khuiah hlangcim vanat la a khueh anih te a tanglue sak dongah a thunkha loh a rhih,

³ A ol dongah minoek khaw tlek a saii, Anih te Boeipa loh manghai rhoek hmaiah a thangpom. Boeipa loh anih te pilnam hamla olkhueng a paek, anih taengah a thangpomnah a tueng sak.

⁴ A uepomnah neh kodonah dongah anih te a poek, hlanghing khuiah anih khoem a coelh.

⁵ Anih bueng te a ol a yaak sak tih, amah te khomong khomai khuila a khuen, Olkhueng a paek vaengah a hmai neh a hmai hum uh, te ah hingnah neh mingnah olkhueng rhoe pai ni. Te tlam ni Jakob kah paipi te a cangpuei vetih, a oltloeknah te Israel taengah a thuituen eh.

⁶ Boeipa loh Aaron a pomsang, hlang cim Moses bangla anih tah a manuca pai tih Levi koca khuikah ni.

⁷ Anih taengah khaw dungyan paipi a sai, anih te pilnam kah khosoih la a khueh. Boeipa loh anih te rhim-om la yoethen a paek tih, a pum dongah thangpomnah himbai a bai sai.

⁸ Anih te rhuepomnah te a soep a bai sak tih, saithainah miknoek neh a thaphoh.

⁹ Anih te tale thaih neh a yen tih, sui hlingthung muep a bang pah. A caeh vaengah hlingthung ol lo tih, a cai te bawkim khuiah a yaak uh. Te tah pilnam rhalrhingnah aka pae la om.

¹⁰ A cim himbai te sui neh a cangul neh, daidi neh aemkaek kah kutngo neh, Laitloeknah olrhuh neh, Urim neh, Thummim neh

¹¹ Kuthai kah bibi neh a ling la a en tih kutnoek la a tarhit lung vang neh, Lungthen aka saii kah sui rhaiphuel neh, Israel koca te rhip poeknah ca khaw a tarhit.

¹² A lupong soah sui rhuisam a khuem tih, “Cimcaihnah” kutha te a khueh pah. A khuetnah kutdoe, bibi a thoemnah la a mik dongah mikcuk la, muep a thoeihcam.

¹³ Anih hlan ah tebang hnothen a om noek moenih, Rhamvoel hlang khaw a bai sak noek moenih Tedae Aaron koca rhoek neh, a cadil taengah ni a khuui la a khueh.

¹⁴ Boeipa kah hmueh te a pum la a phum tih hnin takuem ah hnavoei hnavoei phat a phum.

¹⁵ Moses loh anih te a koelh anih te situi cim neh a koelh. Te tah anih ham kumhal kah paipi la om, Vaan a om khuiah tah a cadil rhoek ham kha a om pah. Boeipa ka bibikung la khosoih a bi sak tih, anih ming rhangneh pilnam a yoethen.

16 Mulhing boeih khuiah khaw Boeipa loh anih a coelh, pilnam ham tholh dawthnah aka khueh kung hamla.

17 A olpaek kahw anih taengah ni a paek, saithainah neh, olrhi khaw, laitloeknah khaw. Olphong te Jakob taengah aka cangpuei la, a olkhueng neh Israel mik aka tueng sak hamla.

18 Rhamvoel rhoek loh anih te a uevawt uh khosoek ah anih te a uet uh. Dathan neh Abiram kah a hnukbang rhoek loh Khosi neh thintoeknah khuiah Korah rhoihui long khaw.

19 Boeipa loh a hmuh vaengah a kolo pawh, Te dongah Boeipa kah thingtoek hmailing loh amih te a phae, Boeipa loh kopoekrhai hno a saii tih, amih te hmaisai hmai loh boeih a hlawp.

20 Aron tah thangpomnah koep a thap pah, Te dongah anih te rho neh a phaeng. Anih te thaih cuek tanglue a yo sak tih, thaih cuek buh te muep a tawn pah.

21 Boeipa kah hmueih a caak uh te, amah neh a cadilcahma taengah a pang sak.

22 Tedae anih pilnam kah khohmuen a pang sak moenih, Pilnam lakli ah khoyo khaw a khueh moenih. Boeipa amah te anih ham rho neh khoyo la om coeng.

23 Eleazar capa Phinehas tah thangpomnah dongah a pathum nah la om Anih tah Boeipa rhinah dongah khaw tlungmu. Pilnam boeih a hnukpoh vaengah a cak la pai, a hinglu longkhaw hlangtang kah rhalthennah a khueh, Te dongah Israel hamla tholh dawthnah a khueh pah.

24 Anih taengah paya kah paipi khaw a thoh pah tih, hmuencim neh a pilnam kah mawtkung la a khueh. Amah neh a cadil rhoek khaw kumhal kah, khosoih rhim-om la a om sak.

25 Judah koca Jeseecapa David taengah paipi a thoh vanbangla, Manghai rho te a ca lamloh a ca taengah a paek, te dongah Aaron kah rho tah amah cadil ham a khueh pah.

26 Te dongah Boeipa te uem uh laeh, Amah loh thangpomnah n'khuem sak coeng. Boeipa loh nang te kopoeck cueihnah m'pae saeh. Pilnam te tiktamnah neh laitloek hamla. Te daengah a khobuhnah khaw a paa pawt vetih a cadilcahma taeng duela amih thangpomnah te a nguel eh.

46

1 Nun capa Joshua tah caemtloek dongah tung pai Anih tah tonghma bibi dongah Moses hnukthoi la om. Anih tah a ming dongkah a om tih Pathen hlang tuek kah khangkung boei la om. Amih aka tlai thil a thunkha soah tawnlonah a khueh. Te dongah Israel taengah rho a tael pah.

2 A kut a thueng vaengah khuet tangkik tih, a cunghang loh khopuei rhoek khaw a saih.

3 Anih hlang unim a cak la aka pai? anih tah Boeipa ham ni caem a tloek.

4 Anih rhangneh khomik khaw duem tih, hnin at mai te hnin nit bangla puh.

5 Thunkha la hnukhmai la a nen vaengah, anih long Samrhang Khohni ni a khue. Te dongah Boeipa boeilen loh anih te, tungthang thaomnah rhaelnu neh a voek.

⁶ Caemtloek vaengah namtom khaw thup tih, tuibah ah a thinnaek rhoek khaw a thup. Te dongah namtom loh anih kah caemtloeknah khaw a ming. Anih tah Boeipa mikhmuh a vathoh tih, Tlungthang hnukah bang hamla tlungmu.

⁷ Joshua tue vaengah anih khaw, Jephunneh capa Kaleb khaw Moses loh hlangtang la a khueh coeng. Anih loh hlangping khaw a oelh tih Pilnam te tholhnah lamloh a hlawt. Te vaengah amih kah halangnah te dup a hnah.

⁸ Camoe thawng ya rhuk khuiah tah sueng rhoi, Te dongah pilamnah rhopangnah khuila a khuen. Te khohmuen ah suktui neh khoitui khaw long.

⁹ Boeipa loh Kaleb te thadueng a paek, Te te a patong hil amah taengah om, Te dongah tlang ram la cet tih, a cadil ham rho la a khueh pah.

¹⁰ Te dongah Israel pum loh hmu van saeh, Boeipa hnuk aka bang kah a then tangkik te.

¹¹ Laitloekkung rhoek khaw a ming hinyahnah kap amih kah thinko tah mueirhol taengah a hoi moenih, Boeipa taeng lamloh taengphael uh pawt, amih poekkoepnah tae a yoethen pai.

¹² A rhuh pataeng a yalhnah kung lamloh, a thai la a hingnah koep a om khaw, hinyah aka kap rhoek a ming te khaw, a ca rhoek taeng duela koep om saeh.

¹³ Samuel tah Boeipa loh a thintlonah Boeipa tonghma la om tih ram a pai sak, Pilnam ukkung rhoek te khaw a koelh.

¹⁴ Boeipa kah olkhueng bangla rhaengpuei lai a tloek, Boeipa loh Jakob te a dawndah.

¹⁵ A uepomnah soah anih te tonghma la a pom, a olthui dongah anih te uepom khohmu la a ming.

¹⁶ Anih te voeivang kah rhal loh a nen vaengah, Samrhang Boeipa te a khue tih, Tu sukyawn te hmueih la a nawn.

¹⁷ Boeipa loh vaan lamkah rhaek a hlak tih ol a cai sak vaengah rhihom ol a yaak uh.

¹⁸ Anih loh a thunkha kah mawtkung rhoek neh, Philistine mawt kung rhoek khaw boeih a hlak.

¹⁹ Dungyan a ih tue a pha tom vaengah, Boeipa neh a koelh hlang hmai laipai la om, Khokhom yungnit khaw a yet hnopai khaw, pakhat taengkah ka loh nim?" a ti vaengah. Anih aka boe sak te a om moenih.

²⁰ A ihnah kungla a yalh phoeiah khaw tonghma tih manghai dueknah te a thui. Lairhi lamloh ol a huel tih, a olphong loh hlang thae te boeih a khoe.

47

¹ Samuel phoeiah tah Nathan phoe, David tue vaengah ol a phong.

² Hmueih pumsoep dong lamkah a tha a hoep bangla, Israel khui lamloh David te hloep a coelh coeng.

³ Sathueng te maae ca bangla, Vom khaw tuping tuca bangla a luemnah.

⁴ A camoe ah a le khaw a ngawn tih, pilnam kah yahpohnah te khoe het pawt nim? Me vaengah lae payai neh lungcang a hil tih, Hlang hoem Goliath te mat a dae?

⁵ Anih long tah Boeipa, Khohni ni a khue, Te dongah a bantang kut te thadueng a paek. Te vaengah hlangtlung hlangrhalh khaw a tloek tih, pilnam kah saithainah te a pomsang.

⁶ Te dongah anih tah thawngrha khaw a noeng tila a thangpom, Boeipa loh yoethennah a khueh pa soah anih a koeh uh, Thangpomnah rhuisam te khaw anih a khuem sak uh bal

⁷ Kaepvai boeih kah a thunkha te a khoe tih, A rhal Philistine khaw a thup dongah Mamih kah khohnin duela amih te paep uh.

⁸ A saii boeih soah khaw A Cim Khohni, te a uemtihi amah thangpomnah te a doek. Koehnah laa khaw a thinko boeih neh sak, Amah aka suenkung te khaw a lungnah.

⁹ Hmueihtuk hmaiah laasa rhoek khaw a khueh tih, Amih ol dongah phungding olding a khueh sak.

¹⁰ Amah loh khotue ham khaw sawthennah a khueh, Kum khat ham a tue boeih a soepsoei bal, Pathen kah a ming cim te a koeh uh vaengah, hmuencim tah mincang lamloh yue tuempa coeng.

¹¹ Boeipa loh a tholnah te a loh pah tih, a thaomnah te a yoeyah la a pomsang, Anih taengah manghi paipi neh, Irasael kah thangpomnah ngolkhoel a paek.

¹² Anih hnukah capa hlangcueih koep phoe, Anih rhangneh bidip la kho a sak uh.

¹³ Solomon longtah rhalmongnah tue neh a manghai thil, Pathen loh a khorhi boeih ah rhalmongnah a khueh. Te daengah nih Boeipa ming te im a sak thai eh, Te dongah a rhokso te a yoeyah la a pai sak.

¹⁴ Na camoe vaengah mah na cueih tangkik tih, yakmingnah te tuiva bangla na long coeng.

¹⁵ Na tangluenah te diklai tom ah yilh cet. Nang tah olcueih thuingaihna aka dung neh a baetawt.

¹⁶ Na mingthang loh khohla sanglak a pha tih, Rhoepnah neh na manghai dongah nang te n'lungnah.

¹⁷ Na laa khaw, na olcueih neh thuidoeknah khaw, Na hlatnah loh namtom khaw kopoekrhai a paek.

¹⁸ Boeipa Pathen ming rhangneh, Israel Pathen aka khue la om. Sui khaw thi bangla na kol tih, Ngun khaw kawnlawk bangla na hmoek.

¹⁹ Tedae na taengah aka yalh la yuu te na loh, Tedongah na pum te boengai oeng la na khueh.

²⁰ Na rhuepomnah te dawih na koelh tih, na im ko te boeih na poeih. Te dongah na ca rhoek khaw kosi na loh pah, na ang dongah amih te nguekcoi uh.

²¹ Na poengnah ram khaw rhek tih, Epharaim lamkah a poe loh ram a tloelh.

²² Tedae Boeipa loh a rhennah te hlahpham pawh, a bibi te poci sak hamla pakhat khaw khueh pawh. A coelh cadil he tah khoe tlaih mahpawh, A lungnah hlang kah im ko te bit mahpawh. Jakob kah a meet te a khueh tih, a imkhui kah a yung lamloh David a poek sak.

²³ Solom te a napa rhoek taengla duem, Te vaengah a ca rhoek te a caehtak, a cueih talh tih a ang ni a yaal Rehohoam, anih kah khoboe loh pilnam boe a koek sak. Nebat capa Jeroboam loh

Israel te tholh khuila a mawt, Tholhnah longpuei Epharaim a tong sak.

²⁴ Amih kah tholhnah te ta-oe ta-oe pungtai, a khohmuen lamloh saldong la a khuen hil.

²⁵ Halang koi boeih te a tlap uh, amih soah tawnlohnah a pai duela.

48

¹ Tonghma Elijah tah hmai bangla a thoeng, A olthui khaw hmaithoi bangla tak.

² Amih soah khokhanah a pai sak tih, a kohlopnah loh amih a hlangmi a muei sak.

³ Boeipa ol rhangneh vaan khaw a biing tih, a rhaepthum la hmai a tlak sak.

⁴ Elijah nang tah na khuet tangkik, Na khoboe te khobae rhambae pawn ni. U kah thangpomnah longnim nang kah te a tluk.

⁵ Nang loh rhok te dueknah lamkah khaw, Saelkhui lamkh khaw, Khohni kah olka rhangneh na thoh coeng.

⁶ Manghai rhoek te cungkunah khuila na tueih tih, Mingthang hlang khaw a thingkong dongah na duek sak.

⁷ Sinai kah a honah neh Horeb kah, Tawnloh laitloeknah khaw na yaak.

⁸ Pilnam tholh thungnah aka khueh manghai hoek, nang aka pang ham tonghma rhoek khaw na koelh.

⁹ Nang tah hmai humhae neh, hmai marhang leng loh n'loh coeng.

¹⁰ A tue a pha vaengah thintoek thinsa neh, Pathen kah kosi aka paa sak hamla, A napa rhoek kah thinko te a ca rhoek taengah mael sak ham

Jakob koca te thoh sak ham m'hmoel te a daek coeng.

¹¹ Nang aka hmuh tih lungnah neh, aka thoei-hcam rhoek tah a yoethen uh. Te dongah rheap ka hing uh van pawn ni.

¹² Elijah te hmumha loh a cun vaengah, Elisha tah a mueihla neh baetawt, Miknoek khaw rhaepnit la muep a saii, a ka dongkah khobaerhambae la thoeng. Amah tue vaengah tah ukkung hmaiah khaw thuen pawt tih, u long khaw anih te hnaep thai tlaih moenih.

¹³ Anih ham tah a kuel a ka khaw om pawh, a duek phoeiah pataeng a rhok te tonghma pueng.

¹⁴ A hing vaengah kopoeik rhai a saii tih A dueknah dongah khaw a khoboe te kopoeik rhai la om.

¹⁵ Te lallah pataeng pilnam he yut pawt tih, a tholhnah te hnawt uh pawh. Amih te a khohmuen lamloh kutbuem la a poelyoe tih, diklai pum ah a thaek a yaak uh lalah khaw. Pilnam te hlangmi a yool bueng a paih uh tih, Daivi imkhui lamkah ukkung bueng te dawk om.

¹⁶ Hlangvang loh a thuem tah a saii, Tedae a tloe rhoek tah ta-aep, ta-aep tholh uh.

¹⁷ Hezekiah lo a khopuei te a cak sak tih, A tlaklung ah tui a loei. Lungpang khaw thicung neh a vueh tih, Tui hamla tui-im a saii.

¹⁸ Anih tue ah Sennakherib loh ram a muk pah, Te dongah rhalkap a tueih tih nong uh. A kuthluem neh Zion a tlai thil tih, a mangkhaknah neh hoem muep a sat.

¹⁹ Te dongah Israel tah a thinko tuen tih a kut thuen, Te vaengah huta bungltloh bangla kopang uh.

²⁰ Tedae amih tah rhennah aka khueh Boeipa ni a khue uh Boeipa taengah ni a kut te a phuel uh. A Cim Pathen loh amih ol te vaan lamkah a yaak, Te dongah Isiah rhangneh amih te a loeih sak.

²¹ Boeipa loh Assyrian kah rhaehhmuen te a tloek tih, A puencawn loh a mih te boeih a khoe.

²² Hezekiah loh Boeipa loh a ngaih te a saii tih, A napa David kah khosing te a cak la a khoem. Amah te a mangthuinah dongah uepomnah neh, a tanglue la aka om Isiah loh rhep a uen coeng.

²³ Isiah tue vaengah khomik khaw a hnuk la mael, te dongah manghai kah a hinglung khaw a tom pah.

²⁴ Mueihla thincaknah rhangneh hmailong khaw a hmuh tih, Zion kah rhungrhahnah te khaw koep a hloep.

²⁵ A bawtnah tue mebang a thoeng ham khaw a phoe tih, Olhueng khaw a phoe hlanah boeih a thui.

49

¹ Josiah kah ming tah botui ka saii thai loh a hmoel, Hmueihmuei botui a thungnom bangla la om. Anih poekkoepnah he hlang ka ah khoitui bangla didip, yukung buhkung kah phungding ol bangla om.

² A thuem he a saii tih pilnam a tlaih a vong, Te vaengah halang kah tueilaehkoi ne boeih a khoe.

³ A thinko khaw Boeipa taengah rheap a khueh, cungpoeih halang tue te Pathen khoboe neh a uk.

⁴ David, Hezekiah neh Josiah phoeiah tah, a tloe boeih he hlangtholh koek la om uh. Khohni kah olkhueng te a hno uh dongah, Judah manghai rhoek tah a palthamnah la poeh.

⁵ Amih kah thaomnah te hlang tloe taengla, amih thangpomnah te namtom kholong taengla a paek.

⁶ Jeremiah kut dongah a thui bangla, a coelh hmuencuen khopuei te a hoeh pah tih, longpuei caetung te khopong la a khueh pah.

⁷ Amih loh Jeremiah te khaw a hnaemtaek uh, Anih te a manu bung khuiah Boeipa loh a ciim coeng, aka phu ham, a tulh ham neh aka phae ham khaw, a thoh ham te koep aka phung ham khaw.

⁸ Ezekial loh thangpomnah mangthui a hmuh, Pathen loh anih cherubim kah a ngol sak.

⁹ Boeipa loh Job te khaw a thui, anih tah tiktamnah longpuei te khak a tuuk.

¹⁰ Tonghma hlainit kah a rhuh khaw thui saeh, te rhoek a yalh nah lamloh hingnah thai khaw om. Te rhoek loh Jakob kah pilnam te a hloep, ngaiuepnah thenkoek neh amih te a hlawt.

¹¹ Zeubbabel te metlam n'koeh lah eh, anih tah bantang kut kah kuha kutcin banghui ni.

¹² Te phoeiah Jozadak capa Jeshua he khaw, amih tue vaengah im a sak uh tih. Boeipa kah bawkim cim khaw a thoh dongah dungyan thangpomnah la a khueh.

¹³ Manghai hnukkhueng Nehemiah khaw poekkoepnah om saeh, anih loh votung aka bung

tangtae koep a thoh, Vongka khaw koep a khueh tih thohkalth a saii, mamih kah imkhui aka bung tangtae koep a thoh bal.

¹⁴ Diklai hmanah Enoch bangla ana suen hlan, anih tah diklai lamloh vik a pom sang coeng.

¹⁵ Joshep bang he pakhat thang vai pawh, Te dongah a rhuh khaw a then la a khoem uh,

¹⁶ Shem, Seth neh Enosh khaw hinyah kap, Adam tah a suen mulhing boeih khuiah tanglue la om.

50

¹ A manuca kah boeilu neh a pilnam kah oekpueinah, Khosoih boei Onias capa Simon, Amah tue vaengah im te a tlaih tih, amah tue vaengah bawkim te a cak sak.

² Pangbueng a sang rhaepnip ham khoengim a tloeng tih, bawkim vongup ham vongtung te a khueh.

³ Anih tue vaengah tuito khaw a to, tui-im dongkah mah mah tuitunli bangla omthen.

⁴ A pilnam te pocinah khui lamloh metla hlawt ham khaw a poek, te dongah khopuei te tanglung neh a cak sak.

⁵ Pilnam loh anih boyong vaengah bahoeng a rhuepom, himbaiyan im lamkah puk aka thoeng bangla.

⁶ Khoboei soah aisi thuipa bang la, Khoning khotue vaengkah hla lum bangla,

⁷ Khohni bawkim dongah aka saeh khomik bangla, rhuepom khomai dongah aka yaal pam-pacung bangla,

⁸ Thaihcuek hnin kah rhaipai bangla, Sokca tuikaeng kah tuili pai bangla, Khohal tue kah Lebanon tlang ah aka daih bael hing bangla,

⁹ Botui bael dongkah hmai neh hmueihtui bangla, Sui a boh thil bael yak bangla,

¹⁰ A thaih loh a nan olive thing bangla, khomai aka tok hang hmaical thing bangla.

¹¹ Thangpom himbai a bai vaengah, amah te rhuepom soep neh khuk uh. Hmueihtuk cim la a yoeng vaengah, rhokso tolhmuen te thangpomnah a khueh.

¹² Khosoih kut dongah maehham a doe vaengah, hmueituk kah a lung ah pai. Te vaengah a taengvai kah manuca te rhaihulh bangla amah tah Lebanon kah lamphai thinghloe bangla om. Rhophoe kung bangla a vael uh bal.

¹³ A rhuepomnah khuih Aaron koca rhoek om, a kut dongah Boeipa nawnnah te a khueh tih, Israel hlangping boeih kah hmai ah pai uh.

¹⁴ Hmueihtuk kah bibinah a coeng tih, Khohni tlungthang taengah nawnnah te soepsoei.

¹⁵ A kut te a yueng tih boengloeng a loh, Misur thii te tuisih la a doeng. Hmueihtuk kho te a bueih tih, Cungkuem kah manghai Khohni te hmueihtui a uem sak

¹⁶ Te vaengah Aaron koca rhoek yuhui tih, Thi neh a saii olueng te a ueng uh. Khohni hmai ah yaksaknah hamla ollen olthang a cai sak uh.

¹⁷ Te vaengah pilnam boeih te koe tingtun uh, a maelhmai te cirhong la a buluk uh tih, Khohni Pathen tlungthang, Amih kah Boeipa te a bawh uh.

18 Te phoeiah laasa rhoek loh Boeipa te a ol neh, olding olthen boeih neh a koeh uh.

19 Te vaengah pilnam boeih loh Boeipa Khohni Lungvat kung hmaiah thangthuinah te a nawn uh. Boeipa bawknah hmakhuen te a bawt hlan hil a thothuengnah te a soep sak uh.

20 Te phoeiah tah Simon te suntla a kut a phuel, Israel ca hlangping boeih soah te. Te phoeiah Boeipa kah yoethennah te aka neh a phong, Boeipa ming te thangpomnah a khueh.

21 Te dongah bawknah khuiah pabae la bakop uh tih, Khohni taeng lamkah yoethennah te a doe uh.

22 Cungkuem kah Pathen tah a yoethen pai saeh, Kho takuem ah kopoekrhai tangkik la bibi a saii. Ithang lamloh n'rhoengnah hil amah n'cuncah tih, a sitlohnah neh mamih taengah han saii.

23 Amah loh thiko kohoenah m'pae saeh lam-tah, Mamih tue vaengah rthalmongnah om saeh. Khosue Israel tue vaengkah bangla.

24 A rhennah he mamih taengah han khueh saeh, mamih tue ah khaw amah loh n'loeih sak saeh.

25 Namtu panit tah ka hinglu loh a hnoel, a pathum kah tah pilnam voel moenih.

26 Te rhoek tah Seir neh Philistine kah khosa rhoek, Sekhem kah khosa pilnam hlang ang rhoek ni.

27 Yakmingnah neh mingnah dongah thuituen-nah te, He cabu dongah ka daek coeng. Jersalem kah Sirach koca Eleazar capa Jesuh he, amah lungbuei ah cueihnah a lun pah dongah ni.

²⁸ He kah olkah amah aka ngaituyen tah a yeothen, a thinko ah aka rhaerhong sak hlang cueih ni.

²⁹ Te te vai hamla aka khueh rhoek tah, mebang hno dongah khaw vanat la om uh vetih, Boeipa rihnah te amih kah namtlak la om ni.

51

SIRACH KAH THANGTHUINAH

¹ Boeipa Manghai namah te kan uem, Ka Pathen neh ka khangkung nang kan koeh, Namah ming te ka uem.

² Namah tah kai tungaepkung neh bomkung la na om, Kai he pocinah khui lamloh kan nan hlawt, Oltha kaling kah a tung hlaeh dong lamkah neh, Laithae thainawn hmuilai lamkah khaw. Kocaelh kah mikhmuh ah kai bomkung la nan hlawt.

³ Na rhennah neh na ming a len tangkik dongah, Kai he ngaeh ham no aka rhueng rhoek taeng lamkah khaw, ka hngnah aka tlap rhoek kut lamkah khaw, ngaih mangnah rhaepnit la ka ming khui lamkah khaw,

⁴ Kaepvai boeih kah hmai rhong khui lamkah khaw, Ka toih mueh kah hmai tak khui lamkah khaw,

⁵ Saelkhui bungko a dung khui lamkah khaw, a cim pawh ol neh laithae ol lamkah khaw,

⁶ Hlang loh manghai taengla laithae ol a thui khui lamkah khaw Ka hinglu he dueknah neh yoei tih, Ka hingnah he saelkhui khuirhai ah om coeng.

⁷ Amih loh loh a hnukhmai la khoep m'vael uh, Te vaengah kai bomkung pakhat khaw om pawh. Hlang kah bomcennah ka lamtawn dae, Pakhat khaw a om moenih.

⁸ Boepa nangkah rhennah ni ka poek, A rhuem lamkah na sitlohnah te khaw. Namah aka rhing hlang tah na hlawt tih, amih te a thunkha kut lamloh na khang coeng.

⁹ Te dongah diklai lamkah ka thangthuinah kan tueih, dueknah khui lamloh hlawt hamla kan bih.

¹⁰ Boeipa nang ni kan khue, nang kai napa ni, Ngaih mangnah khohnin ah kai n'hnoo boeh. Aka hoem rhoek mikhmuh ah bomkung ka khueh moenih.

¹¹ Na ming te phat ka koeh vetih, Uemnah laa te ka sak ni.

¹² Ka thangthuinah te na yaak coeng, Pocinah khui lamloh kan nan khang coeng. Ngaih mang tue vaengah kai nan hlawt coeng. He kongah ni nang kan uem tih nang te kan koeh, Te dongah Boeipa ming te Ka uem. BOEIPA te uem lah, amah tah then tih, a sitlohnah tah cak yoeyah. Pathen koehnah te uem uh lah, a sitlohnah tah cak yoeyah Israel dawndah kung te uem uh lah, a sitlohnah tah cak yoeyah. Hno cungkuem aka hlom aka bol amah te uem lah, a sitlohnah tah cak yoeyah. Israel tlankung te uem uh lah, a sitlohnah tah cak yoeyah. A taekyak tangtae Israel koep aka coi uem uh lah, a sitlohnah tah cak yoeyah. A khopuei neh a rhokso koep a thoh te uem uh lah, a sitlohnah tah cak yoeyah. David imkhui hamla ki aka cawn sak te uem uh lah, a sitlohnah tah cak yoeyah. Khosoih la

Zadok koca aka coelh te uem uh lah, a sitlohnah tah cak yoeyah. Abrahma kah photling te uem uh lah, a sitlohnah tah cak yoeyah. Isaak kah lungpang te uem uh lah, a sitlohnah tah cak yoeyah. Jakob kah tlungthang te uem uh lah, a sitlohnah tah cak yoeyah. Zion aka coelh te uem uh lah, a sitlohnah tah cak yoeyah. Manghai rhoek kah Manghai te uem uh lah, a sitlohnah tah cak yoeyah. A pilnam hamla ki aka thoh te uem uh lah a sitlohnah tah cak yoeyah. Israel ca rhoek, a pilnam te amah ham ni, BOEIPA te koeh uh lah

¹³ Ka camoe vaengah pataeng, ka yincaeh hlan ah, Thangthuinah dongah cueihnah phaeng ka tlap.

¹⁴ Bawkim hmaiah cueihnah te ka toem tih, a bawtnah hil cueihnah te ka khe.

¹⁵ Misur a muem laloh a hmin duela, ka thinko he cueinah dongah hmae. Ka kho he namtlak dueng ah cet ih, ka coem lamloh cueinah kholaeh te ka thuih.

¹⁶ Ka hna vel ka kaeng vaengah cueihnah ka dang kai ham thuituennah la muep ka hmuh.

¹⁷ Cueihnah dongah cumphoek tih, Cueinah aka pae kung te thangpomnah ka khueh.

¹⁸ Cueinah bangla khosak long ka rhoek tih, a then dongah kocuknah ka khueh.

¹⁹ Ka hinglu he cueinah neh ka cun tih, ka omih dongah khaw ka cik. Ka kut he vaan la ka phuel, cueinah ka hnoel dongah te ka rhap.

²⁰ Ka hinglu he cueihnah taengla ka hooi, a cim dongah ni cueihnah te ka hmuh. Cueihnah

rhangneh lamhma kah yakmingnah ka dang, te dongah kai he n'hnoo tlaih voel mahpawh.

²¹ Cueihnah tlap ham na thinko niknuk coeng, te dongah khuetawnnah kutdoe ka dang.

²² Boeipa loh ka olka he thapang la m'paek, te dongah ka ol neh amah te ka koeh ni.

²³ Aka cueih mueh nang kai taengla ha yoei lah, Thuituennah im ah he luei uh lah.

²⁴ Balaie tih hebang mai he ka vawt thoek na ti, balaeti te bangla tuihalh te puet na ueh.

²⁵ Ka ka ka nang tih ka thui coeng, cueihnah he cocip uh lah, nangmih ham tangka a kuek moenih.

²⁶ Cueihnah hamkun na rhawn ah vah lah, Na hinglu loh thuituennah te doe saeh, Te te a yoei ah ni rheap a om.

²⁷ Na mik nen khaw hmu van lah, ka thakthae dae a yol ni, mongnah he kamah loh muep ka dang coeng,

²⁸ Ka thuituennah he a yol mah hnaton van lah, ka dong lamloh sui neh ngun he na dang ni.

²⁹ Na hinglu te Pathen sitlohnah dongah omn-gaih saeh, amah koeh ham te me vaengah khaw yak boeh.

³⁰ A tue then vaengah na bi te saii Pathen mah kah a tue ah, na thapang m'paek bitni.

Baibal Olcim
The Holy Bible in the Matupi Chin language of
Mynmar. Matupi Chin Standard Bible

Public Domain

Language: Matupi Chin (Chin, Matu)

Published in Mynmar, which is not a signatory to international copyright treaties. Copyright may apply locally in Mynmar, where this is released under a Creative Commons Attribution Share-Alike 4.0 license.

2022-07-26

PDF generated using Haiola and XeLaTeX on 11 Nov 2022 from source files dated 18 Oct 2022

41fab36-17f8-5f01-836a-236df4848b16